




Barnoota Lammummaa Fi Amala Gaarii



Barnoota Lammummaa Fi Amala Gaarii Kitaaba Barataa Kutaa 6



Kitaaba Barataa



Mootummaa Dimookiraatawaa Federaalawaa Rippaabiliikii Itoophiyaa
Ministeera Barnootaa

ISBN-978-99944-2-060-5
Gatii Qr. 19.80



Mootummaa Dimookiraatawaa Federaalawaa Rippaabiliikii Itoophiyaa
Ministeera Barnootaa

Kutaa
6



የኢትዮጵያ ከዘም መዝሙር

የነግድ ክብር በኢትዮጵያ ወንጀ:
ቃድ ስበባዊነት የፌ ልስከናር በርቅ::
ለሰላም፣ ለፍትህ ለአገልግሎት ነገስታ;
በኢትዮጵያ በፍቅር ቅመናል የንድነት::
መሠረት ወን ሰብዳሪን ያልሸጋን;
ሻጠባች ነን ለሥራ ለሥራ የጥርጋ::
ደንቅ የባህል መድረሻ የኢትዮ ቅርቡ
በለበት::
የተፈጥሩ ብቻ የቃጥና ስበብ ነገስታ;
እንጠቀቹለን አለብን አደራ::
ኢትዮጵያ ነው እናም ባንቸ እንከራ::

Faaruu Alaabaa Mootummaa Naannoo Oromiyaa

Oromiyaa, Oromiyaa haadha seenaa guddaa Handhuura Oromoottaa galma sirna Gadaa Dachee heeraa fi seeraa haadha Caffee Odaa Badhaatu, gabbattuu magarsituu hundaa; Xurii bara dhibbaa dhiigaan sirraa dhiqnee Wareegama qaaliin alaabaa kee ol qabnee Gammannee gammadii bokkuu deebifannee; Nagaaf dimokraasii tabaroo namummaa Misoomaa amansiisaa guddina hatattamaa Ummatootaa wajjiniis jaalalaafi tokkummaa Wabii jirenyaatiif goonee kaayyoo cimaa; Irree gamteeffannee kaanee nu abdadhuu Oromiyaa lalisii dagaagii jiraadhuu!

KITAABA KANA HAALA GAARIIN QABUU QABDA



- Kitaaba kana haala gaariin qabuu qabda.
- Kitaabni kun qabeenya mana barumsaa keetiiti.
- Kana gochuuf qabxilleen kurnan (10) armaan gaditti tarreefaman ilaali.

1. Kitaaba kana wantoota akka plastikii, gaazeexaa fi k,k,f niin ufisuu qabda.
2. Yeroo hunda kitaaba kana iddo gogaa kaauu qabda.
3. Yeroo kitaaba kanatti fayyadamtu harki kee qulquulluu ta'uu qaba.
4. Qola kitaaba kanaa irraattis ta'ee fuula irratti barreessu hin qabdu.
5. Kitaaba kana mallatoo itti godhachuu yoo barbaadde waraqaa xiqqoo ykn kaardii itti fayyadami.
6. Fikkii fuula kitaaba kanaa irra jiru hunda gonkumaa kutuu hin qabdu.
7. Kitaabni kun yoo akka tasaa tarsa'e battaluma sanatti hapheen ykn 'maastishiin' qabsiisuu qabda.
8. Kitaaba kana erga fayyadamteen booda haala gaariin teessoo kitaabaa irra kaa'uu qabda.
9. Kitaaba kana yeroo namaaf kennitus ta'ee; fudhattu eegganno gochuu qabda.
10. Kitaaba haaraa kana yeroo jalqabaaf yeroo fayyadamtu fuula jal qabaa suuta saaquo qaba. Erga saaqte booda suuta jedhii dugda isaa gadi qabi akka hin cinnetti. Kunis qola kitaaba kana haal gaariin qabuuf gargaara.



BARNOOTA LAMMUMMAA

FI AMALA GAARII



KITAABA BARATAA

Kutaa 6

Qopheessaan:

Ministeera Barnootaa Federaalaa

Afaan Oromootti Kan Hiikan:

- ﴿ Hayiluu Birruu
- ﴿ Tsahaay Addunyaa

Gulaalaan:

- ﴿ Darajjee Mokonnin
- ﴿ Tsahaay Addunyaa
- ﴿ Sirnaa Dabalaa



Mootummaa Dimookiraataawaa Federaalawaa
Rippabilikii Itoophiyaa
Ministeera Barnootaa

AG PRINTING & PUBLISHING LTD

Galata

Fandiin Dizaayinii, maxxansaa fi raabsaa kitaaba barataa fi qajeelcha barsiisaa Barnoota Lammummaa fi Amala Gaarii kun deeggersa karaa **Piroojektii Fooyya’insa Qulqullina Barnoota Waliigalaa** (GEQIP)n kan argame yommuu ta’u kaayyoon piroojeektii kanaas dhaabilee barnoota mootummaa kutaalee 1-12 keessatti qulqullina barnootaa fooyyessuudha.

Mootummaan Dimookiraatawaa Federaalawaa Rippabilikii Itoophiyaa fandii **Fooyya’insa Qulqullina Barnoota Waliigalaa(GEQIP)** kana dhaabilee gargaarsa **International Development Association (IDA), The Fast Track Initiative Catalytic Fund (FTICF)** fi dhaabilee deeggertoota misoomaa biroo kanneen akka **Mootummoota Fiinlaand, Niizerlaandii, UK fi Walta’insa Misoomaa Mootummaa Xaaliyaanii** irraa argate.

Ministeeri Barnootaa Mootummaa Dimookiraatawaa Federaalawaa Rippabilikii Itoophiyaa qaamolii kallattiinis ta’e al kallattiin kitaaba barataa fi qajeelcha barsiisaa BLAG maxxansiisuu keessatti qooda fudhatan hundaaf galchuu barbaada.

© Ministeera Barnootaa Mootummaa Dimookiraatawaa Federaalawaa Rippabilikii

Itoophiyaa, bara 2003

ISBN 978-99944-2-060-5

Dhaabbata Maxxansaa Alguuraarii

Lakk. Sanduuqa Poostaa 5613

Dubaayi, U.A.E

Wal ta’insa

[**Dhaabbata Maxxansiisaa Kuraaz Internaashinalii**](#)

[**Lakk Sanduqa Poostaa 100767**](#)

[**Finfinnee,**](#)

[**Itoophiyaa**](#)

Mirgi maxxansaa seeraan eegamaadha. Kutaan kitaaba kanaa kamiyyuu hayyama Ministeera Barnootaa ykn hayyama qaama labsii **Nagaarit gaazeexaa lakk 410/2004** qabeenya sammuu egisuuf angoon kennameefiin alatti baa’ysiun, haala addaatiin itti fayyadamuuf kuusuu fi tamsaasuun dhorkaaddha.

Kitaaba kana keessatti abbootii mirga maxxansaatiif haga danda’ametti beekamtii kenuun ragaalee adda addaa fedhanneerra. Akka tasaa ta’ee beekamtii osoo hin kenniin kan fudhanne yoo jiraate dhiifama gaafachaa, maxxansa fuula duraa keessatti galchuu akka barbaannu asumaan ibsina.

Qaanmi mirgi maxxanssaa koo sirriitti beekamtii osoo hin argatiin ragaan koo fudhatameera jedhu yoo jiraate karaa teessoo keenya armaan gadii nuuf barreessuu ni danda’a:

Ministeera Barnootaa Mootummaa Dimookiraatawaa Federaalawaa Itoophiyaa

Lakk. Sanduuqa Poostaa 1367

[**Finfinnee,**](#)

[**Itoophiyaa**](#)

Baafata

<i>Qabiyyee</i>	<i>Fuula</i>
Boqonnaa 1. Sirna Dimookiraatawaa	1
Boqonnaa 2. Olaantummaa Seeraa	17
Boqonnaa 3. Walqixxummaa	33
Boqonnaa 4. Haqummaa	49
Boqonnaa 5. Jaalala Biyyaa	65
Boqonnaa 6. Miira Itti Gaafatamummaa	84
Boqonnaa 7. Aadaa Hojii Cimaa	97
Boqonnaa 8. Of Danda'u	110
Boqonnaa 9. Aadaa Qusannaa	122
Boqonnaa 10. Dammaqinaan Hirmaannaa Ummataa	135
Boqonnaa 11. Beekumsa Fedhuu	148

BOQONNAA TOKKO

SIRNA DIMOOKI RAATAWAA

Kaayyoolee Boqonnichaa: Boqonnaa kana barattee yoo xumurtu:

- *Mirgoota Namummaa fi dimokiraasi lammileen qaban ni hubatta.*
- *Tokkummaa fi garaagrummaa mirgoota namummaa fi dimokraasi ni hubatta.*
- *Maalummaa fi barbaachisummaa sirna dimokiraasii addaan baafatee ni beekta.*
- *Garaagarummaa sabootaa, sablamootaa fi uumattoota Itoophiyaa jiddu jiru ni hubatta.*
- *Yaada bu'uura imaammata biyya alaa Itoophiyaa ni hubatta.*

1.1 Sirna Dimokiraasii

Jechi dimokraasii jechu jecha Afaan Giriikii irraa kan fudhatame ta'uu isaa kutaa 5^{ffaa} keessatti barattanii jirtu. Kanaafuu, dimokiraasii jechuun maal jechuu akka ta'e ni yaadattuu? Sirna dimokraasii jechuun hoo?

Haasawa Obbo Orkaaydoo

Obbo Orkaaydoon qindeessaa mana barnoota sadarkaa 1^{ffaa} Laanteeti.- Laanteen Finfinnee irraa ka'uun gara dhihaatti yoo deemnu Arbaa Mincii ga'uuf 20km yoo nu hafu magaalaa argamtu dha. Barnoonni seemisteera 1^{ffaa} eegalee torbee booda obbo Orkaaydoon barattoota mana barnootichaa hunda dirree kubbaatti walitti qabuun yaada armaan gadii dubbatan.

Kabajamtoota barattoota! duraan durs-e baga nagaadhaan bara haaradhaan nu gahe jechaa barnoota bara haarawaa kana gahuu keenyaaf hundi keenya baga gammanne. Barri kun bara adda ta,ee fi bu'aa qubsaa ta'e itti galmeessisnu akka ta'u abdiin qaba. Hojiiwyan bara kana keessatti hojjachuuf karoorfanne keessaa lamaan tokko isiniif ibsuun barbaada. Kaayyoon walghiichaas kanuuma. Haala kanaan:

1. *Ji'atti guyyaan tokko guyyaa mana barumsa qulqulleessinu akka ta'u. Haaluma kanaan, barattooni kutaa 6^{ffaa} mana fincaanii, barattooni kutaa 5^{ffaa} biiroolee fi kutaalee barnootaa, barattooni kutaa 1-4^{ffaa} keessa jiran immoo dallaa mana*

barumsichaa hunda akka qulqu-lleessan ta'ee, barnooni akka hin miidhamneef jecha guyyaanis guyyaa sanbataa akka ta'u murteesseera.

2. Barattoota akka qindeessanii fi hojicha akka hogganan barattoota armaan gadii ramadeera. Isaanis, barattoota kutaa 6^{ffaa} tiif barattuu Lalisee, barattoota kutaa 5^{ffaatiif} barataa Luungoo, barattoota kutaa 1-4 jiraniif barataa Geellaboo ramadeera.

Barattooni qalbi fi dinqisiifannaan dhaggeeffachaa erga turanii booda gara dhumaatti gumgumuu jalqaban. Obbo Orkaaydoon riifaatanii maali? rakkootu jiraa? jechuun gaafatan. Barattoota keessaa Saarrooteen dursitee harka waan baasteef akka dubbattu carraan kennameef. Saarrooteen, barsiisaa osoo nu irratti hin mari'atin akkamitti adduma keessan qindeessitoota ramaddan? Ammas fedhaa fi yaada nama tokkootiin hogganamuu hin dandee-nyu. Bara darbe adeemsi akka kanaa kun dimokraatawaa akka hin ta'in barsiisan barnoota lammummaa fi amala gaarii keenya nuuf ibsanii turan. Adeemsa sirna dimokraasii keessatti murtoo tokko osoo hin kennin dura qaamni dhimmi ilaalu hundi irratti mari'achuu akka qabu barannee turre. Kanaafuu, nuti barattooni mana barumsa kanaa dhimma nu ilaallatu irratti mari'annee yaada irratti kennuun osoo nurraa eegamuu adduma

keessan, dhuunfaan murteessuun sirii miti. Akkasumas, dilbataa fi sanbata kan jettan barattooni hojii biroo yoo qabaatan hoo? jechuun osoo dubbachaa jirtuu barattooni harka ruktuun Saarrooteef haamilee kenn-an.

Obbo Orkaaydoon yaada Saarrooteetti waan gammadaniif barattooni yeroo tokko obsaan akka dhaggeeffatan gaafatan. Barattoonis gama isaanitiin yaadni Saarroote obbo Orkaaydoo aarsuu ni danda'a jechuun shakkaa osoo jiranuu fuula obbo Orkaaydoo irratti gammachuu waan arganiif waan isaa wallaanii dhaggeeffachuu eegal-an. Obbo Orkaaydoon barattoota hundaa keessattuu, Saarrootee kan dinqisiifatan ta'uu ibsan. Itti fufuunis obbo Orkaaydoon yoo dubbatan yaada armaan olii kan kaaseef hangam barnoota lammummaa fi amala gaarii akka hubattan ilaaluufan ture. Haala kanaan waayee dimookiraasii fi sirna dimokiraasii siritti akka hubattan argeera. Kanaafuu, jabaadhaa, akkanumatti itti fufaa jechuudhaan wal gahii guyyaa sanaa xumuran.

Gilgaala -1**Gaaffilee armaan gadii
deebisaa.**

1. Barreeffama armaan olii irraa dimokraasii fi sirni dimokraasii maal akka ta'an hubattanii jirtuu?
2. Adeemsa marii armaan olii keessatti sirni dimokiraasii akkamitti akka ibsame mari'adhaa.
3. Yaadni obbo Orkaaydoon xumura irratti kennan sirriidhaa? Maaliif?
4. Murteewwaan lamaan obbo Orkaaydoon haala adeemsa sirna dimokraasiitiin yoo ilaalamani sirriidhaa? Maaliif? Irratti mari'adhaa.

Jechi dimokraasii jechu aangoon ykn bulchiinsi harka ummataa kan jiru ta'ee, sirna mootummaan fedhii fi waliigaltee ummataatiin hundaa'e keessa jiru jechuu dha. Sirna dimookraasii keessatti ummanni hoggantoota fedhii isaatiin filata. Hoggantoonni filatamanis deebi'aanii ummata bulchu. Akkas-umaas hawaasni hoggantoota sirna dimokraatawaa ta'een filate irratti amantaa yoo dhabe deebi'ee aangoor irraa kaasuu ni danda'a.

Sirni dimokiraasii sirna nageenyii fi misoomni itti dhugoomuu fi hirmaanna

hawaasaatiin kan hundeeffamuu fi faaydaa ummataaf dursa kennu dha.. Haala kanaan sirna dimookraasii keessatti, namoonni jirenya isaanii kan gaggeessan, rakkoo isaanii kan hiikan murtiwwan kan murteessan mariidhaan.

Sirni dimokraasii sirna ummanni fedhii isaatiin bakka bu'ota isaa aangoo mootummaa irra ittiin kaa'uu dha. Hoggantoonnis seeraan ala yoo hojatan aangoo irraa buus-uun bakka isaanii nama kan biroo filannoona jijjiuruun aangoo kan ittiin kennu dha.

Gilgaala- 2**Gaaffii armaan gadii irratti
mari'adhaa.**

Sirni dimokraasii sirna hirmaanna ummataatiin hundeefamuu fi faaydaa hawaasaaf dursa kennu dha jechuun maal jechuu dha?

1.1.1 Barbaachisummaa Sirna Dimokiraasii

- ***Sirni dimokraasii barbaachisaa fi faaydaa qabeessa dha kan jennuu maaliif?***

Biyyi teenya Itoophiyaan biyyoota kan biraan irraa haala adda ta'een biyya saba, sab lamootaa fi ummatoota heddu kan qabdu dha. Kanaafuu, sir-

ni dimokraasii Itoophiyaaf baay'ee barbaachisaa dha. Sababni isaas: 1^{ffaa}Faayidaa fi walqixxummaan sab-a,sab-lammoottaa fi ummattootaa akka kabajamuuf godha. Hojmaata loogii irraa bilisa ta'e diriirsuun hunda ija tokkoon ilaaluun mirgii fi faaydaan isaanii akka eegamu ni godha. Fakkeenyaaaf. Biyya teenya Itoophiyaa keessatti sirni dimokraasii ijaaramaa waan jirtuuf aadaan, afaanii fi, seenaan sabaa fi sab-lammoottaa kabajamee jira. Saboonti mirgi afaan isaanitiin fayyadamuun kabajamuun isaa mirgi wal-qixxummaa fi wal-qixa fayyadmootta ta'uun isaanii hojii irra ooluu isaa agarsiisa.

2^{ffaa} Sirni dimokraasii Itoophiyaaf baay'ee barbaachisaa haalli itti ta'u keessa inni bira saba, sablammilee fi ummattootnii fi amantiwwan adda addaa kunniin garaagarummaa isaanii mariin hiikuun wal-kabajanii jaalalaan akka waliin jiraatan waan gargaaruuf dha.

Gilgaala- 3

Gaaffii armaan gadii gareen ta'uun irratti mari'adhaa.

1. Sirni dimokraasii keessattuu Itoophiyaadhaaf baay'ee barbaachisaa dha kan jedhameef maaliif?

1.1.2.Mul'istoota Sirna Dimokraasii

Daree keessan keessatti hojmaatni sirna dimokraasii jiraa? Jira yoo ta'e hojmaatni dimokraasii daree keessanii maal maalin ibsama?

- ***Garaagarummaa yaadaa fudhac-huu jechuun maaljechuu dha?***
- ***Garaagarummaa yaadaa fudha-chuudhaan obsaan walin jira-achuu jechuun maaljechuu dha?***

Barataa daree keessan keessatti yaadaan walii hin galle tokko ilaachisee gaaffilee armaan gadii osoo gaafatamtanii deebiin keessan maal ta'u danda'a? Nan gammada yoo jettan mallattoo (✓) yaada nan gammada jedhu duratti ykn hin gammadu yoo jettan mallattoo (✓) yaada hin gammadu jedhu jalatti kaa'aa.

Lakk	Gaaffilee	Nan gammada	Hin gammadu
1	Musee daree osoo taatee		
2	Hojii garee akka hojjattan waliin osoo isinii kennamee		
3	Daree qulquelleessuu irratti barattoorta kan biro waliin osoo ramadamtte		
4	Teessoo tokko irra waliin akka teessan osoo ajajamtee		
5	Gumii tokko keessa waliin miseensa taatanii ati qindeessaa gumichaa osoo taatee		
6	Hojjin daree waliin isinii kennamee ati qindeessaa garichaa osoo taatee		

Sirni dimokraasii amaloota ittiin ibsamu heddu qaba. Amaloota kanneen keessaa ijoo kan ta'an kan armaan gadii ti.

A. Hirmaannaan hawaasaa jiraachuu.

Sirna dimokraasii keessatti hawaasni dhimmoota adda addaa irratti hirmaachuu ni danda'u. Fakeenyaaf kaadhimamaa taasisanii of dhiyeessuu, ykn kallattiin filannoo irratti argamuun bakka bu'aa isaaniif ta'u filachuun ta'uu danda'a. Walgahii dhimma naanno Isaanii ilaallatuu fi waldaalee hawaasummaa keessatti miseensa ta'-uun hirmaachuu ni danda'u. Qajeelfamoota mootummaanbaasu madaal-uudhaan hojii irra oolchuu fi haalli itti fooyya'uu danda'u akka jiraatu tatt'affii gochuun hirmaachuu ta'uu danda'a.

B. Wal qixxummaan ummataa jiraachuu.

Sirna dimokraasii keessatti walqixxummaan ummataa ni kabajama. Namni kamiyyuu sanyiin, amantiin, saalaanii fi kkf gargar osoo hin qoodamin loogii tokko malee carraa walqixa ta'e qaba. Sirna dimokraasii keessatti wal-qixa ta'uu qofa osoo hin ta'in wal-qixxummaan Isaanii kun kan ittiin ibsamu karaan hedduutu jira. Ummattooni biyya Isaanii keessatti

filachuunis ta'e filatamuun hirmaachuu mirga wal-qixxummaa qabu. Seera birattis wal-qixxummaan ilaalamuuf mirga qabu.

C. Aadaan Wal-Danda'u Jiraachuu

Sirna dimokraasii keessatti ummata gidduutti garaagarummaan afaannii, aadaa, sanyii, amantii, sabaa fi sabbammilee jiraachuun isaa gaarii ta'uu isaa itti amanu. Garaagarummaan yaadaas jiraachuun isaa kan hin oollee fi faaydaa kan qabu ta'uu isaas amantiin fudhatu. Garaagarummaan yaadaa jiraachuun isaa fudhachuus ta,e wal-danda'anii waliin jiraachuun amala ijoo sirna dimokraasii ti.

Garaagarummaa yaadaa fudhachuun jechuu namoota gidduu sanyiin, af-anin, amantiin bifaan fi kan kana fakkaatuun garaagarummaan kan jiru ta'uu isaa fi yaadaanis garaagarummaan jiraachuun kan danda'u ta'uu isaa amanuu jechuu dha. Garaagarummaa yaadaa fudhachuun gara-agarummaa jiru amananii fudhac-huun ala yaada nama tokkoo inni kan biroo kabajuus dabalata.

Garaagarummaa yaadaa obsuun waliin jiraachuun jechuu yaada nuti itti hin amannes ta'e hin fudhatin namni kan bira yaada sirrii dha jedhee yaadicha ibsachuun mirga isaa ta'uu hubachuu fi kabajaan dhaggeeffachuu danda'u jechuu dha. Kanaan alattis ni dand-

a'ama yoo ta'e karaa nageen-yaatiin marii fi falmiidhaan garaagarummaa jiru dhabamsiisuu , hin danda'amu yoo ta'e immoo garaag-arummaa jiru fudhatanii nagayaan waliin jiraachuu danda'uu jechuu dha.

Gilgaala -4

Gaaffilee armaan gadii hojjadhaa.

1. Amaloota sirna dimokraasi jedhaman keessaa lamaan isaanii ibsi.
2. Garaagarummaa jiru hubatanii obsaan waliin jiraachuu bu'aa maal qaba?
3. Garaagarummaa yaadaa fudhachuus ta'e obsanii waliin jiraachuun amala sirna dimokraasii ti jechuuun maal jechuu dha?

1.2. Mirgoota Namummaa Fi Dimokraasii

1.2.1. Tokkummaa Fi Garaagarummaa Mirga Namummaa Fi Dimokraasii

- *Mirgoota namummaa jechuun kan beekaman keessaa sadeen isaanii ibsi.*
- *Mirgoota dimokraasii jechuun kan beekaman keessaa sadeen isaanii ibsi.*

Mirgoonni namummaa dhalli namaa hundi nama ta'ee uumamuu isaatiin qofa mirgoota uumamaan argate dha., Mirgoota namummaa jedhamuun kan beekaman keessaa isaan ijoon mirga lubbuun jiraachuu, mirga nag-eenya qaamaa fi mirga walabummaa ti.

Mirgoonni dimokraasi mirga hawaasnii sirna dimokraasiitiin bulu miseensa sirnichaa waan ta'eef qofa argatu dha. Kanas jechuun ummanni biyyaa fi hawaasa jiraatu keessatti hirmaanna adda addaa gochuuf mirga isaan dandeessisu jechuu dha. Mirga dimokraasii kan jedhamanis mirga yaada ofii walabaan ibsachuu, mirga gurmaa'u, mirga hiriira nagaa bahuu, mirga filuu ykn filatamuu fi kkf dha.

Mirgoonni namummaa fi dimokraasii tokkummaa fi garaagarummaas ni qabu. Lamaanuu dhala namaatiif kan barbaachisan ta'uun isaanii tokkummaa isaanii ti. Mirga namum-maa fi dimokraasii kan adda godhu madda isaanii ti. Mirgi namummaa namni nama ta'uu isaatin qofa kan argatu, kabajamuufiis kan qabu ta'ee mirgoonni dimookiraasii immoo namni kamiyyuu yaada isaa walabaan ibsachuu akka dana'u mirga sirnicha irraa argatuu fi kabajamuufii qabuu dha.

**Namni tooko mirga isaatti kan
fayyadamu hanga mirga namoota
biro hin tuaineetti dha.**

Gilgaala - 5

Gaaffilee armaan gadiif mirga namummaa yoo ta'e, saanduuqa mirga namummaa jedhoo keessatti Mallattoo (✓) yoo mirga dimokiraasii ta'e immoo saanduqa mirga dimookiraasii jedhoo keessatti mallattoo (✓) gochuun deebisi.

T/L	Akaakuu mirgootaa	Mirga namum maa	Mirga dimookir aasii
1	Mirga nageenya qaamaa		
2	Mirga gurmaa'uu		
3	Mirga wal gahii go chuu		
4	Mirga walabummaan amantii dhunfaa gaggeessuu		
5	Mirga filuu fi filatamuu		
6	Mirga lubbuun jiraachuu		

Barataa Shamsuu fi Obbo Mootummaa

Barataa kutaa 6^{ffaa} kan ta'e Shamsuu kan jedhamu ganama osoo barattooni hiriira irra jiranuu. bulchiinsi mana barumsaa keenya seeraan ala hojjachaa kan jiru ta'uu isaa, keessattuu dura taa'an mana barumsaa hanna fi rakkoo adda addaa raawwachaa kan jiru ta'uu isaa, itti gaafatamaa mana qabeenyaa waliin ta'uun qabeenyaa mana baru-msaa gurguuraa kan jiran ta'uu,. Dabalaaniis qarshii barattooni misooma

mana barumsaatiif walitti qaban dhuunfaa isatiin ittiin dhugaa kan jiru ta'uu isaa fi barattooni hundi kana hubatanii durabu'icha ari'uu akka qaban otuu dubbachaa jiruu itti gaafatamaa kochoo kan ta'an obbo Mootummaan gara waltajjiitti deemuun Shamsuun maal akka dubbachaa jiru gaafatan. Barataa Shamsuunis <<haasawan gochaa jira>> jechuun deebise. Obbo Mootummaanis <<Haasawa maalii?>> jedhanii gaafatan. Waanan barbaade yoon dubbadhe maaltu isin galche? Dubbachuun mirga dimokiraasii koo ti jechuudhaan deebise. Obbo Mootummaan deebii Shamsuutti waan aaraniif Shamsuu kaballaa fi dhiitichaan muddaa gara biiroo geessan. Biiroo keessattis balbala itti cufanii alangaan tuman.



Gilgaala - 5

**Bu'uura yaada barreeffama
armaan olii irratti hundaa'uun
gaaffilee armaan gadii deebisaa.**

1. Haasofni Shamsuun barattoota duratti godhe sirriidhaa? Maaliif?
2. Obbo Mootummaan Shamsuu reebuun isaanii sirriidhaa? Maaliif?
3. Obbo Mootummaanis ta'e shamsuun mirga namaa sarbanijiruu? Mirgoonni sarbaman maal fa'a akka ta'an ibsi.
4. Shamsuunis ta'e, obbo mootummaan mirgoota kabajuuf maal raawwach uutu irraa eeggama ture?

1.2.2. Barbaachisummaa Kabajamuu

Mirgoota Namummaa Fi Dimookiraasii



Fakkii 1.1. Fayyidaalee mirgoota namummaa fi dimokiraasii

- ***Fakkiin tokkoon tokkoon isaa ergaa maal dabarsa?***
- ***Yaada fakkii armaan olii irrat-ti hundaa'uun faayidaa mirgo-onni namummaa fi dimokraasi i dhala namaaf kennan tarreessi.***

Fedhiwwan dhalli namaa hundi qabu keessaa ijoon biyya rakkoon ykn garbummaan hin jirre keessaattii gammachuun jiraachuu dha. Akkas-umas hawwiin isaa biyya nageenyi, haqummaa fi wal-qixxummaan lamm-ilee keessatti dagaage arguu dha.

Kanaafuu, lammileen hacuuccaa dhabamsiisuuf, fincila,jeequmsa wkf akka filannoo dhumaatti ilaaluun akka itti hin fayyadamnee fi mirgi namummaa fi dimokiraasii akka kabajamu gochuun barbaachisaa dha. Gama birootiin mirgi namummaa fi dimokiraasii kabajame jechuun ilmi namaa haqummaa nageenya fi walqixxum maa hawwu argate jechuu ta,a. Hojm-aatni badaan haqummaa dabsuu fi loogiin ittiin raawwatu yoo qunnamu walaba ta'uun ifatti mormii dhagees-sisuun hoggansi mijataa hin taane akka dhabamsiifamu ykn akka sirraa'u gochuun ni danda'ama.

Mirgoonni namummaa fi dimokraasii baayyee barbaachisoo dh

Sababni isaas:


- Nagaan jiraachuuf
- Hojii kamiyyuu nagaan hojjechuuf
- Bulchiinsa haqummaa fi walqixxummaan diriire keessatti loogii fi hacuuccaa irraa walaba ta'anii jiraachuuf gargaara.

Gilgaala – 7

Gaaffii armaan gadii irratti mari'adhaa.

1. Mirgoonni namummaa fi dimook raasii dhala namaa hundaaf barbaachisaa dha kan jedhamuuf sababni maal? (Walitti dhufeenyen daree keessattis ta'e mooraa mana barnootaa keessatti hiriyoota keessanii fi barsiisota waliin akkasumas hojjettoota kan biroo waliin qabdan bu'uura gochuun deebisaa)

1.3 Garaagarummaa Saboota, Sablammootaafi Ummattoota Itoophiyaa Gidduutti Mul'atu.



Fakkii 1.2 Saboota, Sablammootaa fi Ummattoota Itoophiyaa

- **Fakkii armaan olii irraa maal hubattan?**
- **Itoophiyaan muuziyeemii afaanii fi sabootaa, sab-lammilee fi ummattootaa ti jechuun maal jechuu dha?**
- **Daree keessan keessatti mirga bara-ttota saba, sablammilee fi umma-ttootaa, aadaa, akkasum-as mirga hordoftoota amantaa adda addaa kabajuun bu'aa maal qaba jettee yaadda?**

Itoophiyaan biyya saboonnii fi sablammileen 80 ol ta'an keessa jiraatan yoo taatu sabooni kunis aadaa mataa isaanii kan qaban dha. Sabni kamiiyuu afaan, amantaa fi aadaa kan koo ti jedhee ittiin boonu qaba. Sabooni, sab-lammilee fi ummattoonni kun walitti makamuun waliin waan jiraataniif biyyattiin muuziyeemii saboot-aa, sab-lammilee fi ummattootaa jedhamti. Inni kunis lammileen kan ittiin boonan dha. Kanaaf, kenna adda uumamni nuuf kenne kana kunuunsinee eeguu qabna. Badhaadha adda ta'e kana kunuunsinee eeguuuf hundi keenya lolii fi walitti bu'iinsi akka hin uumamnee fi jaalalli akka dagaagu tattaafachuu qabna. Lolii fi walitti bu'iinsi akka hin uumamne walii yaaduu fi wal danda'uun muuxannoo guyyaa guyyaan itti fayyadamnu ta'uu qaba. Kunis kan nama boonsu yoo ta'u, lammileen hundii kanuma bee-

kanii tokkummaa, jaalala fi wal-qixxummaa irratti hundaa'e mirkaneessuu keessatti gahee isaanii bahuutu irraa eegama.

Saba, sab-lammileen fi ummattoonni Itoophiyaa tokkummaan wal-qixxummaa irratti hundaa'e jiraachuu isaa hubataniiru. Haaluma kanaan, fedhii fi jaalala isaanitiin sirna mootummaa federaalaa tokko hund-eessaniiru. Kanaafis, biyya nageenyii fi tasgabbiin amansiisaa ta'e itti mirkanaa'e, dinag-deen guddatee fi sirni dimokraasii itti dagaage ijaaruuf harka walqabatanii daandii guddinaa irra deemaa jiru.

Sirni mootummaa federaalawaa Itoophiyaa sirna mirga sabootaa, sablammilee fi ummatootaa guutummaa guututti fudhatu dha. Garaagarummaa jiru keessa tokkummaan jiraachuun isaa dhugaa ta'us wal-diddaa fi walitti bu'iinsi uumamullee sirlichi marii, wal-danda'uu fi karaa nagayaan adeemsifamuun fala akka argatan isaan dandeessisa. Dhimmoota mariidhan furmaata argachuu didán immoo qama seeraaf akka dhiyaatan gochu-un murtii sagalee caalmaan deggarame fudhachuun hojii irra akka oolu ni gargaara.


Gilgaala - 7

Gaaffilee armaan gadii deebisaa.

1. Garaagarummaan saboota, sablammilee fi ummatoota Itoophiyaa jidduutti mul'atu maal?
2. Walitti bu'iinsi akka hin uumamne, saba, sablammilee fi ummatootni Itoophiyaa maal gochuu qabu? Yoo uumame hoo maal gochuutu irraa eega ma?

1.4. Imaammata Biyya Alaa.

1.4.1. Hariiroo Itoophiyaan Biyyoota Olla Waliin Qabdu.



Fakkii 1.3 Itoophiyaa fi biyyoota ollaa

- Kaartaa kana yaadannoo kees-san irratti qopheessuun maqaa biyyoota ollaa Itoophiyaa barr-eessaa.**
- Walitti dhufeenyi Itoophiyaan biyyoota ollaa kana waliin qabdu yaada bu'uura maal irratti akka hundaa'e ibsi.**

Imaammata Itoophiyaan walitti dhufeenyi biyya alaa waliin qabdu keessaa inni tokko "Biyyoota ollaa akkasumas biyyoota Afrikaa kan biroo waliin tumsa dinagdee fi obbolummaa ummattootaa yeroo yeroon guddachaa deemu babal'isuu" dha. Walitti dhufeenyi Itoophiyaan biyyoota ollaa waliin qabdu yaada bu'uura ollummaa gaarii, obbolummaa fi nagaan waliin jiraachuu cimsuu irratti kan hundaa'e dha.

Haala kanaan Itoophiyaan walitti dhufeenyi biyyoota ollaa kan akka Jibuutii, Suudanii fi Keeniyaa waliin qabdu kan nama jajjabeessuu fi gud-dachaa deemaa kan jiru dha. Sararri bilbilaa Suudan waliin walqunnamsiisu diriire jira. Akkasumas, karaan biyyoota lamaan walqunnamssiisu hojjatameera. Bara dheeraaf ollaa taanee waliin jiraannus daandiin amansiisaan bonaa fi ganna wal-qunnamssiisu hin jiru ture. Daandii Gondar, Matammaa, Galaabaatii fi Gadaariif akka fakk-eenyaatti tuquun ni danda'ama. Biyyoonni lamaan waliin hojjachaa jiru.

Daandiin kun erga hoijetamee asitti daldalli biyyoota lamaan gidduutti gaggeeffamaa jiru cimaa jira. Walitti dhufeenyi daldala ummattoota daangaa irra jiran, Wal-ta'iinsii fi nageenya waliinii kkf. Hundi haala milkaa'een gaggeeffamaa jira.

Kanaaf, walitti dhufeenyi Sudaan waliin jiru haala gaarii irra jira. Inni kun immoo misooma, nageenya fi ijaarsa sirna dimokraasii keenyaaf gu-maacha olaanaa waan qabuuf xiyy-eeffannaan itti kennama.

Haala wal fakkaatuun Jibuutii waliinis walitti dhufeenyi cimaan hundeeffamee walitti dhufeenyi Kanaan biyyoonni lamaanuu fayyadamtoota ta'aa jiru. Akkuma beekamutti yeroo ammaa buufatni Jibuutii daldala biyya alaa Itoophiyaan gaggeessituuf balbala ijo dha. Isa kana waliin wal qabatee walitti dhufeenyi daldala, ummattootaa, siyaasaa fi nageenyaas babal'achaa fi cimaa jira.

Gilgaala – 9

Yaada armaan gadii irratti mari'adhaa.

1. Walitti dhufeenyi Itoophiyaan biyyoota ollaa waliin qabdu walqixxummaa fi obbolummaa irratti kan hunda'e dha yoo jedhamu maal jechuu keenya dha? Fakkeenya waliin ibsi.

1.4.2. Yaada Bu'uuraalee Imaammata Hariiroo Biyya Alaa Itoophiyaa



Fakkii 1.4 Yaada bu'uura hariiroo biyya alaa Itoophiyaa

- **Fakkiin 1.4 maal nu hubachiisa?**
- **Fakkiiwyan kana irraa bu'urri walitti dhufeenyi Itoophiyaa kan biyya alaa maal akka ta'e hubachuun ni danda'amaa? Hubbatanii jirtu yoo ta'e bu'uuraaleen walitti dhufeenyi biyya alaa ma-al fa'a dha?**

Yaadni bu'uura hariiroo biyya alaa Itoophiyaa misoomaa fi ijaarsa sirna dimookiraasiit. Biyya keenya keessatti misoomaa ariifachiisaa ummata fayyadu fiduu fi hiyyummaa irraa walaba ta'ee jirenya milkaa'aa akka jiraatu gochuun murteessaa dha. Faaydaan ijoon

ummata keenyaa hiyyummaa, dhuk-kubaa fi boodatti hafummaa dhabamsiisuu dha

Imaammanni walitti dhufeenyi biyya alaa ergama faaydaa biyyattii eegsiisu kan qabu dha. Kanaaf, imaammnni biyya alaa keenyas ergama Kanaan adda ta'e hin qabu. Faaydaa biyya keenyaa jechuun faaydaa ummataa jechuu dha. Faaydaan ummataa inni bu'uura fi murteessaa ta'e immoo misoomaa ariifachiisaa fiduu fi isuma kana irraa fayyadamaa ta'uu jechuu dha. Faaydaan ummataa sirni dimokiraasii fi bulchiinsi gaariin biyya keenya keessatti akka diriiru gochuu dha. Kanaaf, imamaammata walitti dhufeenyi biyya alaa faaydaa keenya kabajsiisu jechuun, imamaammata misoomaa ariifachiisaa fi ummata fayyadu mirkaneessuuf, biyya keenyatti dimokiraasiin akka lafa qabatu gochuuf gargaaru jechuu dha. Jalqabbii fi xumurri faaydaa biyya keenyaa misoomaa fi dimokiraasii dha. Imaammanni walitti dhufeenyi biyya alaa keenyas jalqabbii fi xumurri isaa misoomaa fi dimokraasii dha.

Gilgaala – 9

Gaaffii armaan gadii irratti mari'adhaa.

- Yaadni bu'uura imammata hariiroo biyya alaa Itoophiyaa misoomaa fi sirna dimokraasiit kan kan jedhame sababa maaliin?

Yaada Waliigala Boqonnichaa

Sirni dimokraasii sirna mootummaan fedhiummataatiin hundeeffame keessa jiru, hawaasni hoggantoota ofii isaatiin filateen kan ittiin bulu dha. Sirni dimokraasii biyya keenyaa saba, sablammii fi ummattootni akkasumas amantiwwan adda addaa keessa jiran kana keessatti hundi keenya wal kabajnee, wal dandeenyee fi wal jaalanee akka jiraannu kan gargaaru dha.

Sirni dimokraasii amaloota ittiin ibsamu heddu qaba. Amaloota kanneen keessaa ijoon:

- Walqixxummaan ummattootaa kabajamuu
- Hirmaannaan hawaasaa jiraachuu
- Aadaan waldanda'uu jiraachuu isaa ti.

Mirgoonni namummaa fi dimokraasii tokkummaa fi garaagarummaa ni qabu. Lamaan isaanii mirgoota bu'uuraa waan ta'aniif tokkummaa qabu. Garaagarummaan isaanii immoo mir-gnni namummaa nama waan taa-neef qofa mirgoota arganne yoo ta'an, mirgoonni dimokraasii garuu namni sirna dimokraatawaa keessa waan jiraatuuf mirgoota sirnicha irraa argatu ta'uu isaanii ti.

Migoonni namummaa fi dimokraasii ilma namaa hundaaf baay'ee barbachisoo dha. Sababni isaas nagaan jiraachuu, hojii kamiyyuu walabaan hojjechuu, bulchiinsa loogii fi hacuuccaa irraa walaba ta'een, walqixxummaa fi haqummaan hojjetanii buluun akka danda'amu kan gargaaran mirgoota kanneen waan ta'aniif dha.

Itoophiyaan biyya sabbootni, sablammilee fi ummattoonni 80 ol ta'an keessa jiraatan dha. Sabni, sablammii fi ummanni tokkoon tokkoon afaan, amantaa fi aadaa mataa isaa qaba. Kanaaf, Itoophiyaan biyya sabni, sablammii fi ummattnni kunniin aadaawwan mataa mataa isaanii qabatanii tokkummaan keessa jiraatan waan taateef moggaasa muuziyamii saba, sablammii fi ummattootaa jedhu argattee jirti. Saboonni, sablammilee fi ummattoonni Itoophiyaa garaagarummaa kana keessa tokkummaan jiraachuu isaa haalaan waan hubataniif fedha isaanii irratti hundaa'uun biyya fedaraalaa tokko hundeessanii jiru. Kanaan alattis biyya nageenyii fi tasgabbiin amansiisaan keessatti uumame, dinagdeedhaan kan badhaadhee fi sirni dimokraasii keessatti dagaage ijaaruuf harka wal qabatanii socho'aa jiru.

Imaammata Itoophiyaan walitti dhufeena biyya alaa waliin qabdu keessaa inni tokko tumsa dinagdee fi obbolummaa ummataa biyyoota ollaas ta'e biyyoota Afrikaa kan biroo waliin yeroo yeroon guddachaa deemu cimsuu dha. Waan kana ta'eef, Itoophiyaan imaammata kana haalaan hojii irra oolchaa jirti.

Yaada bu'uura hariiroo biyya alaa Itoophiyaa misoomaa fi ijaarsa sirna dimokraasii ti. Misooma ariifachiisaa ummanni itti fayyadamu fiduu fi hiyyummaa fi boodatti hafummaa jalaabasuun jirenyaa milkaa'aa akka jiraatu gochuun murteessaa dha. Ummata keenyaaf faaydaa ijoo kan ta'e hiyyummaa, dhukkubaa fi duubatti hafummaa dhabamsiisuu dha.

JECCHOOTA IJOO

Fedaraalawaa: Mootummaa giddu galeessa, mootummaa fedaraalaa fi tumsa naannoolee ofiin of bulchaniin hundeffame ta'uu isaa agarsiisu dha.

Dimokraasi: Jechuun sirna aangoon mootummaa harka ummataa jiru ta'ee ummanni bakka bu'oota isaa walabaan filatee kan ittiin bulu jechuu dha.

Saba, sab-lammii fi ummata: Jechuun ummata aadaa, barmaatilee xinsammuu fi amala walfakkaatu qabatanii naannoo tokko keessa waliin jiraatan.

Gaaffilee keessa deebii

I. Gaaffilee armaan gadii dubbisuun kan dogoggora ta'een "soba" kan sirrii ta'een "dhugaa "jechuun deebsi.

1. Imaammanni biyya alaa keenya ergama faaydaa biyyaa eegsisuu dha.
2. Sirni dimookraasii hojmaata loogii irraa walaba ta'ee fi haqummaa qabu saboota,sab-lammilee fi ummattoota gidduutti diriirsa..
3. Tokkummaan mirga namummaa fi dimokraasii lamaan isaanituu ilmi namaa umamaan kan argatu ta'uu isaanii ti.
4. Sirna dimookraasii sirna ummattooni fedhii isaanitiin hoggantoota filataniin bulan dha.
5. Garaagarummaa yaadaa fudhachuu jechuun garaagarummaan jiraachuu isaa amananii fudhachuu qofa osoo hin ta'in inni tokko yaada nama biroo kan hin fudhannellee yoo ta'e kabajuu akka qabu kan dabalatu dha.

II. Gaaffilee armaan gadii "A" jalatti eeraman kan "B" jala jiraniin walitti firoomsi

"A"

1. Yaada ofii walabaan ibsachuu, hiriira nagaa bahuu
2. Mirga lubbuun jiraachuu, nageenya qaamaa , ollummaa gaarii
3. Obbolummaa
4. Misoomaa fi ijaarsa sirna dimokraasii

"B"

- A. Mirga namummaa
- B. Kaayyoo Imaammata biyya alaa
- C. Mirgoota dimokraasii
- D. Yaada bu'uura imaammata biyya alaa
- E. Saba, sablammilee fi ummattoota

III . Himoota armaan gadii dubbisuun iddo duuwwaatti jecha ykn gaalee sirrii ta'e guutaa

1. Biyya teenya biyya garaagarummaan afaanii, amantii fi aadaa jirutti hundi keenya wal kabajnee wal dandeenyee fi jaalalaan akka jiraannu kan nu gargaaru dha.
2. _____ fi _____ n yaada bu'uura imaammata biyya alaa Itoophiyaa ti

IV. Gaaffilee armaan gadii dubbisuun deebii sirrii ta'e filadhaa

1. Amala bu'uura sirna dimokraasii kan ta'e isa kam?
 - A. Wal danda'uu
 - B. Walqixxummaa
 - C. Hirmaanna ummataa
 - D. Hunduu debí dha.
2. Sirna dimookraasii keessatti ummanni akkamitti hirmaachuu danda'a?
 - A. filuu fi filatamuun
 - B. Walgahii adda addaa irratti hirmaachuu
 - C. waldaalee hawaasummaa keessatti miseensa ta'uu
 - D. Hunduu deebii dha.
3. Imaammaata biyya alaa kan faayidaa biyya keenyaa eegsisu jechuun maal jechuu dha?
 - A Imaammata misooma ariifachiisaa biyya keenyatti fidu jechuu dha.
 - B. Imaammata ijaarsi sirna dimokraasii biyya keenya keessatti akaa lafa qabatu gargaaru jechuu dha.
 - C. Imaammata ummanni kallattiin bu'aa irraa argatu.
 - D. Hundu debí dha.

V. Gaaffilee armaan gaditiif deebii gabaabaa kennaa

1. Garaagarummaa yaadaa fudhachuu fi fudhatanii obsaan waliin jiraachuu jechuun maal jechuu dha? Faayidaan isaa hoo maal? Fakkeenyaan ibsaa.
2. Sirna dimookraasii keessattuu biyyoota akka Itoophiyaatiif baay'ee barbaachisaa dha kan jedhameef maaliif? Fakkeenyaan addeessaa.

BOQONNAA LAMA

OLAANTUMMAA SEERAA

kaayyoolee boqonnichaa. Boqonnaa kana erga barattee booda:

- *Barbaachisummaa heeraa ni hubatta.*
- *Seera kabajuu fi kabajsiisuun bu'aa inni lammileef kennu ni hubatta.*
- *Faayidaa olaantummaa ummataa ni qalbeeffatta.*
- *Barbaachisummaa daangaa aangoo filatamtoota ummataa fi abbotii aangoo caasaa mootummaa irratti kaa'amuu qabu ni hubatta.*

2.1 Heerri Maal?

Barnoota kutaa 5^{ffaa} keessatti waayee mootummaa feederaalaa fi naannoolee barachuu keessan ni yaadattu. Waayee heera mootumma feederaalaa fi heera mootummaa naannoolee maal akka barattanii turtan ni yaadattuu?

Heerri mootummaa seera olaanaa biyya tokkoo yoo ta'u sanada kaayyooleen ijoon siyaasaa, hawaasummaa fi dina-

gdee biyya tokkoo daangeffamanii kan ittiin ibsaman dha. Heerri mootummaa lammileen mirga isaaniitti akka fayyadamanii fi dirqama isaaniis akka bahan ni gargaara.

Heerri mootummaa feederaalaa sanada sadarkaa biyyolessaatti dhimmoota ijoo akka siyaasaa, dinagdee fi hawaasummaa ilaallatu dha. Heerri mootummoota naannoolee immoo sanadoota imaammataa fi tarsiimoo kaayyoolee ofin of bulchuu, dinagdee fi hawaasummaa naannichaa kan of keessatti qabate dha.

Gilgaala -1

Gaaffilee armaan gadii deebisaa.

1. Heera jechuun maal jechuu dha?
2. Qabiyyeewan heerri mootummaa feederaalaa of keessatti qabate maal maal irratti xiyyeffatu?

2.1.1 Barbaachisummaa Heera Mootummoota Naannoolee

- *Naannoleen heera mataa isaanii qopheeffachuun maaliif barbaachisee?*

Heerri naannoolee, haala qabatamaa naannoisaaniitiin naannooleen kan ittiin hogganamanii fi ummata kan ittiin bulchan dha. Waan kana ta'eef, haalotni heerri naannoolee itti barbaachisu keessaa isaan ijoo ta'an kan armaan gadii ti.

- ***Aangoo fi mirga saba, sablam-mootaa fi ummattootaa ni mirkaneessa, dhugoomsa.***
- ***Haalota mirga ofiin of bulchuu ni mijesssa.***
- ***Haala qabatamaa naanno irratti hundaa'uun seera baafachuu ni dandeessisa.***
- ***Wal qixxummaa saalaa ,aadaa fi afaanii ni mirkaneessa.***

Gilgaala – 2

Gaafilee armaan gadii deebisaa.

1. Heera mootummaa naanno jechuun maal jechuu dha?
2. Sababoota barbaachisummaa heera mootummaa naannoolee cimsan keessaa sadieeruun addeessaa.

Hojii Garee

Heera mootummaa feederaalaa fi mootumma naanno keetii dubbisuun yaada armaan gadii irratti gabaasa gabaabaa dareef dhiyeessaa (Gareen tokkoon tokkoon isaa heera mootummaa federaalaa fi naanno yaa dubbisu.)

1. Dhimmoota ijoo heerri mootummaa irratti xiyyeffate tarreessa.
2. Dhimmoota heera mootummaa naannoolee irratti xiyyeffate eeraa.
3. Tokkummaa fi garaagarummaan heera mootummaa feederaalaa fi naanno maal?
4. Barbaachisummaan heera mootummaa naanno maal?

2.1.2 Gahee Damboonnifi Aadaa Naanno, Seera Kabajsiisuu Keessatti Qaban

- ***Jiraachuun damboota aadaa hawaasa naanno maaliif barbaachisa ?***

Namoonni hojii isaanii guyyaa guyyaan yeroo hojetan rakkoo isaanii kamiyyuu moo'achuuf dhaabbilee hawaasummaa adda addaa hundeessuun socho'aa turanii jiru. Ammas kanuma gochaa jiru. Fakkeenyaafrakkoolee dinagdee furuuf dhaabbilee akka iqquibii, iddirii, qusannoo fi afooshaatti fayyadamu. Akkasumas, dhaabbilee amantii hundeessuun dhimma itti bahu. Dhimmoonni kun hundi dambootaa fi qajeelfamoota ittiin hogganaman kan qaban yoo ta'u ,seerota sadarkaa naannoottti bahan cimsuu fi seera kabajsiisuu keessatti gaheen isaanii olaanaa dha.

Gilgaala – 3**Gaaffilee armaan gadii irratti mari'adhaa.**

1. Jiraachuun damboota hawa-asaa naannoo bu'aa maal qaba?
2. Damboonni aadaa naannoo seera kabajsiisuu keessatti gahee maal qabu?

2.1.3 Seera Kabajsiisuu Dhab-amuun Miidhaa Inni Lammii Irraan Geessisu

- Seera kabajsiisuu dhabuun miid-haa maal qaba jettu?

Seera maqaaf qofa qophaa'e

Mana barnoota sadarkaa tokkoffaa "Taariik" jedhaamu keessaatti barattooni kutaa 6^{ffaa} jalqaba wagga irratti, barsiisa daree isaanii maqaa waamu waliin ta'uun seera ittiin bulmaata daree isaanii baafatan. Hundi isaanii seera baafataniin akka bulan walii galtee irra gahan. Seerawan daree isaaniif baafatan keessaa yeroon dareetti argamnuu fi barumsa naamusaan hordofuu kan jedhu keessatti argama. Seera kanas akka kabajsiisuu kan filatame Miinaas dha. Miinaas seerota dareen baafate hunda kan kabaju yoo ta'u, haala wal fakkaatuun barattooni biroo akka kabajan gochuu irratti tattaaffiin inni godhu baay'ee gadaanaa dha. Kanaafuu, Miinaas ba-

rataa naamusa kabaju ta'us barattooni biroo naamusa akka kabajan gochuu waan hin dandeenyeef adeemsi baruu barsiisuu tasgabbiin gagge-effamuu hin dandeenye. Barattooni waan jeeqaniif fedhiin barattooni hedduun barnoota irratti qaban gadi bu'aa deemuu danda'eera.

Gilgaala 4**Yaada armaan olii irratti hundaa'uun gaaffilee armaan gadii deebisaa.**

1. Seerri baafatan hojii irra oolu dhabuu isaatiif kan itti gafatamu eenyuu?
2. Dambiin itti fufiinsaan hojii irra akka oolu barsiisaan itti gaafatamaa daree ta'e maal gochuu qaba ture?
3. Museen daree osoo adeemsa sirna dimokraasiitiin filatamee jira ta'ee hojii irra oolmaan seera kanaa maal ta'uun danda'a ture?

Seera kabajuu jechuun lammii kamiiyuu seeraaf abboomamuu fi hogganamuu isaanii agarsisa. Seera kabajsiisuu kan jedhamu immoo seerri bahe namoota kan biroon yoo cabu yaada karaa seera qabeessa ta'een akka hin diigamne ittisuu of keessaa qaba. Seerri hin jiru ykn ni caba taanaan nageenyaan barachuun hin danda'amu. Nageenyi waan boora'uuf

akka fedhanitti nagaan bahanii deebi'uun hindanda'amu. Namoonni nagahaan jiraachuu babaadanis abbaa humnaatiin miidhaa guddaan irra gahuu ni danda'a.

Gilgaala -5

**Gaaffilee armaan gadii
dubbisuun deebii sirriidha
jettan kennaa.**

1. Hojjetaan mana barumsaa barfaatee dhufu , barattootaan barfaachuu hin qaban oo jedhee
2. Hojjataan qulqullina mana barumsaatiif hin quuqamne tokko barattootaan qulqullinni mana barumsaa yaa eegamu osoo jedhee,

**Seera kabajsiisuuf dursanii
ofiif seera kabajuun
barbaachisaa dha.**

Gilgaala - 6

**Gaaffilee aramaan gadii irratti
gareen mari'adhaa.**

1. Seerri yoo kabajamuu baate rakkoo akkamiitu dhufuu danda'a?
2. Seera kabajuu fi kabajsiisuun gahee eenyuu ti?

2.2. Naamusa

2.2.1.Namusni Maal?



*Fakkii 2.1 Naamusa Qajeelfama
jirenya keenyaa haa gonn!*

- **Fakkii armaan olii irraa maal maal hubattan**
- **Fakkii armaan olii keessatti hojiwwan maaltu hojjetamaa jira?**
- **Hojiwwan hubattan kanniin gaarii dha moo badaa dha?**
- **Isin hoo hojii isa kam keessatti osoo hirmaattanii itti gammadduu?**

Bu'aa naamusa gaarii

Misginnaan barataa kutaa 6ffaa ti. Amala gaarii kan qabu ta'uun isaa maatiisaatiin, ollaa, mana barumsaa isaatiin ragaan bahameefii jira. Misginnaan, amala gaarii qabaachuu qofaan osoo hin ta'in barumsa isaatiinis cimaa waan ta'eef hiriyootaa fi barsiisota isaa birattis baay'ee jaalatamaa dha.

Seeraa fi naamusa mana barumsaa kabajuunis baay'ee beekamaa dha. kanuma irraa ka'uun namoota hedduu biratti maqaan " Ilma beekaa " jedhu kennameefii jira. Yeroo barnootaan ala gumiiwan adda addaa keessatti ni hirmaata. Keessattuu gumii lammummaa fi amala gaarii keessatti gahee olaanaa qaba. Hirmaanna isaa kanaanis allama badhaasa argatee jira. Barumsa isaatiinis ta'e naamusa isaatiin ragaan kan bahameef waan ta'eef barattoota mana barumsaa sana keessa 1ffaa ta'ee harkaa dura bu'aa mana barumsaatiin badhaasa addaa argateera.

Misiginnaan amala fi barumsa isaatiin bu'a-qabeessa waan ta'eef <<Ilma jechuun kan akka Misginnaa ti>> jechuun barataa hawaasni akka fakkeenyatti fudhatu ta'uu danda'ee jira.

Gilgaala -7

Yaada armaan olii irratti hundaa'uun gaaffilee armaan gadii deebissa.

1. Ciminaa fi naamusa gaari Misginnaan horateef een-yutuu gumaacha qaba jett-anni yaaddu?
2. Naamusa gaarii qabaachuu bu'aa maal argam-siisa?

Amalli gaariin hojii raawwatame tokko gaarii dha ykn badaa dha jechuun kan ittiin safaramu dha. Xiyyeffanno on amala gaarii namni tokko naamusa gaarii akka horatu taasisuu dha. Amala gaarii kan jedhamus amala bu'aa qabuu fi hawaasa keessatti fudhatama qabu dha. Amala gadhee kan jedhamu immoo amala yaraa ykn badaa hawaasa keessaattii fudhatma hin qabne jechuu dha. Walumaagalatti amalli hojii gaarii ykn badaan kan ittiin safaramu dha jechuun ni danda'ama.

Gilgaala -8

Gocha armaan gadii hubachuun naamusa gaarii yoo ta'e yaada naamusa gaarii jedhu jalatti mallattoo (↙), akkasumas gocha gaarii yoo ta'u baate yaada naamusa gaarii hin taane jedhuu jalatti mallattoo (↙) tarreessuun addaan baasi.

Lakk	Akaakuu amalaa	Fakkeenya amala gaarii	Fakkee-nya amala badaa
1	Seera daree fi mana barumsaa kabajuu		
2	Humna dhabeeyyi gargaaruu		
3	Gocha hawaasa keessatti fudhatama hin qabne raawwachuu		
4	Namootaan walitti bu'uu		
5	Abbaa fi haadha akkasumas angafa ofii kabajuu dhiisuu		
6	Maanguddoo tuffachuu		
7	Iccitii eeguu		
8	Iftoominaa fi amantummaa dhabuu		
9	Nama dhugaa deggaru ta'uu		
10	Sobuu		
11	Nama gowwomsuu		

2.2.2. Naamusa Mana Barnootaa Keessatti Barataa Irraa Eeggamu.

- **Naamusni mana barnootaa keessatti barataa irraa eeggamu maal ?**
- **Mana barnootaa keessatti barattooni naamusa gaarii akka qabaatan gochuun maaliif barbaachise?**

Naamusa barataa qaruun kan eegaluu maatii irraa dha. Daa'ima naamusa gaariin qarame guddisuu keessatti gaheen maatii olaanaa dha. Daa'imman gocha gadhee kimirraayyuu walaba ta'anii, amala gaarii horatanii akka guddatan gochuu keessattis itti gaaf-

atatumummaa olaanaa qabu. Manneen barnootaa haala maatiidhaan walqixa ta'een lammilee naamusa gaarii qaban horachuuf itti gaafatatummaan kennameefii jira. Manneen barnootaa adeemsa baruu fi barsiisuu waliin amala barattoota sirreessuu irratti gahee olaanaa ta'e qabu. Barattooni naamusa gaarii qabaatanii akka guddatan gochuuf manneen barnootaa xiyyeffannaa itti kennanii socho'uun irraa eegama.

Manneen barnootaa keessatti mul'istoonti naamusa gaarii barattoota irraa eegamu heddu dha. kanneen keessa kan armaan gadii eruun ni danda'ama.

A) **Seeraa fi dambii mana barnootaa fi daree keessaa kabajuu.**

Hojmaata adeemsa baruu- barsiisuu bu'aa qabeessa taasisu diriirsuun barbaachisa dha. Sirna kana hojii irra oolchuuf seeronnii fi damboonni manneen barnootaa keessatti qophaa'an tooftaa ijoo dha. Barattooni immoo dambii manni barnootaa baafate kanaaf abboomamuu qabu.

Seeraa fi dambilee manni barnootaa baafateen alatti barattoonis barsiisota waliin mari'atanii dambii hojii baafachuu ni danda'u. Kanaafuu, seera mana barnootaa fi dambilee dareen baafatan kabajuun naamusa gaarii barattoota irraa eegamu dha

B) Qabeenya mana barnootaa fi daree keessaa kunuunsuu

Qabeenyi mana barnootaa fi daree barnootaa keessatti argamu baasii ummata irraa walitti qabameen kan bitame dha. Qabeenyi kunis horii guddaan kan itti bahe waan ta'eef salphumatti kan bakka bu'u miti. Kanaaf, yeroo dheeraaf tajaajila hawaasaaf kennuu qabu jedhamee abdatama. Yeroo dheeraaf tajaajila akka kennaniif immoo kunuunsi godhamuufii qaba. Kanaafuu, barattooni hundi qabeenyi kun biyyaa fi isaaniifis kan tajaajilu ta'u isaa hubachuun kunuunsutu irraa eegama. Kun yoo ta'e qofa qabeenyi kun dhaloota dhufuuf tajaajiluu kan danda'u.

C) Qulqullinaa fi miidhagina mana barnootaa fi daree barnootaa eeguu.

Namuusa gaarii barattoota irraa eegamu keessaa inni biroo qulqullinaa fi miidhagina mana barnootaa fi daree eeguu dha. Kaayyoon kun akka galma gahu immoo barattooni hundi daree isaanii qulqulleessuu, biqiltoota mooraa mana barnootichaa keessatti dhababaman kunuunsuu, miidhaan akka irra hin geenye irraa ittisuu fi miidhaan yoo irra gahes bulchiinsa mana barnootichaa beeksisu qabu. Kanas jechuun manneen barnootaa iddo gammachuun itti baratan akka ta'aan haala mijessu jechuu

dha. Kun yoo ta'e immoo manneen barnootaa akka iddo barnoonni itti kennamuu qofa osoo hin ta'in akka iddo bashannanaattis ta'uun tajaajilu.

D) Hawaasa mana barnootaa kabajuu

Galma gahiinsa adeemsa baruu fi barsiisuu keessatti hawaasni mana barnootaa hundi gahee mataa isaanii qabu. Kanaafuu, namoota hojii manneen barnootaa keessatti gahee qaban hunda kabajuun naamusa gaarii barattoota irraa eegamudha.

Gilgaala – 9

Gaaffilee armaan gadii irratti mari'adhaa.

1. Teessoo fi minjaalli itti barachaa jirtan of eeggannaagochuu dhiisuudhaan osoo cabee barattooni bara dhufu gara kutaa kanaatti seenan maal irratti baratu? Mari'adhaatoo yaada furmaata jettan kaa'aa?
2. Mana barnootaa keessatti naamusni barattoota irraa eegamu maal maal?
3. Barattooni naamusgaarii akka horatan maaliif barbaadama?
4. Dhaloota naamusgaarii qabu ijaaruu keessatti gahseen maatii maal ta'uun danda'a jettu?

2.3. Daangaa Aangoo

2.3.1. Daangaa Aangoo Jechuun Maal Jechuu Dha ?

- Nama filannoodhaan hogganaa aanaa ykn gandaa ta'ee aangoo isaaf kennameen ala hojjate jedhamee himatame beektuu?**
- Namoota gocha akka kanaa irattii hirmaatan tarkaanffiin akkamii irratti fudhatamuu qaba jettu?**

Aangoon daangaa yoo hin qabaatiin namoonni akka fedhii isaanitti waan hojjataniif seerri ni bada.

Daangaan aangoo hojii tokko hojjachuuf jecha aangoo seeraan kenname jechuu dha. Aangoo seeraan kennameen ala hojjachuun, ummata miidhuun, nama gaafachiisa. Hojiin haala kanaan raawwatames fudhatama hin qabu. Filatamtooni ykn namoonni waajjira mootummaa keessatti aangoon seeraan daangeffamee kennameefii jira. Aangoo seeraan kennameef kana iddo fi yeroo barbaachisaa ta'etti haaalan itti fayyadamee hojjechuu qaba. Inni kun daangaa aangoo jedhama. Daangaa aangoo kennameefiin ala hojjechuun hin heyyamamuuf. Namoonni aangoo kennameefiin ala kan hojjetan yoo ta'e hojmaanni seera qabeessa ta'e hin jiru jechuu dha. Yoo kana ta'u baate immoo namoonni akkuma fedhii isaaniitti hojjechuun hawaasa miidhuu danda'u jechuu dha.

Fakkeenyaaf, muuseen daree naamusa eegsisiu irra darbee hojii hin heyyamamneef akkuma barbaadee kan hojjatu yoo ta'e, daree keessatti nageenyi ni dhabama; Barattoonnis tasgaabbaa'anii barachuu hin danda'an.

Gigaala – 10

Gaaffilee armaan gadii gareen irratti mari'adhaa.

1. Daangaan aangoo jiraachuun maalif barbaachisa?
2. Daangaan aangoo hin jiru yoo ta'e rakkina maal fiduu danda'a?

2.3.2. Barbaachisummaa Aangoo Filatamtoota Ummataaf Daangessuu Oftuulummaa Obbo Mulaatuu

Obbo Muulaatuun dura taa'aa gandaan ummataan filataman dha. Garuu erga aangoo argatanii booda amalli isaanii jijiiramaa dhufeera. Aangoo seeraan isaanii kenname akkuma barbaadanitti itti fayyadamuu egalaniiru. Akkasumas, loogii fi aantummaan hojjatu jedhamanii shakkamu. Fakkeenyaaf, seeraan ala namoota mana gandaa kireeffatan sababa qubsaa fi murtii mana murtii hawaasummaa malee keessaa baasuun firoottan isaanitiif kennan. Kanaan alas aangoo kennameefiin ala darbuun lafa jireenyaa liiziidhaan gurguruuf qophaa'e faaydaa adda addaa fudhachuun gurguranii jiru. Akka ijaaranis heyyamanii jiru.

Kana irraa kan ka'e ummanni isaan filate komii kaasuu jalqabee jira. Haa ta'u malee, namni kamuu dhimmicha ifa baasuun komachuu fi tarkaanfii fudhachuu hin dandeenye. Guyyaa tokko hawaasni gandaal walgalhii dhimma biraatiif gaggeesse irratti namni iccitii obbo Mulaatuu beeku tokko rakkoo obbo Mulaatuun uumaa jiran tokko tokkoon ibsuudhaan obbo Mulaatuun aangoo irraa akka bu'anii fi badii uumanifiis seeraan akka itti gaafataman yaada dhiyeesse. Hawaasni gandichaas kanuma waan beekuuf yaada ka'e kan deggaran ta'uu isaanii harka rukutuun ibsan. Haa ta'u malee, obbo Mulaatuun yaada kana fudhachuu diduun aangoo isaanis kan gadi hin lakkisne ta'uu ibsan.

1. Wanti obbo Mulaatuun seeraan ala hojjatan maali?
2. Namtichi gaaffii yoo dhiyessu ummanni maaliif harka rukute isinitti fakkaata?
3. Obbo Mulaatuun aangoo gadi hin lakkisu waan jedhaniif irra turuu ni danda'uu?
4. Dhimmoonni akka kanaa naannoo keessanitti uumamuu isaanii dhageessanii beektuu? Bu'aan isaa hoo maal ta' e?

Filatamtoota ummataa jechuun namoota hawaasni akka isa hogganan of keessaa kan filate ta'ee filatamtooni kunis mirgoota hawaasni seeraan qabu

akka kabajsiisaniif kan filatamaan dha.

Filatamtoota ummataa irratti daangaa aangoo kaa'uun kan barbaachise

- ***Mirgoonni hawaasaa akka kabajamaniif fi seerri akka hin cabneef.***
- ***Inni tokko fayyadamee inni kuun akka hin miidhamneef***
- ***Amaanaa hawaasaa eegsisuuf.***
- ***Adeemsa gocha loogii ittisuuf.***
- ***Seera dhabeessummaa to'achuuf***
- ***Badiin yoo uumamu adabuuf***

Gilgaala - 11

Gaaffilee armaan gadii irratti mari'adhaa.

1. Filatamtoota ummataaf daangaan aangoo maaliif akka barbaachisu tarreessuun irratti mari'adhaa.

2.4 Iccitii

- ***Namni biroo iccitii isinitti himee beekaa?***
- ***Iccitii namni biroo isinitti hime dabarsitanii nama biraatti himtanii beektuu?***
- ***Iccitii nama tokkoo dabarsitanii nama biraatti himuu keessaniin rakkoon uummame jiraa?***

Iccitii jechuun dhimma namoota lama jidduutti sadarkaa maatiitti ykn hir-

iyaa fi kkf gidduutti keessumaa'uu namoota kaayyoolee murtaa'aa qabachuun wal gahan biratti eegamee gara nama biroo osoo hin darbin qabamu jechuu dha.

2.4.1 Iccitii Hiriya

- ***Yaada iccitii hiriya jedhu irraa maal hubattu?***
- ***Hiriya kee waliin iccitii mari'-attee beektaa?***
- ***Fakeenyaaf maal maaltu iccitii jedhamuu danda'a?***

Iccitii hiriya jechuun namoota lamaa fi ol ykn hiriyoota lamaa fi ol ta'an jidduutti qofa waan dhokatee hafuu qabu jechuu dha. Haala kanaan, iccitii tokko nama biraatti dabarsanii himuun sirrii miti. Sababni isaas namoota ykn garee sana irraatti rakkina fiduu waan danda'uuf. Iccitii hiriya jechuun dhi-irsaa fi niitii jidduutti, hiriyoota daree jidduutti ,iddoo hojiitti fi k.k.f biratti uumamuu ni danda'a. Namoonni tokko tokko iccitii qabachuu yoo danda'an isaan kuun immoo iccitii eeguu kan hin dandeenye dha. Namoonni akka kanaa kun jaalala hawaasaa fi maatii hin argatan .Hawaasa biratti kan tuffatamanii fi kan jibbaman ta'u. Namni cimaa ta'e tokko hiriya isaatiin yoo wal loles iccitii dura ture baasuu hin qabu. Sababni isaas, iccitiin kun yoo ba'e isaan keessaa nama tokko irratti ykn lamaanuu irratti ykn

namoota kan biroo irratti rakkoo qaqqabsisuu waan danda'uuf.


Gilgaala - 12

Gaaffilee armaan gadii deebisaa.

1. Iccitiin hiriya maal?
2. Iccitii hiriya ti kan jettan keessaa fakkeenya kennaan.
3. Iccitiin hiriya osoo bahee rakkoo maal fiduu dan-da'a?
4. Kana dura iccitii hiriya keetii dabarsitee kan biraatti himtee beektaa? Rakkoo maal fidee turee?

2.5 Malaammaltummaa

2.5.1 Maalummaa malaammaltummaa



Fakki 2.2 Malaammaltummaan olaantummaan seera akka hin kabajamne taasisa

- ***Fakkii armaan olii keessatti namoonni maal raawwachaa jiru?***

- ***Maaliif iccitiin ykn dhoksaan hojjatu?***
- ***Gochi isaanii kun hawaasa kan miidhu yoo ta'e isin akka lammii tokkootti maal gochuu qabdu?***

Barumsa jechuun akkanatti malee !

Barattuu kutaa 7ffaa kan taate Lub-aabaan intaala sooreessaa ti. Haa ta'u malee, barumsa isheetiin baay'ee laaf-tuu dha.

Ascaannaqaqii immoo barsiisaa her-reegaa fi itti gaafatamaa daree Lub-aabaan keessatti barattuu ti.

Barsiisaan kun warra Lubaabaa haal-an beeka.Kanaaf,maatii Lubaabaa waamsisuun barumsa isheetiin laaf-tuu ta'u ishee fi deggarsi adda ta'e kan ishee barbaachisu ta'u ibseef.

Warri Lubaabaatis Ascaannaqaqii Lub-aabaa akka qayyabachiisuu fi dad-haabbii isaatiifis qarshii gaarii kan kaffalaniif ta'u ibsan. Haaluma kan-an, Ascannaqaqii Lubaabaa qayy-abachisuu eegale. Qarshiin kunis mindaa isaa idilee kan caalu waan ta'eef jireenyi isaas fooyya'aa deeme. Barsiisaa Ascannaqaqii Lubaabaan qabxii gaarii akka argattu tattaaffii godhullee Lubaabaan barumsaan baay'ee dad-haabduu waan taateef jijiirama fiduu hin dandeenye. Haala knaan Lub-aabaan bu'aa gaarii fiduu akka hin dandeeye Ascannaqaqii waan hubateef waarri Lubaabaa qarshii isaaf kaffalan

irraa kutuu danda'u jedhee yaaduun qormaata iccitiin baasee Lubaabaan akka Shaakaltu taasise. Sababa kana irraa kan ka'e bu'aan qormaata Lubaabaa kan barattoota hundaa caale. Dhimma kana barattoonnii fi barsiisonni mana barnootichaa waan shakkaniif bulchiinsa mana barnootaatti iyyatan. Manni barnootichaa dhimma kana yoo qulqulleeffatu harki Ascaannaqaqii akka keessa jiru bee-kame. Amma dhimmi barsiisaa Ascaannaqaqii koree naamusa mana barnootichaatiin ilaallamaa jira.

Gilgaala 13

Yaada armaan olii irratti hunda'uun gaaffilee armaan gadii deebisaa.

1. Barsiisaa Ascaannaqaqii malaammaltummaa hojjataniiru moo hin hojenne?
2. Barsiisaan kun malaam-maltummaa akkamii raawwatani?
3. Barsiisaa Ascaannaqaqii yakka raawwataniif ada-bbii akkamiitu isaanii kennamii naha?

Malaammltummaan,bulchiinsa gaarii biyya tokkoo kan faallessu ,guddina dinagdee fi dimokraasii kan gufachiisu akkasumas namoota waliin jiraatanii fi waliin hojjetan jidduutti wal shakkiin akka jiraatu kan taasisuu dha.

Malaammaltummaan amantaa dhabuu, qarshiin bitamuu, waadaa ykn amaanaa nyaachuu, haamilee dhabuu fi loogin, matta'aan, hojjachu fi amanummaa fi dhugaa qabee-ssummaa hir'isuu dha.

Gilgaala -14

Gaaffilee armaan gadii gareen irratti mari'adhaa.

1. Malaammaltummaan maal?
Akkamiin ibsama?
2. Malaammaltummaan miidhaa maal fiduu danda'a?

2.5.2 Gochalee Malaammaltummaa Filatamtoota Ummataa Fi Qondaltota Mootummaan Raawwata-muu Danda'an

- *Malaammaltummaan abbootii aangoo amaanaa ummataa dagan-tiin akkamitti raawwatuu danda'u?*
- *Aangoo ummataan nuuf kennname haala kamiin itti fayyadamuu qabanaa?*

Aangoon filannoo ummataatiin, muudama siyaasatiin ykn sadarkaa barnootaa fi muuxanno hojiitiin argamu ni danda'a. Aangoon filannoong argamu filatamtoota ummataa yammuu jedhamu, muudama siyaasaa, sadarkaa barnootaa fi muuxannoong kan argamu immoo abbootii aangoo mootummaa jechuun waamamu.

Abbaan aangoo kamiyyuu(filatamtootasta'an kan ummataa) itti gaafat-

amummaa fi dirqama kennameef bahuun ala seeraa fi haala qajeelfama bah-eetiin hojjachuutu irraa eegama. Haala kanaan ganda irraa kaasee hanga sadarkaa bakka bu'oota ummataatti namoonni hojjatan aangoo isaanitiin ala yoo raawwatan seeraan itti gaafatamu. Malaammaltummaa filatamtootaan ykn abbootii aangoo mootummaatiin raawwataamuu danda'an keessaa isaan armaan gadii tuquun ni danda'ama.

- *Matta'aa, faaydaa seerri hin heyy-amneef fudhachuu fi faayidaa ofii irraatti hundaa'uun seeraan ala namoota faayyaduu. Karaa barbachisaa hin taaneen nama fayyaduu ykn miidhuu*
- *Qabeenya ummataa ykn mootummaa faayida dhuunfaatiif oolchuu.*
- *Aangoo mootummaatti fayyadamuu, firaan ykn aanteen hojjachu.*
- *Namoota dirqisiisuun faayidaa dhuunfaatiif haala mijeffachuu.*
- *Iccitii eeguu dhiisuu*
- *Qabeenya ummataa irratti hann-aa fi saamicha raawwachuu*
- *Fira fi aantummaa irraatti hundaa'uun hojjachu .*

Gilgaala – 15

Gaaffilee armaan gadii deebisaa

1. Garaagarummaan filatamtootaa fi abbootii aangoo mootummaa maal?
2. Malaammaltummaa filatamtootaa fi abbootii aangoo mootummaatiin raawwata-muu danda'an keessaa afur eeruun ibsaa.

Yaada xumura boqonnichaa.

Heerri seerota biyyaa keessaa isa olaanaa yoo ta'u, keessattuu sanada dhimmoota ijoon biyyaa kan akka dhimoota siyaaasaa, dinagdee fi hawa-asummaa of keessatti hammate dha.. Heerri mootummoota naannoolee immoo seera olaanaa naannooleen ittiin of bulchan dha.

Seera kabajuu jechuun lammileen hundi seeraan kan bulan ta'uu kan agarsiisu yoo ta'u, seera kabjsiisuun immoo seerri namoota kan biroon yeroo cabu karaa seera qabeessa ta'een irraa ittisuu agarsiisa.

Dhimmoonni hunduu daangaa yoo hin qabaatin seerri ni caba. Akkasumas, hoggantoonni sadarkaa hunda irratti argaman aangoo seeraan kennameef irratti hundaa'uun hojjachuuf aangoo ni qabu. Filatamtooni ummataa fi abbootiin aangoo mootummaa daangaa kennameef kana keessatti akka hojjetan kan barbaadame sababa kanaan dha.

Naamusni ,gochiwwan raawwatan gaa-rii ykn badaa ta'uun isaanii kan ittiin safaramu dha. Waan gaarii fi badaa,

dhugaa fi dhara, sirrii kan ta'ee fi sirrii kan hin taane irraa adda baasuuf dirqama kan itti fudhannu dha. Haaluma kanaan sadarkaa manneen barnootaatti naamusni barattoonni itti fayyadamuu qaban ni jira.

Iccitii hiriya jechuun dhimma namota (hiriyoota) lamaa fi ol jidduutti amaanaadhaan eegamee ture jechuu dha. Iccitichi kun yoo bahe rakkoon nama tokko irra ykn namoota lamaanuu irratti uumamuu waan danda'uuf eegamee turuu qaba.

Malaammaltummaan haala bulchiinsa gaarii mootummaa biyya tokkoo kan jeequ, guddina dinagdee fi dirmokraasii biyyaa kan gufachiisu, sonawan waliin jiraachuu fi waliin hojjechuu kan balleessu dha. Malaammaltummaan filatamtoota ummataa fi abbootii aangoo mootummaa kamiinuu raawwachuu danda'a. Hojiwwan badaan kunniin akka hin raawwanne lammien kamiyyuu hordofuu fi ittisuuf itti gaafatamummaa qaba. namoota amaanaa isaanii dagatan kamiiniyyuu raawwtamuu waan danda'uuf lammileen hundi irratti qabsa'uutu irraa eegama.

JECCHOOTA IJOO

Filatamtoota ummataa: Hawaasni naannoo tokko jiraatu mirga isaanii akka kabajsiisaniif akkasumas hojii seera qabeessa ta'e akka raawwatan gochuuf jecha namoota of keessaa filatee aangoo kenneef dha.

Daangaa aangoo: Aangoo heeraa fi seerota kan biroo akkasumas qajeelfamootaa fi damboota bu'uura gochuun daangeffamee kennname dha.

Malaammaltummaa: Aangoo ummataa ykn mootummaa irraa kennname karaa dhugaa irraa goree fi amanamummaa hin qabneen hojjechuun qabeenya hawaasaa dhimma dhunfaanf ykn nama biroof akka oolu gochuuf jecha badii raawwatu dha.

Gaaffilee Keessa Deebii

I. Gaaffilee armaan gadii sirrii yoo ta'an "dhugaa" dogoggora yoo ta'an "soba" jechuun deebisaa.

1. Heerri mootummaa naannoo mirga ofin of bulchuutiif haala ni mijessaa.
2. Lammuin tokko seera kabajuu malee kabajsiisuuf dirqama hin qabu.
3. Filataamtoota ummataatiif daangaan aangoo hin barbaachisu?
4. Iccitiin hiriyoota lama gidduutti qabamee ture tokko yoo bahe rakkoo fiduu ni danda'aa ?

II. Idoo duwwaa armaan gadii jecha ykn gaalee sirrii ta'een guuti.

1. Naamusni hawaasa biratti fudhatama argate kamiyyuu naamusa _____ jedhama.
2. Naamusni gaariin kan eegalu _____ irraa kaaseeti.
3. Seera kabajsiisuun dura _____ kabajuutu nurraa eegama.

III. Gaaffilee araan gadii dubbisuun deebii sirrii ta'e filadhaa.

1. Kanneen araan gadii keessa fakkeenya naamusa gaarii kan hin taane isa kam?
 - a) Seera mana barnootaa fi daree kabajuu
 - b) Qulqullina daree eeguu
 - c) Qabeenya barattoota kan biroo fudhachuu dhiisuu
 - d) deebiin hin kennamne
2. Daangaa aangoo filatamtoota ummataa irra kaa'ame ilaachisee isa dhugaa ta'e adda baasaa.
 - a) Daangaa aangoo kennameen ala hojjachuu
 - b) Dangaa aangoo ummataan kennameefii gadi hojjetanii argamuu
 - c) Aangoo seeraan kennameef haalaan itti fayyadamuu
 - d) Hunduu deebii ni ta'a.
3. Malaammaltummaan filatamtoota ummataatiin ykn abbootii aangoo mootum-maatiin hin raaww atane isa kam?
 - a) matta'aa fudhachuu
 - b) Qabeenya mootummaa dhuunfaan itti tajaajilamuu
 - c) Iccitii eeguu
 - d) Firaan hojjachuu

4. Dhimmi hiriyaan lamaa fi ol jidduutti dhokatee jiru ykn hafuu qabu maal jedhama?
- a) Iccitii maatii
 - c) Iccitii biyyaa
 - b) Iccitii hiriyaan
 - d) Iccitii dhuunfaa

IV. Gaaffilee armaan gadiitif deebii gabaabaa kennaa

- 1. Barbaachisummaa heera mootummaa naannoo keessaa qabxii lama ibsaas..
- 2. Naamusa barattoota irraa eegamu keessaa qabxii sad i tarreessi.

BOQONNAA SADII

WALQIXXUMMAA

Kaayyoolee boqonnichaa: Boqonnaa kana erga barattanii booda:

- *Walqixxummaa fi mirgoota walqixxummaa saba, sablammootaa fi ummatoota Itoophiyaa ni hubattan.*
- *Hirmaannaa dubartoонни misoomaa fi ijaarsa biyyaa keessatti qaban ni beektan.*
- *Mirgoota qaamaan miidhamtoонни mana barnoottaa keessatti qabaa-chuu qaban ni hubattan.*

3.1. Mirgoota Walqixxummaa

- *Naannoo keessanitti mirgoota hojii irra oolaa jiran fakkeenya waliin ibsaa.*
- *Yaada bu'uura sirna dimokraasii kan ta'an keessaa inni tokko walqix-xummaa dha..Akkasumas ciminni sirni dimokraasii kan madaalamumirgoonni walqixxummaan yoo kabajaman dha.*

Wal-qixxummaan sabootni, sablammilee fi ummattoonni otuu wal hin caaliin mirgoonni isaanii walqixxummaan kan ittiin kabajamu dha.

kana ilaachisee heerri bara 1987 mootummaa fedaraalawaa dimokraatwaaa rippabliika Itoophiyaatiin bahe, mirgoota wal qixxummaa tarreessuun kaa'era. Heericha keessaa keeyyeta 25: 40 fi 41 dubbisuun kan mirgoota walqixxummaa keessatti hammataman adda baasuun irratti mari'adhaa.

Gigaala -1

Gaaffilee armaan gadii deebisaa.

1. Naannoo jireenyaa keessanitti mirgoonni walqixxummaa hangam hojii irra oolaa jiru?
2. Mirgoota walqixxummaa bee-ktan keessaa sadii eeraa?

3.1.1 Mirgoota Walqixxummaafi Walqixxummaan fayyadamuu Sabootaa, Sablammootaa fi Ummatootaa

Naannoo jirenyaa keessanitti hojii-wwan misoomaa walqixxummaa lammilee agarsisan ibsaa.

Mirgoota walqixxummaa sabaa, sablammootaa fi ummatootaa jechuun lammilee osoo walhin caaliin walqix-

aan mirgi kabajamuufii jechuu dha. Mirgonnni walqixxummaan fayyadamaa saba, sablammii fi ummatootaa, hawaasni hundi mirgootnni namummaa fi dimookraasi walqixaan loogii tokko malee kabajamuufii kan qabuu fi qabeenya biyyaatti walqixa fayyadamuu fi carraa misoomaa bifaa wal fakkaatuun argachuun kan agarsiisu dha. Dabalaaniis dhimmoota akka siyaasaa hawaasummaa fi dinagdee keessatti hirmaanna cimaa akka taasisanii fi fayyadamtoota ta'an agarsiisa.

Haala amma sirna dimokraasi biyya keenya keessatti ijaaramaa jiru kanaan saboontti mirga walqixa waan qabaniif bu'aa misoomaa walqixxummaan fayyadamuu mirgi isaanii seeraan mirkanaa'ee jira. Kanaafuu, lammileen hundi qabeenya biyyaatti fayyadamuu fi kunuunsuuf waliin hojjachuutu irraa eegama.

Gilgaala - 2 Gaaffiilee armaan gadii deebisaa.

1. Gochawwan walqixxummaa fi walqixxummaan itti fayyadamuu sabootaa, sablammilee fi ummatootaa mirkaneessan eeraa.
2. Misoomni armaan gadii naanno ati jiraattu keessatti kan hojjataman yoo ta'e, yaada hojjatame jedhu jalatti mallattoo (✓) kan hin hojjatamne yoo ta'e, yaada hin hojjatamne jedhuu jalatti mallattoo (✓) gochuun agarsiisa.

Lakk	Akaakuu misoomaa	Kan Hojjatame	Kan Hin hojjatamne
1	Karaa		
2	Buufata fayyaa		
3	Tajaajila ibsa		
4	Tajaajila bishaanii		
5	Mana barnootaa		

3.1.2 Dhaabbilee Hawaasni Naannoo Tokko Jiraatu Waliin Itti Fayyadamu



Fakki 3.1 Dhaabbilee misoomaa hawaasni gamtaan itti Fayyadamu

- **Naannoo keessanitti dhaabbilee misoomaa ummataaf faayidaa kennaa jiran eeraa.**
- **Dhaabbileen kunniin osoo jiraachuu baatanii rakkoleen ummata qunnamuu danda'an maal?**

Sirnoota darban keessatti saba, sab-lammoonnii fi ummattoonni dhaab-bilee misoomaa fi qabeenya biyyaatti wal qixaan itti fayyadamuuf carraa hin qaban turan. Sirna dimokraasii biyyattiin ijaaraa jirtu keessatti jij-iiramni hedduun mal'achaa jira. Isa kana mul'isuuf yaada armaa gaditti dhiyaate dubbisuun gaaffilee jalatti dhiyaatan deebisaa.

Ummattoota Naannoo

Beenishaangul Gumuz

Naannoonaan ummattoota Beenishaangul Gumuz, heera mootummaa Feederaala Itiyoophiyaa bara 1987 baheen naannoolee hundeffaman keessaa tokko dha. Naannicha keessattis saba, sablammilee fi ummattoota adda addaatu jiraata. Isaan kana keessaa Gumuz, Bartaa, shinaashaa, Ma'oo fi Koo-moon ummattoota naannicha kee-ssa turan dha. Ummanni kunis tokkum-maa fedhiidhaan fi waliit yaaduun hundeesseen waliin jiraachaa jira.



Fakki 3.2 Ummattoota Beenishaangul Gumuz keessaa

Sirnoota darban keessatti Itoophiyaa keessatti Beenishaangul Gumuz kalla-ttii kamiin akka argamu namoonni heddu hin beekan turan. Seenaan, aadaa fi afaan hawaasichaa dagatamee turee jira. Qabeenyi naannicha kees-satti argamus ummataaf osoo hin ta'in faayidaa hoggantoota sirna gita bittaa gaggeessaniif oolaa tureera. Kanaa fi kan kana fakkaatan irraa kan ka'e ummanni misooma naannichaa irraa wal qixaa fayyadamaa hin turre jechuu dha.

Sirna dimokraasii ammaa keessatti garuu ummattoonni naannichaa mirga ofiin of bulchuu gonfataniiru. Qabee-nya biyyattiis saboota, sablammilee fi ummattoota biroo waliin walqixa akka fayyadaman haalli mijaa'aan uumameefii jira. Mirgi misoomaa fi qabeenya waliin fayyadamuus walqixxummaa-dhaan kabajaaafii jira. Hanga humni naannichaa danda'een magaalonnii fi gandontni naannichaa hedduun fayya-damtoota misoomaa waan ta'aniif jijiiramni abdachiisaan mul'achaa jira. Tajaajila hawaasummaa naannicha keessatti diriiran keessaa kan akka ibsaa, bilbilaa, bishaan quliquulluu, karaa, buufata fayyaa, mana poostaa fi tajaajila geejjibaa tuquun ni dan-da'ama. Misooma kanas ummanni wa-lqixxummaan itti fayyadamaa jira. Tajaajilli misoomaa kunis itti fufiinsaan yeroo dheeraa akka tajaajiluu danda'u ummnii fi bulchiinsi naannichaa qin-

doominaan hojjachuutu irraa eegama. Mirgi walqixxummaa naannicha keessatti hojii irra waan ooleef ummanni misoomaa fi guddinaaf caalmaatti kaka'ee jira. Yeroo ammaas hiyyummaa balleessuuf dammaqinaan tumsaa jira.

Gilgaala-3

Gaaffilee armaan gadii deebisaa

1. Dhaabbilee misoomaa, ummattoonni Beenishaangul Gummuz waliin itti fayyadamaa jiru tarreessaa.
2. Dhaabbilee misoomaa kann een ummntni akkamiin walqixaan itti fayyadamuu danda'a?
3. Dhaabbilee misoomaa naao keessanitti argamu tarreesuun hawaasni akkamti waliin itti fayyadamuu akka qabu dareef ibsaa.
4. Misooma saffisiisuu keessatti gaheen bulchiinsa naanno maal?

3.1.3 Faaydaa Kabajamuu Wal-Qixxummaa Fi Wal Qixxummaan Fayyadamuu

- *Naanno jirenyaa keessaniitti dhaabilee misoomaa hawaasaa fi mootummaatti uummanni walqixaan itti fayyadamaa jiraa?*

Mirga faayidaa wal-qixa argachuu jechuun hawaasni biyyaa hundii misoomaa fi guddina biyyaa loogii malee walqixaan itti fayyamuu akka qabu kan agarsisuu dha. Kanas jechuun hawaasni misooma biyya isaa keessaatti akkuma itti gaafatatummaa wal qixa ta'e qabanitti faaydaa argamus wal qixa fayyadamuu qabu. Yaa ta'u malee mirgi wal qixa fayyadamuu hanga hin jirretti wal qixxummaan jiraachuu hin danda'u. Wal qixxummaan hin diriirre yoo ta'e immoo ummattoonni mirga isaanii kabajsii-suuf jecha walitti bu'iinsa keessa galuu danda'u. Kunis seerri akka hin kabajamnee fi nageenyi akka dhabamu taasisa. Kun yoo ta'e immoo guddinaa fi misooma fiduudhaan hiyyummaa fi duubatti hafummaa irraa walaba ta'uun rakkisaa ta'a. Waan kana ta'e ef, ummattoonni hundi misooma kamyuu irraa fayyadamtoota akka ta.an gochuun guddinaa fi badhaadhina biyyaaf faaydaa qaba. Kana mirkanessuu keessatti immoo ummannii fi mootummaan waliin hojjechuutu irraa eegama.

Gilgaala-4

Gaaffilee armaan gadii deebisaa.

1. Mirga walqixa fayyadamuu jechuun maal jechuu dha?
2. Mirgoonni walqixa fayyadamuu yoo dhabame rakkoo akkamiitu uumamuu danda'a?

3.2. Haalawwan Walqixxummaan

Ittiin Ibsamu.

- *Naannoo jireenyaa keessanitti dhimmoota haalli walqixxummaan fayya damuu ittiin ibsaman fakeenyaa dhiyeessuun ibsaa.*
- *Faaydaa walqixxummaan ummattootaa kabajamuun isaa argamsiisu tarreessa.*

Saba, sablammoonni fi ummattoonni mirga qabanitti fayyadamuu fi itti gaafatamummaa isaanii bahuu keessatti mirga walqixa ta'e qabu. Akkuma beekamu hawaasni biyya keenya keessa jiraatu saalaan, amantaan, afaaniin fi kkfn garaagarummaa kan qaban ta'uun isaanii ni beekama.. Haa ta'u malee, garaagarummaan kun kabajamuu dhala namaa fi dimokraasii irratti dhiibbaa hin qabu. Namni kamiiyyuu eessattillee yoo dhalate mirgi isa/ishee kabajamuu ilaachisee kan nama birootii gadi yookan ol ta'uu hin danda'u. Bu'uruma kana irraa ka'uun haalawwaan walqixxummaan ittiin ibsamu keessaa ijoon:- kabajamu mirgoota afaan, amantii, aadaa saba,sablamootaa fi ummattootaa tuquun ni danda'ama.

3.2.1. Haalawwaan Walqixxummaan

Saboota,Sablammootaa Fi Ummattootaa Ittiin Ibsamu

- *Qabxiowan armaan gadii kan heera keessatti ibsaman kanneen siritti dubbisuun yaada hubattan ibsaa.*

” Sabni,sab-lammii fi ummanni Itoophiyaa kamiyyuu afaan isaatiin dubbac-huu,barreessuu, afaan isaa guddisuu fi babal'isuu, aadaa isaa calaqqisiisuu, guddisiisuu akkasumas seenaa isaa kunuunsuuf mirga qaba”. Heeraa mootummaa Feederaalaa keeyyata 39/2.

A) Wal-qixxummaa afaanii.

- *Wal-qixxummaa afaanii jechuun maal jechuu dhaa?*

Ummanni Itoophiyaa hunduu wal qixa dha. Afaan isaanii kan biroo waliin walqixa akka kabajamuuf barbaadu. Mirgi kunis heera Mootummaa keeyyata 39 jalatti hammatamee jira. Saba, sabla mmoonni fi ummattontni afaan isaaniitti fayyadamuu mirga qabu. Kanas jechuun afaan isaanii afaan barnootaa gochuu, ogbarruuf itti fayyadamuu, afaan isaanitiin dubbac-huu fi mana murtiitti ittiin tajaajila argachuu akkasumas afaan isaanii dagaagsuuf mirga qabu. Dabalataanis afaanota biroo barachuu yookan bee-kuuf mirgi isaanii kabajameefii jira Kanaafuu, afaanota hunda walqixxummaan kabajuu fi kabajsiisuun nageenya misoomaa fi walii galtee uumuu irratti baay'ee fayyada.

B) Walqixxummaa koorniyaa.

- *Walqixxummaan koorniyaa kabajamuu akka qabu amantu?*

Namoonni uumamaan dhiiraa yookan dubartii ta'uun isaaniitiin garaagarummaa saalaa yaa qabaataniyyu malee

mirgoonni isaanii walqixa kabaj amuu qaba. Kanas jechuun dubartiin uumamaan dubartii ta'uu isheetiin qofa mirgi dhabdu jiraachuu hin qabu jechuu dha Dhiirris akkasumatti dhiira ta'ee uumamuu isaatiin mirga dubartiin gadi ykn ol ta'e qabaachuu hin qabu.

Walqixxummaa koorniyaa jechuun walqixxummaa dhiiraa fi dubartii jec-huu dha. Kunis dhiiraa fi dubartiin sababa saala isaaniitiin osoo wal hin caalin mirga qixxee ta'e qabu.

Akkuma beekamu dubartoonni wakkaa hawaasaa waan ta'aniif misoomni isaan irratti hin hirmaanne galma gahuu hin danda'u. Kanaafuu, walqixxummaa koorniyaa kabajuun gudinaaf dhimma bu'uura ta'e dha. Ilaalchi dhaloota darbe irraa fudhannee fi dubartoota gadi qabanii ilaaluun jijji-iramuu qaba. Dubartoonni ilaalchaan, sammuun, dandeetii kalaqaa fi hogga-nsaan dhiiraa gadii miti. Kanaafuu, barmaatilee boodatti hafoo dhiisuun walqixxummaa koorniyaatti amamuun fi kanuma galmaan gahuuf ciminaan socha'uun taattaaffi guddina biyyaatiif godhamu kan agarsiisu dha.

Gilgaala-5

Gaaffii armaan gadii irratti mari'adhaa.

1. Mirgi afaan ofiitiin fayyad-amuu dhimmoota maal maal fa'a of keessatti qabata?
2. Amantaalee hedduun obsaan waliin jiraachuun bu'aa maal qaba?
3. Hirmaannaa dubrtootaa malle misoomni dhufuu hin danda'u kan jedhame maaliif isinitti fakkaata?

Hirmaannaan Dubrtootaa Mis-oomaan Fi Guddina Biyyaatiif

- ***Dubrtoonni dhiiraan qixa akka hirmaatan gochuun faaydaan guddina biyyaaf argamsiisu maal akka ta'e ibsaa.***

"Dubrtootaa fi Tuurizimii "

Akkuma beekumu yeroo dheeraa irraa kaasee nyaataa fi dhugaatii maatiif qopheessuun hojii dubrtootaa qofa ta'ee tureera. Akkasumas, keessummoota dhiyoos ta'ee fagoo irraa dhufan keesssummeessu irratti dhiira caalaa dubrtoonni muuxannoo cimsatanii jiru. Kunis, adeemsa keessa keessummoota biyya alaatii dhufan keessumeessuun gahee dubrtootaa ta'ee turee jira. Booddee irrattis namoota biyya alaas ta'ee biyya keessaa kaffaltiidhaan (hoteelan) keessuu-mmeessuun kan eegalame yoo ta'u kunis

itti gaafatamummaa dubartootaa ta'ee itti fufe. Inni kun hundi walitti kuu-samee jalqabbii fi guddina tuurizimiitiif gaheen dubartootaa olaanaa dha jechuun ni danda'ama.

Yeroo gabaabaa as nyaataa fi dhugaatii qopheessuu keessatti dhiirri hirmaachuu eegalrr jira. Haa ta'u malee, bu'urri hojiiwwaan kanaa kan durbartootaa ta'ee argama. Kanaan alas dubartoonni hojiiwwan akka jirbii foo'uu, hojii harkaa fi kkf niin baay'ee beekamoo dha. Kunis biyyi keenya tuuriziimii irraa faayidaa akka argattu taasisaa jira. Kanaafuu, durbartoonni guddina tuuriziimiiif gahee olaanaa bahaa kan turan ta'uun isaanii, seek-tarri kunis dubartoota hedduuf carraa hojii banuun isaa biyya keenya keessatti qofa kan hin daangeffamne ta'ee argama.

Seena biyya keenyaa keessatti Iteegee Xaayituun utubaa hojii tuurizimii kan ta'e mana nyaata (hooteelaa) eegaluun nama jalqabaa ti. Yeroo sana irraa kaasee tuuriziimiin misooma biyya keenyaa keessatti damee isa tokko ta'ee jira. Haaluma kanaan, dubartoonni damee tuurizimii keessatti qaxaramuunis ta'e investarummaan bobba'uun industirichaa fi guddina biyyaaf gumaacha olaanaa taasisanii jiru.

Madda: Tuurizimii Addis, wagga 5faa lakk. 6.irraa walakkaan kan fudhatame.

Gilgaala - 6

Gaaffilee armaan gadii

deebisaa

1. Akka yaada armaan oliitti gumaacha durbartoonni guddina damee tuuriziimiiif godhan tarreessaa .
2. Naannoo jirenya keessanii keessatti damee misoomaa dubartoonni keessatti hirmaachaa jiran hiriyoota keessanitti himaa.
3. Kabajamuun walqixxummaa dubartootaa, gahee inni misooma biyyaa keessatti qabu yaadanno keessan irratti barreessaa. Itti aansuun barattoota wajjin teessan waliin irratti mari'adhaa.

Misoomaa fi guddina biyya keenya keessatti yeroo dhiyoos asitti galmaa'e keessatti dubartoonni gumaacha olaanaa taasisaa jiru. Biyya keenya keessatti ijaarsi sirna dimokraasii erga jalqabee kaasee gahaa dha jedhamuu baatus jijiirama hedduutu galmaa'ee jira. Fakkeenyaaaf, gama barnootaatiin yoo ilaalle, hirmaannaan barattoota dubaraa dabalaa dhufeera. Bara 1998 -1999 hirmaannaan dilboon barattotaa kan armaan gadii fakkaata .

	Naannoo	Baay'ina barattotaa kutaa 1-8		Baay'ina barattoota dubaraa % n
		Dhiira	Dubara	
1	Tigiraay	456,336	446,343	100%
2	Afaar	49,669	27,973	23.7%
3	Amaara	1,863,387	1,767,140	90.5%
4	Oromiyaa	2,939,750	2,336,970	84.3%
5	Beenshaangul Gumuz	91,477	66,508	105.5%
6	Soomaalee	157,429	94,962	23.8%
7	Ummattoota kibbaa	1,676,866	1,326,424	85%
8	Gaambee llaa	37,117	21,773	100.6%
9	Hararii	19,502	15,324	100.3%
1	Finfinnee	230,764	280,751	159.8%
0				
1	Dirree Dawaa	26,112	20,060	62.8%
1	Waliigala	7,548,409	6,404,233	84.8%

Madda:Barruulee waggaan Mannni Marii Feedereeshinii Ministeera Barnootaa eeruun kan dhiyeesse irraa kan fudhatame

Gilgaala – 7

Bu'uura gabatee armaan oliitiin gaaffilee armaan gadii deebisaa

1. Naannoolee Itoophiyaa keessaa Parsantiin lakkoofsa dubartootaa olaanaa kan qabu isa kamii? Gad aanaa kan qabu hoo eenyuu? Garaa garumaan jiru meeqaa ?
2. Garaagarummaa kana dhipisuuf maaltu hojjatamuun qabaa?
3. Naanno jirenya keessaniitti hirmaannaan dubartootaa maal fakkaataa? Kana cimsuuf maaltu isin irraa eegama?

Ragaan armaan olitti dhiyaate lakkoofsi barattoota dubaraa kutaa 1-8 jiru dabalaan dhufuu isaa muli'isa. Haa ta'u malee, kun gahaa dha jechuu miti. Kanaafuu, itti fufiinsaan hirmaannaa shamarranii gama barnootaanis ta'e dameewwan kan biroo irratti cimsuuf, hawaasnii fi mootummaan akkasumas dubartoonni waliin hojjachuutu irraa eegama.

Dubartoonni walqixxummaan kabajamee fi caarrraa yoo argatan warra dhiiratii gadi akka hin taane ogummaa adda addaa irratti hirmaachuuun mirkaneessanii jiru. Kanaafis ragaa kan ta'u biyya keenyattis ta'e biyyoota kan birootti hirmaannaan dubartootaa ogummoota adda addaa irratti cimaa dhufuu isaa ti. Fakkeenyaaf, dubartoonni sadarkaa ministeeratti, Afyaaiittii fi sadarkaa Ambaasaaddaraatti hojjachaa jiru. Akkasumas dameewwan biroo kan akka ispoortii, barnootaa fi inverstimentii keessatti dubartoonni hirmaannaa guddaa gochaa jiru.

Kanaafuu, kabajamuu mirgaa fi cimina hirmaannaa durbartootaaf lammiin hundi itti gaafatatummaa qaba. Haaluma kanaan, dhiirrii fi dubartoonni waliigalteen waliin yoo hojjatan bu' aan isaa misoomni amansiisaa fi guddina ta'uun isaa nama hin shakkisiisu.

3.3 Mirga Namoonni Hir'ina Qaa-maa Qaban Kabajamuufii Qabu.



Fakki 3.3 Namoonni hir'ina qaamaa qaban hojiilee adda addaa yoo hojjatan

- Fakki armaan olii irraa waan hubattan hiriyoota keessaniif ibsa.**

”Haaliimaa fi Irkoo”

”Sababa dhibee pooliyoo irraa kan ka'e, Haaliimaa fi Irkoon ijoolummaa isaanii irraa kaasee barattoota hiri' ina qaamatiif saaxilaamann dha. Kana irraa kan ka'e iddoo tokko irraa gara

iddoo biraatti kan socho'an meeshaa wilicheerii jedhamutti gargaaramuu-dhan. Bara kana Haaliimaan barattuu kutaa 7ffaa yoo taatu, Irkoon immoo barataa kutaa 8ffaa ti. Batattooni kun haal-uma kanaan barachaa osoo jiran-uu manni barnoota isaanii dareew-waan dura turan jijjiiruun gamoo gurg-uddaa abbaa fooqii afurii haaraa ijaare.

Gamoo haaraa kutaalee lafa irra jiran irratti barattooni kutaa 1-4 jiran rama-daman. Barattooni kutaa 5ffaa fi 6ffaa gamoo fooqii 1ffaa fi 2ffaa keessatti, akkasumas barattooni kutaa 7ffaa fi 8ffaa gamoo fooqii sadaffaa fi afraffaa keessatti akka baratan ramadaman. Haaliimaa fi Irkoon garuu gamoowwan kana bahuu ykn koruu waan hin dandeenyeef rakkoon isaan qunnamuu eegale. Nama yeroo yerootti isaan gargaaru dhabuun heddu rakkatan. Waan kana ta'eef manni barnootaa kutaa jijjiiruun akka haala isaaniif mijeessu iyyatan. Haa ta'u malee, manni barnootichaa humna kootii ol jechuun rakkoo kana furuufii dide. Gaaffii isaanitifis deebii waan hin argannee fi manni barnootaa kan biroo naannoo isaaniitti waan hin argamneef Haliimaa fi Irkoon barnoota isaanii addaan kutuuf dirqaman.

Gilgaala – 8

**Dubbisa armaan olii irratti
hundaa'uun gaaffiwwan
armaan gadii irratti
mari'adhaa.**

1. Deebiin manni barnootaa
Haalimaa fi Irkoof kenne
sirriidhaa? maaliif?
2. Manni barnootichaa maal
gochuutu irraa eegama ture?
3. Naannoo isin barataa jir-
taanitti, barattoota rakkoon
akka kanaa qunname
beektu? Rakkini isaanii
furmaata argatee jira? Of
duraaf rakkoo akka kanaa
faluuf isinii fi hawaasa irraa
maaltu eegama?

Jirenya keessatti hir'inni ykn hanqinni qaamaa nama kamiyyuu qunnamu kan danda'u yoo ta'u, kunis uumamaan ykn balaa tasaatiin mudachuu kan danda'u dha. Hanqinni qaamaa, hojii tokko ykn sochii tokko akka nama fayyaa guutuu qabu tokkootti raaw-wachuu dadhabuu dha. Rakkoowwaan hanqina ykn hir'ina qaamatiif nu saaxilan keessaa pooliyoo, dhibee qamaa, hoongee fi hanqina nyaataa ni argamu. Gama birootiin, dhibee adda addaa akkasumas tajaajilli fayyaa gad-aanaa ta'uu, hanqina qulqullinaa, balaa tasaa, walitti bu'insa, waraana fi

k.k.f rakkoo namaan uumaman akka fakkeenyaatti ni eeramu.

Biyya keenya keessatti namoonni hanqina qaamaa qaban hedduu dha. Namoonni kunis waajjiraalee mootummaa fi miti mootummaa keessatti loogiin adda addaa irra yoo gahu mul'ata. Yeroo dhiyoон asitti haalli kun jijiiramaa kan dhufe ta'us gara fuulduраatti dhimma kana irratti baa-y'ee hojjachuun barbaachisaa dha. Kunis tattaaffii lammii hundaa kan barbaadu dha.

**Namoota hanqina qaamaa qaban
kunuunsuun gahee lammii**

Namoonni hanqina qaama qaban iddo hundatti kunuunsa argachuu qabu. Fakkeenyaaf, mana barnootaa keessaatti daree barnootaa isaaniif mijaa'aa ta'e, meeshaalee barnootaa, jaalala, kunuunsaa fi xiyyeffannoo argachuu qabu. Kanaafuu, baratoonni, barsiisonnii fi hawaasni mana barnootaa namoota hanqina qaamaa qabaaniif kunuunsa godhuutu irraa eegama.

Namoonni hanqina qaamaa qaban mirga heera biyyaatin argatan qabu. Akkuma namoota biroo hojjachuun ni danda'u. Sochii hiyyuummaa balleessuuf godhamu keessatti gahee olaanaa taphachuu ni danda'u. Akkasumas, misooma biyyaa keessatti bu'aa galmeessisiisuu hin dadhaban.

Gilgaala -9**Gaaffilee armaan gadii irratti mari'adhaa.**

1. Heerra M.F.D.I. keeyyata 41/5
dubbisuun mootummaan
qaama miidhamtootaaf
maal maal gochuu akka qabu
irratti mari' adhaa.
2. Mana barnootaa keessatti ku-
nuunsi namoota hanqina qaa-
maa qabaniif godhamuu qabu
maal dha?

3.4 Barbaachisummaa Kabajamuu Walqixxummaa Amantii

- ***Barbaachisummaa walqixxum-
aan amantii kabajamuu maal
akka ta'e ibsaa.***

Akka heera mootummaa feederaalatti amantiwwan biyya keenya keessatti argaman hundi walqixa. Haala kan-an, namni kamiyyuu, dhuunfaan ykn gareen amantaa barbaade hordofuu, barsiisuu fi babal'ifachuu ni danda'a. Sochii jaalala, wal deggaruu fi wal kabajuu irratti hundaa'e gochuun hunda irraa eegama. Haa ta'u malee, adeemsa kana keessaatti namni tokko amantaa namoota biroo xureessuu fi tuffachuu hin danda'u. Seenaa dheraa biyya keenya keessatti amantaawwan hedduu waliin jiraataa turaniiru. Waliinis jiraachaa jiru. kunis cimee itti fufuu kan qabu dha. Ha-

aluma kanaan, saba, sab-lammii fi ummattoonni biyya keenya hundi tok-kummaa uumanii waliin jiraataa jiru. Tokkummaan isaanii kunis akka itti fufu sonawwan ummataa wal qixxummaan kabajamuu qabu. Haala kan-an, loogii tokko malee, afaan, amantaan fi aadaan ummataa wal qixa yoo kabajame nageenyii fi walii yaaduun ni dagaaga.

Mirgoonni amantaa yoo kabajamuu baate mirgoonni lammilee guutummaan guutuutti kabajame jechuun rakkisaa dha. Sirnichis sirna loogin keessatti raawwatu ta'a. Mirgi lammilee yoo dhiitame ykn loogiin yoo jiraate hawaasa keessatti mirgi isaa dhittamuun hin oolu. Amantaa tokko ol qabaniif isa kaan gadi qabuun sirni dimokraasii kan ittiin ibsamu miti. Sirni dimokraasii caalmaatti akka cimu mirga lammilee kan ta'e keessaa inni tokko jechuun wal-qixxummaan amantaan kabajamuun sirni dimokraasii akka hin diigamne ,nageenyi akka hin boorofnee fi abdiin guddinaa akka hin dukkanoofne gochuuf faaydaa olaanaa qaba. Mirgi wal qixxummaa amantii bifa guutuu ta'een mirkanaa'uun kan danda'u amantii ilaalchisee lammileen hundi ilaalcha wal fakkaatu yoo qabaatan dha. Ilaalchi wal fakkaatu akka dagaagu dhimmoota armaan gadiif xiyyeffannaa adda ta'e kennuun barbaachisaa dha.

- A. Amantaalee hundaaf beekamtii kennuu. walitti bu'iinsa marii fi karaa nagaatiin qofa hiikuu.
- B. Walitti bu'iinsa marii fi nagaan hiikuun yoo hin dadhabame kar-aa seeraatiin qofa furuu.
- C. Amantiin kan dhuunfaa waan ta'eef yaada ofii dirqamaan nama biroo irratti fe'uu yaaduun walitti bu'iinsaaf of kakaasuu dhiisuu.
- D. Iftoominaa fi itti gaafatamummaa cimsuu.
- E. Waliin jiraachuun akka dand-a'amu garaagarummaan amantaa gufuu akka hin taane yeroo hund-aa wal danda'uu ,walii yaaduu, wal kabajuu ,walii tumsuu
- F. Yeroo hunda olaantummaa seera-af abbomaamuu

Gilgaala – 10**Gaaffilee armaan gadii irratti mari'adhaa**

1. Walqixxummaan amantaa yoo kabajame faayidaa maal qaba?
2. Walqixxummaan amantaa akka kabajamu lammii hunda irraa maaltu eegg-ama?

Yaada xumura boqonnichaa

Mirgi walqixxummaa saba, sablam-miilee fi ummatootaa kabajamuun misoomaa fi guddina biyya keenyaatiif baay'ee. Sirna dimokraasii biyya keenya keessatti ijaaramaa jiru irratti lammileen hundi walqixa waan ta'a-niif misooma biyya isaanii keessatti fayyadamtoota ta'anii jiru.

Dhimmoota walqixxummaan lammilee ittiin ibsamu keessaa muraasni isaanii: saboonti,sab-lammoonnii fi ummattoonni afaan isaaniitti fayyadamuu, aadaa isaanii guddifachuu, amantaa isaanii wal qixxummaan kabajamuun ibsuun ni danda'ama. Kunis waan ta'eef yeroo ammaa lammien hundi waliin ta'uun misooma biyyaa saffisiisuuf akka tumsan isaan dandeessisee jira.

Sirna dimokraasi keessatti namoonno dhiira ykn durba ta'uu isaanitiin garaagarummaa saalaa yoo qabaatanis mirgi isaanii garuu wal qixxummaan ni kabajamaaf. Kanas jechuun dubartoonni uumamaan dubartii waan ta'aniif qofa mirgi dhaban jiraachuu hin qabu. Dhiirris waan dhiira ta'ee uumameef mirga durbaa gadi ta'e ykn caalu argachuu hin qabu.

Hanqinni ykn hir'inni qaamaa uumamaan ykn sababa balaa tasaatiin kan uumamu dha. Biyya keenya keessatti deeggarsi namoota hanqina qaamaa qabaniif godhamaa jiru baay'ee gadi aanaa ture. Fuulduraaf garuu dhimmi kun fooyya'uun,manneen barnootaa keessattis ta'e iddo adda addaatti deeggarsi cimee itti fufuu kan qabu dha.

JECHOOTA IJOO

Walqixxummaa:- jechuun, loogii tokko malee carraa fi faaydaalee walqixa argachuu akkasumas,itti gaafatatumummaa wal qixxummaan bahuu dha.

Saboota, sab-lammoottaa fi ummattoota jechuun hawaasa haallan kanatti aanee ibsaman mul'isu dha.

Aadaa bal'aa haala waliinii calaqqisu ykn muuxannoowwan wal fakkaataa kan qabanu, qooqa waliinii ittiin walii galuu danda'an kan qabanu,jirenya waliinii yookiin walitti dhiyaatu qabna jedhanii kan amanan ,tokkummaa yaadaa (saayikooloiji)kan qabanii fi baay'inaan qubsuma lafa wal qabate irra kan jiraatani dha. . Heera M.F.I, keeyyeta 39/5

Tuurizimii- jechuun damee dinagdee namoota daawwaanaa fi bashanaanaf dhufaniif tajaajilli adda addaa itti kennamuu fi kan itti keess-ummeessaman dha.

Tuuristi :-jechuun namoota bashannanaaf ykn hojii kan biraaf socho'an dha.

Inveestara:-jechuun nama ykn dhaabbata qabeenya ykn maallaqa isaa hojii tokko irra oolche jechuu dha.

Gaaffilee keessa deebii

I. Gaaffilee armaan gadii dubbisuun "dhugaa" ykn "soba" jechuun deebisi.

1. Heera MFDR Itoophiyaa 1987 bahe keessatti mirgi walqixxummaa saboota,sab-lammootaa fi ummatootaa iddoon hin kennamneef ture.
2. Sagantaalee misooma biyya keenyaa raawwachiisuu fi kunuunsuu kan qabu mootummaa qofa dha.
3. Walqixxummaan ummataa heeraan kabajamuun isaa biyya keenya keessatti guddinaa fi misooma biyyaa fiduuf faaydaa ni qaba.
4. Dubartootaa fi namoota hanqina qaamaa qabaniif kunuunsa gochuun misooma biyyaa duubaatti harkifachiisuu ni danda'a.

II. Himoota "B" jala jiran kan "A" jala jiraniin walitti firoomsi

"A"

1. Walqixxummaan fayyadamuun dhabuu
2. Walqixxummaa saalaa
3. Hiri'ina ykn hanqina qaamaa
4. Mul'ata

"B"

- A. Wal qixxummaa dhiiraa fi dubaraa
- B. Galma namni tokko bira gahuuf yaadu
- C. Rakkoo uumamaan ykn jiruu keessatti nu qunnamuu danda'u
- D. Guiddinni akka hin dhufne kan godhu

III. Iddoo duwwaa armaan gadii jecha ykn gaalee sirrii ta'een guuti.

1. ____afaan, aadaa fi amantii mataa isaa hin qabne hin jiru.
2. Itoophiyaa keessatti barmaatilee miidhaa geessisaa jiraniin caalaa miidhamaa kan jiran____dha.
3. Sabni, sab-lammii fi ummanni Itoophiyaa hundi afaan isaanitiin dubbachuu, barreessuu fi afaan isaanii guddisuuf_____qabu

IV. Gaaffilee armaan gadii dubbisuun deebii sirrii ta'e filadhaa:

1. Mirgoota walqixxummaa kabajamaa jiran keessaa tokko?
 - A. Mirgoota walqixxummaa saba, sab-lammootaa fi ummatootaa
 - B. Walqixxummaa saalaa
 - C. Walqixxummaa afaanii, aadaa, amantaa fi mul'istoota aadaa kan biroo
 - D. Hunduu deebii sirrii dha.
2. Yaada armaan gadii keessaa dhimma dubartootaa ilaachisee hima kamtu sirriidha?
 - A. Dubartooni dhiira waliin qixa akka hirmaatan taasisuun bu'aa hin qabu.
 - B. Hirmaanna dubartootaa malee misoomnii fi guddinni hin dhufu.
 - C. Naannoolee dinagdeen guddachaa jiran keessatti hirmaannaan barattootaaq kan dhiiraa ni caala.
 - D. Sirnoota darban keessatti dubartootaaaf iddo olaanaatu kennamaafi ture.
3. Rakkina hanqina ykn hir'ina qaamaa fiduu kan danda'u,

A. Dhibee	C. Walitti bu'insaa fi waraana
B. Hanqina nyaataa	D. Hunduu deebii sirrii dha.
4. Yaada armaan gadii keessaa waa'ee afaanii ilaachisee hima kamtu sirriidha?
 - A. Afaan tokko kan biroo ni caala
 - B. Afaanoni hundi meeshaa ittiin walii galaa ta'uun isaaniitiin wal qixa dha.
 - C. Afaanota kan biroo beekuu fi barachuun faayidaa hin qabu
 - D. Afaan olaanaa fi gadii aanaa jedhamu waan jiruuf afaan hundi walqixamiti
5. Biyya keenya keessatti mirgoonni sabootaa, sab-lammootaa fi ummatootaa kabajamuun bu'aa maal argamsiisa?
 - A. Afaan isaanii, aadaa fi amantaa mataa isaanii guddifachuuf gargaara
 - B. Hiyyummaa fi duubatti hafummaa irraa walaba ta'uun fi waliin hojjechuuf haala mijesssa
 - C. Qabeenya biyyaa qoddachuu irratti haqummaan akka jiraatu gochuun nageenya cimsa.
 - D. Hunduu deebii sirrii dha.

VI. Gaaffilee armaan gadiif deebii gabaabaa kennaa.

1. Mirgoonni walqixxummaa fi wal qixxummaan fayyadamuu sabootaa, sab-lammootaa fi ummatootaa kabajamuun isaa faaydaa inni argamsiisu tarr-eessuun ibsi.
2. Manneen barnootaa keessatti kunuunsa dubartootaa fi namoota hanqina qaamaa qabaniif godhamuu qaba jettu ibsi.

BOQONNAA AFUR

HAQUMMAA

Kaayyoolee boqonnichaa: Baranoota boqonnaa kann barattee yoo xumurtu:

- *Hojmaata iddo adda addaatti loogiin raawwatan ni ibsita.*
- *Barbaachisummaa dhaabbilee hawaasaa naa-nnookeessaniitti argaman ni hubatta.*
- *Hojmaatni dhaabbilee hawaasummaa loogii irraa walaba akka ta'anii fi haqummaa kan qaban akka ta'uu qaban ni ibsita.*
- *Hojmaata iddo adda addaatti loogiin raawwatan ni ibsita.*
- *Barbaachisummaa dhaabbilee hawaasaa naanno keessaniitti argaman ni hubatta.*
- *Hojmaatni dhaabbilee hawaasummaa loogii irraa walaba akka ta'anii fi haqummaa kan qaban akka ta'uu qaban ni ibsita.*

4.1. Hojmaatawwan Loogii Qaban

4.1.1 Gochaalee Hojimaata Loogii Adda Addaa Naannootti Argaman

- *Hojmaata loogii qabu jechuun maal jechuu dha? Waan yaadatan tarreessaa?*
 - *Gochawwan armaan gadii hojii loogii ykn hojii loogii irraa wala- ba ta'uu isaanii addaan baasu- un sababa waliin ibsaa.*
1. Barsiisaan barattoota ciccimoo ta'a- niif qabxii dabale.
 2. Ogeessi yaalaa Hospitaal hojjatu keessatti daa'iimni isaa dursa akka argatu godhe.
 3. Namoota waraqaa eenyummaa fudh- achuuf hiiriraan keessaa mangudo- otaaf dursi kennameera.
 4. Namoota yakkaan shakkaman kees- saa firri abbaa seeraa tokko wala- baan gadi dhiifame
 5. Abduun hiriyoota isaa waliin akka taphatu yoo hayyamamuuf Mare- emaan mana akka qulquelleessitu ajajamte.

Nelsan Maandeella - kutaa 1 ffaa

Namoota addunyaa keenya irratti kabaja guddaa argatan keessa Maandeellaan nama duraati. Nelsan Maandeellaan kutaa dhiphoo tokko keessatti waggoota 27 mana hidhaa keessatti dabarsaniiru. Haa ta'u malee, yeroo dheeraaf kan hidhaman yakka hojjatanii miti. Hojmaata loogii biyya isaanii keessatti raawwatamu ifatti waan mormaniif ture.

Sirna san keessatti warri gurraachi Afrikaa kibbaa bittaa namoota adiin dhiibbaan isaan irra gahaa ture. Loogii isaan irratti raawwataman keessaa kan itti aanan akka fakkeenyaaatti tuquun ni danda'ama.



Fakkii 4.1 Nelsan Maandeella

Dhalattooni ummata Afrikaa ta'an lafa isaanii saamamanii jiru. Iddoo qonnaa, jireenyaa fi daldalaan akka qabaatan silumaa hin heyyamamuuf ture. Akksumaa bulchiinsa mootummaa keessatti hirmaachuun seeraan dhoorka-

maa ture. kanaafis sababa kan jedhame guurraachi warra adii tajaajiluf kan uumame dha jedhamee waan yaadamuuf ture.

Kanaafuu, warri gurraachi dhalattoota Afrikaa ta'an kan barbaadaman warra adii tajajiluuf qofa ture. Haala kanaan warri adii magaalota babbaareedoo keessa yoo jiraatan gurrachi garuu biyya isaa keessatti gandoota xixiqqoo keessa akka jiraatu godhamaa ture.

Namonni isaan kanneenii fi miidhaa fokkisaa kana morman hidhaaf saaxilamanii jiru. Daa'imman sirna kana morman otuu hin hafin yeroon itti ajjeefaman ni jira ture. Gama birootiin namoonni loogii kana hojjetan, namota reeban ykn tuman ajjeessanii fi k.k.f kan raawwatan ni muudamu, akkasumas ni badhaafamu ture.

Kanaafuu, Maandeellaan sirna kana waan balaaleeffatanii fi hawaasa addunyatiif waan saaxilaniif akkasumas ummata gurraacha waan qindeessaniif hidhaa wagga 27 tiif saaxilaman jechuu dha. Haa ta'u malee waggoota 27 booda Maandeellaan pirezidaantii gurraacha Afrikaa kibbaa isa duraat aangoo isaanitti tarkaaffii akkamii fudhatu laata?

Gilgaala – 1**Dubbisa armaan olii irratti hundaa'uun gaaffilee deebisaa**

1. Haala yaada armaan oliitiin loogii warra gurraacha Afr-ikaa kibbaa irra gahaa ture tarreessaa.
2. Nelsan Maandeellaa sirriidha turee? Maaliif?
3. Gocha Maandeellaa irraa maal barattu?
4. Maanddeellaan pirezidaantii erga ta'anii booda loogii hambisuuf tarkaanfii akkamii fudhachuu qabu jettu?

Loogin gocha faallaa hojmaata haqummaa ta'an keessaa isa tokko dha. Hojmaanni loogii qabu jirenya keenya keessatti iddo adda addaatti nu qunnamuu ni danda'a. Kunis mana barnootatti, iddo taphaatti, gandaa jirannu keessatti, dhaabbilee hawaasummaa fi haqaa keessatti ni raawwata. Sababoonti loogummaaf nama kakaasanis akaakuun gargar ta'uu danda'u.

Loogin namoota walqixa ilaaluu dhii-suut irraa kan ka'e uumama. Kunis kan ta'u namoonni itti gaafatatummaa isaanii yoo bahan firaan, amantaan, sanyiin, hiriyummaan, fi k.k.f irraa ka'uun gocha seeraan ala ta'e yoo

raawwaatan dha. Haala kanaan namoonni sanyiin, afaniin, amantaan, go-saan, siyaasaa fi, saalaan loogii ni raawwatu. Aangootti fayyadamuun fi hojiwwan seeraan ala ta'anis gocha loogii ta'an dha.

Yeroo tokko tokko loogiin sababa aadaa boodatti hafaa irraa kan ka'een ni raawwatama. Loogiin ijolleeb dubaraa irratti raawwaatamu kanaaf fakkeenyaa ta'uu ni danda'a. Biyya keenya keessatti hawaasni ijolleee dubaraaa dhiiraan wal qixa carraa barnootaa hin kennuuf. Haala nyaataa fi kunuunsa irrattis loogiin ni raawwata. Mana keessattis hojiin dhiira caalaa dubartootta irratti baay'ata. Kanaaf, ijolleen dubaraa dhiiraan wal qixa dandeettii isaanii kan uumamaan argatan guddisuuf karaan jalaa cufamee jira.

Gilgaala – 2**Gaaffilee armaan gadii deebisaa**

1. Hojmaata loogii qabo hambisuuf tarkaanfiin akkamii fudhatamuu qaba jettu?
2. Gochawan naannoo keessanitti loogii irratti hunda'uun raawwatan jettan tarreessaa?
3. Hojileen loogii enyuun raawwatan? Tokkoo tokkoon isaanii fakkeenyaa sadisadi kennaa?
 - A. Nama dhuunfaatiin
 - B. Dhaabbilee Mootummaatiin
 - C. Qaamota kan biraatiin

4.2 Dhaabbilee Hawaasummaa

4.2.1 Haqummaa Hojimaata Dhaabilee Hawaasummaa Naannooti Argaman

- Naannoo keessanitti mana barnootaa gaarii dha kan jedhamu isa kami? Maaliin mana barnootaa gaarii dha jedhamee?***
- Dhaabbilee hawaasaa naannoo keessanitti argaman keessaa dhaabbata tajaajila ni kenna jettan addaan baasuun qabxiilee dhaabaticha gaarii dha jechisiisan tarreessa.***

Dhaabbiileen hawaasummaa loogii tokko malee hawaasa bifaa walqixa ta'een tajaajila keennuutu irraa eegama. Dhaabbiileen kun tajaajila guutuu kennuuf waan lama guuttachuu qabu. Inni tokko haqummaa yoo ta'u inni lammaan hojmaanni gahumsa qabu jiraachuu isaa ti.

Tajaajilli dhaabbilee hawaasummaa haqummaa kan gonfate ta'uu qaba kan jedhamu akkamitti dha ?

Gama tokkoon biyya keessatti tajaajilli dhaabbilee hawaasaan kennamu kan walmadaale ta'uu qaba. Gama biro-otiin haqummaan dhaabbilee hawaasaa kan mirkanaa' ulammileen hundi garaagarummaa malee tajaajila argachuu qaban argachuu yoo danda'an dha.

Gahumsi dhaabbilee hawaasummaa kan mirkanaa'u dhabbileen kun ogeessa fi meeshaalee barbaachisaa ta'an-iin yoo guutaman, hojjettooni dhaabatichaa gahumsa yoo qabaatan, akksumas yeroo fi qabeenya dhaabatichaa hojii irra oolchuun ulaagaa bu'a qabeessumaa dhaabatichaa mad-aaluuf yoo gargaaran dha.

Hojii Garee-1

Dhaabbilee hawaasummaa naannoo keessanitti argamu maati keessaan waliin daawwachuun haala tajaajila isaanii safartuu armaan gadiitti fayyadamuun gaaffilee tarreeffaman hojjedhaa.

	Maqaa dhaabbilee	Yeroo hojii kabajuu irratti		Ogeessaa gahaa qabaachuu irratti		loogii irraa walaba ta'uun		Meeshaalee barbaachisoo qabaachuu irratti		yeroo hojii seeraan itti fayyadamuu irratti	
		gaarii dha	dadha baa dha.	gaarii dha	dadha baa dha.	gaarii dha	dadha baa dha.	gaarii dha	dadha baa dha.	gaarii dha	dadha baa dha.
1	Ganda										
2	Mana barnootaa										
3	Buufata fayyaa										
4	Wajjira qonnaa										

1. Dhaabbata kamtu gaarii dha. ?
 - a. yeroo hojii kabajuun _____
 - b. Ogeessa gahaa qabaachuuun _____
 - c. Loogii irraa ta'uun hojjachuun _____
 - d. yeroo hojii seeraan itti fayyadamuun _____
 - e. Meeshaalee hojii gahaa qab-aachuun_____
2. Akka waliigalaatti dhaabbata kamtu haqummaanis ta'e gahumsaan isaan kaan irraa sadarkaa fooyya'aa irra jira?
3. Gandi keessa jiraattan ganda kan biroo waliin yoo ilaalamu haqu-mmaanii fi gahumsi dhaabbilee hawaasummaa sadarkaa maal irra akka jiru ibsaa.

Hojii garee -2

Biyya keenya Itoophiyaa hiyyeettii kan jechisiisan keessaa tokko dhaabbileen hawaasummaa haala gahaa ta'een iddo-o hundatti guutamuu dhabuu isaa ti. Kanaafuu, hanqinaa fi faca'iinsa dhaabbilee hawaasummaa sirreesuuf isin gama keessannin maal gochuu dandeessu?

4.3 Sababoota Sarbamuu

Mirgootaa Fi Hir'ina Haq-ummaa

- *Namoonnii maaliif namoota kan biroo irratti loogii hojjatu? Qab-xiilee hojii loogiitiif sababa ta'an jettan tarreessaa.*

Obbo Nugusee, kantiibaa

magaalichaa

Obbo Nuguseen kaantiibaa magaalaa xiqqoo tokkoo ti. Bulchiinsi magaalaa tanaa namoota misooma irratti hirm-aachuu barbaadaniif haala ni mijeessaa. Abbootiin qabeenyaa hanga mallaqa qabaniin lafa itti ijaaran ni mijeessa. Iddoowwan abbootii qabee-nyaan barbaadaman kan kennaman koree obbo Nuguseetiin hogganamuun dha. Koreen kunis gaaffii abbootii qabeenyaa irraa dhiiyaate qoorachuun haaluma bu'uura seeraatiin abbootii dhimmaa keessummeessaa ture.

Haa ta'u malee yeroo tokko obbo Nuguseen koreen osoo hin murteessin mana gandaa sadeen walitti aananii jiran obboleessa haadha manaa isaaniiitiif akka keennamu murteesse. Namooni mana kana keessa yeroo dh-eeraa jiraatan manni isaanii nama biraaf kennamuu isaa kan beekan meeshaaleen ijaarsaa naannoo mana isaanitti bu'aa yoo jiru dha. Iyyannoobulchiinsa magaalaatti dhiyeeffatanis hin milkoofne. Hoggantoonni hojii irra jiru jechuun nama isaan keessummeessuu argachuu hin dandeenye. Haa ta'u malee abbootiin dhimmaa kan biroo wajjiira hoggantootaa yoo galanii fi bahan ni hubatu turan.

Torban tokko erga deddeebi'anii booda obbo Nugusee fi koreetti rakkoo isaanii ibsatanillee furmaata argachuu hin dandeenye. Inumaayyuu atattamaan guyyoota kudhan keessatti mana isaanii akka gadi dhiisan ergamtuu isaa-

niitiin ergaa dabarsan. Haala kanaan abdii waan kutaniif caal'isanii waan dhufu eeggachuu eegalan.

Hanqina ykn dhabamuu haqummaa fi dhiitamuu mirgaa ilaalcissee yaada armaan olii irratti hundaa'uun gaaffilee armaan gadii deebisi.

Gilgaala -4

Yaada armaan olii irratti hundaa'uun gaaffilee deebisi

1. Hanqinni haqummaa jira jettanii yaadduu? Gochawwan hir'ina haqummaa mul'isan eeraa.
2. Manni sadan abbootii qabee-nyaatiif kennaman kan keessan osoo ta'anii maatiin keessan maal gochuu qabu jettu?
3. Koreen cal'isuun isaa sirrii ture jettuu ?
4. Adeemsa kana keessatti aangoo isaatti seeraan ala kan fayyadame eenyuu? kan hin fayyadamne hoo jiraa?

Dhabamuu haqummaa fi kabajamuu dhabuu mirgootaaf qabxiileen armaan gadii tuqamuu danda'u

A. Kabajamuu dhabuu mirga lammilee

Lammilee mirgoota adda addaa qabu. Fakkeenyaaf kan akka walabumman jiraachuu, barachuu, gosa hojii humni

isaa heyyamutti bobba'uu, dhaaba siy-aasaa fedhe keessatti miseensa ta'uu, fi kkf tuquun ni danda'ama. Mirgoonni lammilee akka sarbamuu kan taasisaan keessaa tokko dhabamuu haqaummaa ti. Kana jechuun immoo seera ykn sirna hawaasaa kabajuu dhiisuu jechuu dha. Haqummaan meeshaa mirgoota lammilee kabajsiisuuf gargaaru dha. Biyya tokko keessatti haqummaa irratti hojmaanni rakkoo qaba yoo ta'e mirgoo nni lammilee ni sarbamuu. Kanaaf,s irni haqummaa biyya tokkoo namoota dhunfaanis ta'e qaama mootummaatiin kabajamuu qaba.

B. Aangoo ummataa fi mootummaa irraa kennae seeraan itti fayyadamuu

Abbootiin aangoo fi hojjettoonni sadarkaa adda addaa irratti argaman aangoon hojii isaanii raawwachuu isaan dandeessisu ni kennamaaf. Itti gaafatatummaa kennaeef kanaan tajaajila kenuun barbaachisaa yoo ta'u aangoo kennaeef daangaan ala itti fayyadamuu sirrii hin ta'u. Kanaaf,aangoo mootummaa fi ummataa seeraan itti fayyadamuu dhabuun haqummaa fi sarbamuu mirgaa fida.

C. Lammilee wal qixxummaan keessu-mmeessuu dhabuu

Lammilee tajaajila wal qixa ta'e argachuu qaban. Bifa wal fakkaatuun keessummeessamuu qabu. Fakkeen-

yaaf, namoota yakka walfakkaatu hojjatan addabbii walfakkaatu argachuu qabu. Haa ta'u malee hojmaata loogii qabu keessatti haqummaan jirachuu hin danda'u. Namoota giduutti garaagarummaa uumuudhaan waan ta'uu hin qabne raawwachuuun sarbamuu mirgaa fu diigamuu haqummaaf sababa ta'u.

4.4 Barbaachisummaa jiraachuu haqummaa

- **Man barnootaa fi daree keessatti haqummaan maaliif akka jiratu barbaachise?**
- **Namni haqummaa dhabee fi mirgi isaa sarbame maal gochuu qaba?**

Gilgaala – 5

Gaaffilee armaan gadii deebisaa

1. Sarbamuun mirgaa fi dhabamuun haqummaa eenyuuun rawwatamaa ?
2. Muuxannoo hanga ammaatti qabdan (Televizyinii, Raadiyoo ykn naannoo keessan wkf) irraa ka'uun gochoota sarbamuu mirgaa mul'isan tarreessaar.
3. Yaada <<mirgi kee akka kabajamu atis kan namoota biroo kabaji>> jedhu fudhattaa? Maaliif ?
Qaamoota mirgoota lammilee kabajuu fi kabajsiisuu qaban jettan tarreessaar.
4. Barreeffama armaan gadii waayee dhabamuun haqummaa ibsu dubbisaa.

Nelsan Maandeellaa - kutaa 2^{ffaa}

Nelsan Maandeellaan waggaa 27 mana hidhaa erga turanii booda Afrikaa kibbaatti hogganaa gurraacha isa duraa ta'anii filataman. Haaluma kanaan Maandeellaan erga aangoo qabatanii booda mootummaan isaaniin hogganamu haqummaa mirkaneessuuf tarkkaanfii adda addaa fudhachuu eegale. Sirnoonni hojmaata fakkeenya loogummaa qaban kamiyyuu akka haqaman ta'e. Itti aansuun warri adii fi gurraachi mana barnootaa tokko keessatti barachuu, giddu gala fayyaa tokkotti fayyadamuu eegalan. Iddowwan ispoortii fi bashannanaa wkf. wal qixxummaan hunda isaanii tajaajiluu eegalan. Lammilee gurraachi yeroo dheeraaf mirgi isaanii sarbamee ture waajjira mootummaa keessatti qaxaramanii fi ramadamanii hojjechuu eegalan. Dhimma biyya isaanii irratti walabummaan akka hirmaatan mirgi isaanii mirkanaa'e. Dhaabbiileen bulchiinsaa, nageenyaa fi haqaa baadiyyaa fi magaalaa keessatti argaman lammilee hunda loogii malee wal qixxummaan haala tajaajiluu danda'aniin caaseffaman. Waluma agalatti warra adii fi gurraacha gidduutti gochii haaloo bahuu akka hin rawwaatamne taasise. Biyya keessattis nagaa fi tasgabbiin mul'achuu jalqabe. Nageenyi, guddinaa fi misoomaa murt-eessaa ta'uun isaa beekame. Kanaafuu, Maandeellaan sirna loogii yeroo

dheeraaf ture waan qabsaa'anii fi tarkaanfi haqaawaa bara pirezadaantummaa isaanii fudhataniin addunyaa keessatti nama kabajamaa ta'anii jiru.

Gilgaala – 6

Gaaffilee armaan gadii deebisaa

1. Akka yaada dubbisichaatti tarkaanfiiwan haqummaa mirkaneessuuf fudhataman tarreessi?
2. Akka yaada dubbisichaatti haqummaa biyya tokkoo dhugoomsuuf tarkaanfii akkamiiitu
 - a. fudhatamuu qaba ?
3. Barreeffamicha irratti hundaa'uun faayidaa haqummaa tarreessaa.
4. Faayidaa qabxiileen armaan gadii haqummaaf qaban ibsaa.
 - Naamusa
 - Dimokraasii
 - Olaantummaa seeraa
 - Walqixxummaa

Hojiwwan haqummaa mirkaneessuuf barbaachisan keessaa isaan armaan gadii eeruun ni danda'ama.

A. Hojmaata haqaawaa hojii irra oolchuu

B. Dhaabbileen mootummaa sadarkaa addaa addaa irratti argaman haalli tajaajila itti kennan haqu-

mmaa irratti kan hundaa'e ta'uu qaba. Dhaabbileen mootu-mmaa ganda,aanaa wkf. Keessatti argaman lammii kamiyyuu wal qixxummaan kan keessummee-ssan ta'uu qabu.

B. Qaamni seeraa aangoo kennameef qofaan hojjechuu:

Qaamooleen haqaa sadarkaa adda addaa irra jiran kan caaseffaman nageenya hawaasaa kabajsiisuuf dha. Kanaaf,qaamonni kunniin itti gaafatamummaa isaanii yoo bahan seera bu'uura gochuun ta'uu qaba. Seeronnii fi dambiiwwan bahanis faaydaa fi fedhii ummataa akka kabajsiisanitti kan qophaa'an ta'uu qabu.

C. Lammiileen mirga haqa argachuu isaaniitti fayyadamuu:

Lammiileen miidhaa dhunfaan isaan irra gahu qaama haqaa dhimmi ilalutti dhiyeeffachuun furmaanni akka kennamuuf gaafachuu qabu. Kanaan alattis, sirna dimokraasii keessatti lammiiin tokko dhiibbaa isa irra gahe qofa osoo hin ta'in dhiibbaa nama biraan irra gahus mormuu qaba.

D. Mirga ofii kabajsiisuu fi fala argachuuf jecha kaka'uumsa qabaachuu

Dhimmoota sarbamuu mirgaa fi dhabamuu haqaaf sababa ta'an lammiileen biyyattii kaka'uumsi mirga isaanii kabajsiisuu si haqa argachuuf qaban gadaanaa ta'uu isaa ti. Lammiileen

mirgi isaanii sarbamee fi haqa dhaban mirga isaanii kabajsiisuuf tattaaffii matalaa isaanii gochuu qabu. Kanaanis ,hojmaanni loogii of keessaa qabu akka hin uumamne qabsaa'uun alatti muuxannoo dhimmicha dhaaba haqaatti dhiyeessuu ykn beeksisuu cims-achuu qabu.

Gilgaala – 7

Gaaffilee armaan gadii deebisaa

1. Gocha loogii isin irrattis ta'e hiriyoota keessan irratti raa-wwate beeksisuun tattaaffii haqa argachuuf godhame akka fakkeenyaaatti dhiyeessaa.
2. Kana dura warri ykn maatiin keessan mirgoota kabajsiisuuf tattaaffii isaan godhan irraa gaafachuun waan hubbattan tarreessaa.
3. Mana barnootaa keessn keessatti adeemsa itti gaafatamummaa haqummaa kabajsiisuu keessatti qabdan tarreessaa.

4.5 Gibira



Mootummaan tajaajila hawaasummaa babal'isuuf madda galii eessaa argata?

4.5.1 Gibirri Yoomii fi Attamiin Jalqabame?

Gabaasa kadijja fa'a -kutaa Iffaa

Kadijjaan hiriyoони ishee << Seenaa fi gosa gibiraa >> irratti gabaasa akka dhiyeessan hojiin garee kennameef. Gabaasni maatii fi ogeessota gaafachuun qopheessan haala armaan gad-iitti qindaa'ee jira.

Seenaa Gibiraa

Seenaan gibiraa uumamuu mootummaa waliin kan walqabatu dha., Gibirri madda galii mootummoota durii iddo adda addaatti hundeffamaniif madda galii ijoor ture. Fakkeenyaaaf mootummooni Giriik fi Misirii waggoota 3000 dura turan hawaasa irraa gibira sassaabaa turanii jiru.

Biyya keenya keessattis mootummooni durii ummata irraa gibira

adda addaa bifaa qabeenyaa fi maall-aqaan funaanaa turanii jiru. Haa ta'u malee biyya keenya keessatti seerri tumamee gibirri funaanamuu kan eegalame jaarraa 15^{ffaa} keessa bara mootii Zara'aay Yaaqoob irraa eegalee ti.

Gilgaala - 8

Gaaffilee arnaan gadii irratti mari'adhaa

1. Seenaan gibiraa maaliif uum-amuu mootummaatin walqabatee?
2. Biyya keenya keessatti gibira funaanoon yoom egalamee?
3. Namoonni gibira kaffaluu yoom jalqaban?

Gabaasa kadijja fa'aa - kutaa 2^{ffaa}

Gibira kaffaluun maalif jalqabame? Namoonni naannoo tokko keessa jira-achuuf nageenyi naannoo isaanii eegamuufii qaba. Miidhaa diidaa itti dhufu of irraa ittisuuf humni qindaa'e jiraachuun barbaachisaa dha. Kanaafis, walitti dhufeenyi hawaasaa cimuu qaba. Miidhaa adda addaa irra gahu of irraa ittisuuf fi ummata bulchuuf qaa-mni mootummaa jedhamu uumame.

Itti gaafatamummaa kana haalaan bahuu fi dhimmoota kan biroo raaw-wachuuf mootummaan lammileen irraa maallaqa, deggarsa humnaa ,fi qabeenyaa argachuun barbaahisaa ta'e.

Yeroo baay'ee kaffaltiin lammileen mootummaa isaaniif kaffalan gibira jedhamee waamamuu eegale.

Gabaasa Kadijja fa'a irraa akka hubattanitti gibirri namoonni bakka tokkotti gurmaa'anii mootummaa tokko jala buluu yeroo itti eegalanii kaasee kan uumame dha. Yeroo sana irraa kaasee mootummaan ummata bulchu irraa gibira funaanaa kan ture ta'uun isaa ibsamee jira. Kanaaf,yeroo san irraa kaasee gibirri madda galii ijo mootummaa ta'ee tajaajiluu eegale. Galiin gibira irraa argamu faaydaa ummataa eegsisuuf ooluu eegale. Fak-keenyaaaf,miidhaa diidaa dhufuu fi nageenya biyya keessaa kabajsiisuun kan danda'ame maallaqa bifaa gibiraan funaanamuun ture.Yeroon booda garuu faaydaa ummataaf ooluun isaa hafee gita bittoonni muraasni itti fayyadamuu eegalan.

Gilgaala - 9

Gaaffilee armaan gadii deebisaa

1. Mootummoonni durii addunyaa keessatti argaman qashii fi qabeenya bifaa gibiraan funaanan maal maaliif oolchaa turan?
2. Namoonni tajaajila akkamii argachuuf barbaadaniit gibira kaffaluu jalqabanii?

4.5.2. Akaakuu Galii Gibirri Irraa

Funaanamu

- Akaakuu gibiraan namoonni mootummoota isaaniif kaffalaa turan tarreessaan.**

Gabaasa kadijjaan fa'a -kutaa 3^{ffaa}

Akaakuu gibiraan kan durii fi ammaa

A. Akaa kuugibiraan durii. Mootummooni bara durii galiiwaan adda addaa irraa gibira funaanaa turan. Gibirri yeroo baay'ee maallaqaa fi oomisha adda addaa irraa kan argamu ta'us yeroo tokko tokko namoonni hojii humnaa hojjechuun dirqama gibiraa ni bahu. Booddee irratti gibira humnaa fi dhiibbaadhaan kaffalchiisuun babal'-achaa dhufe. Bu'uura kanaan haalli kaffaltii gibira haqummaa dhabuu jalqabe. Fakkenyaaf, namoonni gibira humna isaanii ol ta'e akka kaffalan yoo taasifamu warri kuun immoo gibira irraa walaba ni ta'u ture. Gara harka caalu namoonni qabeenyaa fi aangoo qaban kaffaltiin gibira isaan hin ilaalu ture. Akkasumas gibira bu'aa hawaasatiif oolchuun hafee faaydaa namota aangoo irra jiraniif ta'uu jalqabe.

B. Akaakuu galii yeroo ammaa gibirri irraa funaanamu :

Haalli funaansa gibiraan yeroo dha yerootti jijiiramaa kan deemu dha. Akaakuun gibiraan baraa baratti ykn mootummaa irraa motummaatti gargar dha. Akkasumas gosni gibiraan biyyaa

biyyatti gargar dha Sirna dimokraasii keessatti haalli gibirri itti funaanamu sadarkaa fooyya'aa irra jira. Gibirri eenyuuf, maaliif akkasumas galiiwan kam irraa akka funaanamu seeraa fi dambiidhaan gargar bahanii tarreffamu.

Gabaasa irraa akka hubattanitti akaakuun galii gibirri irraa funaanamu yeroodhaa gara yerootti jijiiramaa deema. Fakkenyaaf, bara durii gibirri maallaqaan qofa kan kaffalamu hin turre. Oomisha adda addaa fi tajaajila humnaa kennuudhaan dirqama gibiraan lammilee irraa eegamu bahaa turan. Yeroo ammaa adeemsii fi sirni gibirri itti sassaabamu fooyya'ee jira.

Gibirri akaakuu adda addaa irraa funaanama Yeroo ammaa biyya keenya keessatti haala fooyya'aa ta'een madda adda addaa ykn naannoo adda addaa irraa ni funaanama. Bu'urri ykn akaakuun gibiraan kan armaan gadii ti. Qonna,daldala akaakuu adda addaa, galii mindaa irraa argamu, warshaalee fi albuuda, horsiisee bulaa, dameewwan tajaajila adda addaa, fakkenyaaf turizimii fi hoteela wkf.eeruun ni danda' ama.

Gilgaala - 10

Gaaffilee armaan gadii deebisaa

1. Haalli kaffaltii gibira biyyoota adda addaa walfakkaata jett-anii yaadduu? Maaliif?
 2. Kanneen armaan gadii keessaa warri keessan akaakuu galii kam irratti gibira akka kaffalan tarreessaa.
- Lafa qonnaa
 - Daldala
 - Mindaa
 - Mana jireenyaa
 - Lafa itti fayyadamaa jiran
 - Iddoo gabayaa
 - Televizynii (TV)
 - Bilbila
 - Ibsaa
 - Misooma horii

4.5.3. Gibira Haqummaan Kaffaluun Dirqama Lammummaati

- **Gibira kaffaluun maaliif dirqama lammummaa ta'e?**
- **Lammiin biyya tokkoo gibira kaffaluuf naamusa akkamii qabaachuu qaba?**

Gibirri fedhiin kan kaffalamuu fi dirqama lammummaa ti. Sirna dimokraasii keessatti kaffaltiin gibiraa akka idaatti hin fudhatamu. Gibirri baasiif faaydaa waliiniif oolu jechuun dhabbilee tajajila adda addaa kennan, daandii hojjechuuf, akkasumas han-

qina maallaqaa nageenya biyyoolessaaf oolu argachuuf jecha sirna diriiru ta'uun isaa ummanni ni hubata. Haala kanaan lammiin hundi gibira kaffaluun dirqama lammummaa ta'uun isaa bee-kuun gibira yerootti kaffaluu qaba.

Biyyoota misoomaan guddatan keessatti gibira yeroon kaffaluu dhiisuun yakka seeraan nama gaafachisuu dha. Kanaan alattis gochiakkanaa hawaasa biratti fudhatama waan hin qabneef maqaa nama xureessa. Kanaaf, hanga gibiraa kaffalamuu qabu murteessuuf akka gargaaru lammiin hundi galii isaa ilaalchisee ragaa dhugaa ta'e kenuutu irraa eegama.

Gigaala - 11

Gaaffiwwaan armaan gadii gareen irratti mari'adhaa

1. Lammiileen gibira seeraan kaffaluu yoo baatan rakkoo maaltu uumamuu danda'aa?
2. Kaayyoon gibiraa bara durii kan bara ammayyaatiin maa-liin gargar ta'e?

Yaada xumura boqonnicha

Hojiwwaan loogji iddo fi yeroo adda addaatti raawwatamu. Dhaabbilee hawaasummaa hunda keessattis ni mul'-atu. Sababonni loogiif nama kak-aasan hedduu dha. Haa ta'u malee hundi isaaniituu kan hojjataman dhala namaatiin yoo ta'u, isa kana dhabamsiisuuf lammileen hundi hojiwwaan loogii irraa of qusatuu qabu. Gocha akka kanaa yoo arganis mormuutu irraa eegama. Gama birootiin gochawwaan loogii raawwataman dhabamsiisuuf wanti kan biraa hojjetamuu qabu dhaabbiilee hawaasummaa humna namaa fi meeshaalee adda addaan gurmeessuu fi tamsa'inni isaaniis akka sirraa'u gochuu dha. Kana hunda gochuuf hawaasni deggarsaa fi tumsa barbaachisaa ta'e gumaachuun irraa eegama.

Dhimmoota sarbamuu mirgaa fi hir'ina haqaaf sababa ta'an keessaa mirgi lammii kabajamuu dhabuu, aangoo ummata irraa kennameef seeraan ala itti fayyadamuu fi namoota walqixxummaan keessummeessuu dhabuu dha. Kanaaf, ummata keessatti haqa itti fufiinsaan diriirsuuf hojmaata haqummaa qaban hojii irra oolchuu, qaamoleen seeraa haala aangoo kennameefin tajaajila akka kennan gochuu fi lammiin hundis tajaajila haqa qabeessa ta'e argachuuf kaka'umsa akka horatan gochuun barbaachisaa dha.

Gama birootiin lammiin kamiyyuu gibira yeroon kaffaluuf dirqama kan qabu ta'uu beekee dirqama isaa kana bahuu qaba. Adeemsa gibira funaanuu keessatti lammiin kamiyyuu galii argatu ilaalchisee ragaan mootummaaf kenu dhugaa irratti kan hundaa'e ta'uu qaba.

JECHOOTA IJOO

Miidhaa:- gocha seeran ala ta'ee nama miidhu

Seera:- sirna ummanni ittiin walii galee bulu

Dambii :-Qajeelfama ykn ajaja eenyu, maal akka hojjetu ,akkamitti akka hojjetuibsu

Nageenya Biyyolessaa:Haala nageenya biyyaa

Qaama gurmaa'e:- kaayyoo tokko galmaan gahuuf jecha humna gamtaan ijaarame

Mootoota:Namoota ummataan otuu hin filatamin maatii isaanii irraa dhaaluun
ummata bitan,Sirna bittaa nugusaa

Abbaa qabeenyaa :Namoota ykn garee dameewan adda addaa irratti qabeenya
isaanii misoomaaf oolchuu

Gaaffilee keessa deebii

I. Gaaffilee armaan gadii dhugaa ykn soba jechuun deebisaa

1. Dhaabbileen hawaasummaa gahaan bakka jiranitti hojmaanni haqummaa hojii irra ni oola
2. Gahumsi dhaabbilee hawaasummaa kan mirkanaa'u meeshaaleen gahaan yoo guutamaniif qofa dha
3. Darbee darbee loogii hojjachuun barbaachisa dha.
4. Sirna dimokraasi keessatti gibira kaffaluun dirqama lammii hundaa ti.
5. Hojmaata loogii bakka adda addaatti mul'atuuf sababni isaa wal fakkaataa dha.

II. Yaadoota "B" jala jiran kan "A" jala jiraniin walitti firoomsi

"A"

1. Fira fi wal beekumsaan hojjechuu
2. Dirqama lammummaa
3. Hanqina meeshaalee guuttachuu
4. Ragaa sobaa irratti hundaa'uun murteessuu
5. Seera kabajuu

"B"

- A. Hanqina dandeettii ykn ogummaa
- B. Karaa haqummaan ittiin mirkana'u
- C. Loogii
- D. Hanqina haqummaa
- E. Gibira kaffaluu
- F. Dhaabbilee hawaasummaa

III. Iddoo duwwaa armaan gadii jecha ykn gaalee yaada sirrii ta'een guutaa

1. Lammileen haala galii isaanii iraatti hundaa'uun kaffaltiin kaffalan _____ jedhama.
2. Dhaabbileen hawaasaa hundi tajajilli isaan kennan _____ ta'uu qaba.

IV. Gaaffilee armaan gdiif deebi sirrii ta'e filachuun deebisaa

1. Haqummaan gibiraa kan mirkanaa'u gochawwan armaan gadii keessaa isa tokkoon dha.
 - A. Lammileen haala galii isaanitiin yoo kaffalan
 - B. Lammileen hundi gibira walqixa ta'e yoo kaffalan
 - C. Hoggantoonni gibira irraa walaba yoo ta'an
 - D. "A" fi "B"n deebii dha.

2. Kanneen armaan gadii keessaa madda gibiraa kan ta'e
A. Qonna C. Daldala
B. Mindaa D. Hundu deebii dha

3. Iddoowwan loogummaan itti raawwatamuu danda'u isaan kam?
A. Ganda C. Mana barnootaa
B. Dhaabbilee haqaa D. Hunduu deebii dha.

4. Cabuu haqummaatiif sababaa kan hin taane isa kam?
A. Maallaqaa fi faaydaa adda addaan hojechuu
B. Seeraan ala aangootti fayyadamuu
C. Haqummaa hir'isuu
D. Mirga namootaa kabajuu

5. Mirgoonni lammiiilee akka kabajaman maaltu godhamuu qaba?
A. Seeratti fayyadamuu C. haqummaa diriirsuu
B. Humnaan mirga kabajsiisuu D. 'A' fi 'C'n deebii dha

VI. Gaaffiilee armaan gadiitiif deebi gabaabaa kennaa

 1. Manneen barnootaa keessatti hojmaanni haqummaa akka diriiru itti gaafatamummaa tokkoon tokkoon keessan irraa eegamu tarreessaan
 2. Loogii hambisuuf waantoota ta'uu qaban jettan tarreessaan.

VI. Gaaffiilee armaan gadiitiif deebi gabaabaa kennaa

1. Manneen barnootaa keessatti hojmaanni haqummaa akka diriiru itti gaa-fatamummaa tokkoon tokkoon keessan irraa eegamu tarreessaan
 2. Loogii hambisuuf waantoota ta'uu qaban jettan tarreessaan.

BOQONNAA SHAN

JAALALA BIYYAA

kaayyoolee boqonnaa :Boqonnaa kana
barattee yoo xumurtu:

- *Wantoota jaalala biyyaa ibsan ni hubatta.*
- *Faaydaa seenaa biyyaa beekuun jaalala biyyaa cimsuu irratti qabu ni bar-atta.*
- *Kaayyoo kenna tajaajila tolaa ni hubatta.*
- *Karaa lammummaan ittiin argamu ni beekta.*

5.1 Jaalala Biyyaa

5.1.1 Haalawwan Jaalala Biyyaa Cimsuuf

Barbaachisoo Ta'an

Warra afaan baayyee warra yeeduu hedduu. Seenaa boonsaa keenya kan addunyaatti dhagahamu. Karaan misoomaa keenya daandiin ishee bal'aa.

Nu ummata nagaa abbaa abdii guddaa Handarii bifa tokkoo waliin balali'an Warra bifa hedduu tokkummaa jabeesee waliin bareechisu. Nu ilmaan Itoophiyaa waadaa siif haa gallu

Guddina misoomaaf simaaf haa wareegamnu. Dhiigaa fi onnee keenyas sirraa hin hanbifannu.

(Barruulee <<Hibra Biheer >>

Sadaasa 2000 irra kan fudhatame)

- ***Walaloon armaan olitti dhiy-aate qabiyyeen isaa maal akka ta'e ibsi?***
- ***Walaloo kana keessatti waa-yeen sabaa fi sab-lammoottaa haala kamiin ibsame?***

Falmii Barattootaa

Barattoonni mana barnoota Adawaa Dil ji'oota sadii sadiin sagantaa falmii qabu. Falmitoonni ji'a kanaa barattoota kutaa jahaffaa daree "A" "B" fi "C" ti. Mata dureen falmiif dhiyaatan "Haalawwan jaalala biyyaa cimsuuf barbaachisoo ta'an" kan jedhuu dha.

Barattoota daree "A" bakka bu'anii kan falman Bitsa'atii fi Hayyaloom dha. Barattoonni kun lamaan mata dureen isaan falmiidhaaf filatan "Jaalala biyyaa cimsuuf mirgi namoota dhuunfaa fi garee kabajamuu qaba" yaada jedhamu dha.

Mata duree kana keessatti qabxiilee akkamii falmii irratti yoo dhiyeessan mooyachuu akka danda'an yaada hiriyoota daree isaanii waliin mari'achaa jiru.

Barattota Daree “B” bakka bu’anii kan falman immoo Obsee fi Abiloo jedhamu. Barattooni kunneen lamaan mata dureen isaan falmiif qopheessan “Jaalala biyyaa cimsuuf hojmaanniloog-ummaa baduu qaba” kan jedhoo dha

Barattooni daree isaaniillee qabxiilee falmii barattooni kun dhiyeeffatan irratti hundaa’aniigorsa kanatti aanu kennaniifii jiru.

- A) Biyya keessatti haalli murtiin haq-ummaa itti kennamu hojmaata loog-ummaatiin kan guutame yoo ta’e jaalalli lammileen biyya isaa-niitiif qaban ni xinnaata
- B) Dubartootaa fi warra dhiiraa gidduu carraan barumsaa fi hojii argach-uun loogummaan kan hojjatamu taanaan jaalalli lammileen biyya keenyaaf qaban ni hir’ata
- C) Namni Kamiyyuu uumamaan walqixa waan ta’eef daa’imman, dubartoona akkasums jaarsootaaf eegum-sii fi kunuunsi addaa god-hamuufii hin qabaatu.

Barattoota daree “C” bakka bu’anii kan falman Ababaayyehushii fi Ahimad dha.

Ababaayyehushii fi Ahimad qabxileen isaan falmiif dhiyeessan mata dureen isaa “seenaa naannoo fi biyyaa beekuun jaalala biyyaa akka cimsu godha” kan jedhu dha. Ababaayye-hushii fi Ahimad qabxiin falmii isaanii kan xiyyeeffate qabxiilee gurguddoo sadu irratti.

1. Miirri jaalala biyyaa seenaa maatii qo’achuu fi haalan beekuu irraa eegaluun guddata.
2. Naannoo keenyatti iddoowan adda addaa kan akka hambaalee, seenaa fi aadaa sabaa fi sablammootaatiif ilaalcha addaa yoo kennine miirri jaalala biyyaaf qabnu ni daraara.
3. Seenaa boonsaa biyya keenyaa irratti beekumsa gahaa ta’e yoo qabaanniemiirri jaalala biyyaaf qabnu bu’ura gaarii akka qabaatu ta’a.

Gilgaala 1

Bu’ura barreffamaatiin gaaffilee armaan gadiitiif deebii kennaa

1. Bitsa’aatii fi Hayyaaloom falmii ture mo’achuu akka danda’an mata duree isaanii jalatti qabxiilee akkamii dhiyeessuu akka qabaatan gorsa kennituuf?
2. Hiriyooni Obsee fi Abiloo qabxiilee falmiif ta’an jech-uun qabee A-C tti kenn-aniif irratti walii galtuu? Irratti mari’-adhaa.
3. Ababaayyehushii fi Ahimad qa bxilee tokkoo tokkoon isaanii kaasuu qabaatan ilaalchisee hiriyoota daree keetii waliin gareen irratti mari’adhaatii gabaasa barreffamaan qoph-eessuun barsiisaa kees-saniif dhiveessaa?

Miirri jaalala biyyaa kan cimu lammii tokkoon tokkoon isaa mirgi dhuunfaa fi garee loogummaa irra walab ta'e yoo kabajameef dha. Mirgi sabaa fi sablemmootaa yoo kabajame, olaant-ummaan seeraa yoo mirkanaa'e, jabaatanii barachuu fi hojjachuun aadaa lammii hundaa yoo ta'e, miirri jaalala biyyaa ni guddata. Haa ta'u malee, mirgi lammileeeyoo hin kabajamin, lafa biyyattii (lafa, tulluuwwan, laggeenii fi biq-iltoota) kophattaa jaalachuu qofti mataa isaatiin gatii hin qabu. Hawaasni hojimaatni loogummaa itti daraare keessa jiraatu miira jaalala biyyaa osoo hin ta'in miira dukka-naa'aa ta'e qabaata.

Biyya balaa kamirraayyuu ittisuu fi, mataa ofiillee wantoota miidhaa biyya irra geessisuu danda'an irraa eeguun, mallattoo lammii biyya ofii jaalatuu ti.

Gilgaala - 2

**Barreeffama armaan olitti
dhiyaate ka'umsa godhac-
huudhaan gaaffilee armaan
gadii hiriyoota keessan waliin
irratti mari'adhaa.**

1. Teessuma lafaa qofa dinqisiifachuun jaajala biyyaaf qabnu mul'isuu hin danda'u kan jedhame maalif?
2. Hawaasa loogummaan keessatti hin mul'anne kee-ssatti, bu'aan wal jaalachuu fi wal kabajuu maal ta'uu danda'a?
3. Isin biyya keessan jaalachuu keessan maal gochuudhaan mul'istu?

5.2 Gocha Miidhaa Qabuu Fi Isa

Badaa Ta'e

5.2.1. Qabeenyaa Tajaajila Waleetiif Kun uunsa Gochuu Dhiisuu

- **Qabeenyaa tajaajila walee kannen jedhaman kam fa'i?**

Gocha fakkeenya gaarii ta'u

Manni barnootaa <<Iwqat Faanaa>> gumii beekamaa "jaalala biyyaa" jedh-un moggaafame qaba. Gumiin jaalala biyyaa jedhamu kun miseensooni isaa barsiisootaa fi baratota dha. Misseenonni gumii kanaa yeroo hunda sochii fakkeenya gaarii ta'e godhaniin, dhabbata beekamaa addunyaaleessaa "UNICEF jedhamu irraa badhaasa addaa argachuu danda'aniiru. Yeroo dhiyoo kana dallaa mana barnootaa isaanii keessatti egzibiis-hiniin isaan qopheessan daawwatoota hedduun dingisiifamee jira.

Qophiin daawwanna (egzibiishinii) kun kan dhiyaate ayyana waggaan ma-na barnootaa irratti waan ta'eef maa-tiin barattootaa hedduun argamanii turan. Qophiin dhiyate kun kutaa saditti kan qoodamee dha. Qabiyyeen qophii kanaa akka armaan gaditti dhiyaatee jira.

Agarsiifni qophii kutaa jalqabaa kan dhiyaate mana kitaabaa mana barnootichaa keessatti dha. Gara mana kitaabaa yeroo seenamu fakkiiwan kitabbilee adda addaa keessaa tatarsa-asanii fudhatamuu isaanii agaersiisu ni

mul'ata. Dhaaba mana kitaabaa irratti barreeffamni "dhaloонни nu gaa-fata" jedhu barreeffameera.



Fakkii 5.1 Kitaabilee babbaqaqanii fi manca'an

Agarsiisa kutaa lammaffaa keessatti immoo eegumsa dhabuu irraa kan ka'e meeshaalee caccaban kan akka teessoo, gabatee gurraacha, minjaalotaa fi meeshaaleen mana yaalii walitti qabamaniiru. Dhaaba kutaa kanaa irratti <<Meeshaaleef of eeggannoo gochuu dhabuun nu jalaa caccaban>> jedhu ni jira.



Fakkii 5.2 Teessumaa fi minjaalota caccaban

Agarsiisa kutaa sadaffaa keessatti yaadannoo fi kitaabbilee barattootaan biinxaman, kobbee ykn qalama manca'ee fi qubeessawwan xixiqoon walitti qabamanii mul'atu. Dhaaba daree.

kanaa irratti barreeffamni "kana keessaa kan kee isa kam?" jedhu barr-eeffameera



Fakkii 5.3 Qalamootaa fi qubeessaa bulga'ee fi cacca be

Qophiin xumuramee keessumoonni kutaalee keessaa yeroo bahan, barattoota balbala irra dhaabbatanii keessumeessaniin kaardiin xixinnoon ni qoodamaaf. Yaadni kaardiilee kana irratti barreeffame"Nuti takcaa dantaa dhabummaan nu irratti murteeffameera. Kitaabbilee fi meeshaalee barumsaa hafaniif kunuunsi akka godhamu amaanaa dhaammanneerra." jedha.

Gilgaala -3**Gaaffilee armaan gadii
deebisaa.**

1. Agarsiisni armaan olitti miseensota “gumii jaalala biyyaa”tiin dhiyaate miira akkamii isin keessatti uumee jira?
2. Isin hoo meeshaalee walee mana barnoota keessanii akkamitti kunuunsitanii qabodu?

Mana barnootaa keessatti meeshaaleen tajaajila waleetiif oolan adeemsa baruu fi barsiisuutiif murteessaa dha. Biyyi keenya qabeenya muraasa qabdu irraa meeshaalee tajaajila waleef oolan manneen barnootaat iif akka guutaman godhaa jirti. Barattoonis meeshaalee kana of eeggannoona qabuu qaban. Teessoon of eeggannoona qabamuu dhabuu irraa kan ka'e yoo cabe kan miidhamu barataa dha. Dareen barattoonni keessatti baratan keessi isaa yoo bubuqqa'e miidhamuu fayyaaf kan saaxilamu barataa fi barsiisaa dha.

Meeshaalee barumsaa dhuunfaa fi waleen itti tajajilamnu of eeggannoona qabuu dhabuun kan miidhu matuma keenya, maatii fi biyya dha. Kana waan ta'eef lammuin kamiyyuu mees-haalee kana of eeggannoona qabuuf itti gaafatamummaa qaba.

Hojii Garee

1. Meeshaalee tajaajila walee mana barnoota keessanii tarreessuun, meeshaaleen kunneen miidhaan akka irra hin geeny, akkamitti akka qabamuu qaban gareenirratimari'adhaati gabaasa barreeffamaan barsiisaa keessaniif dhiyeessa.

**5.2.2 Balfaa Iddoo Adda Addatti Gat-uu,
Mana Fincaaniitti Seeraan
Fayyadamuu Dhabuu**

- *Mana fincaaniitti sirnaan fayyadamuu dhabuu fi balfaa bakka adda addaatti gatuun rakkoo attamii fiduu danda'a?*

Iskaawutoota ganda qulqulluu

Dargagoonni ganda qulqulluu walghanii garee Iskaawitii hundeessaniiru. Gareen Iskaawutii kun miseensoota kudha lama kan qabu yoo ta'u hojiin ijoo isaanii qulqullina naannoo isaanii eeguu dha. Miseensoota kanaaf, uffata danbii qopheessee kan kenneef waajjira ganda isaanii ti. Dargaggoonni kenneen ganda jirenya isaanii keessatti sagantaa mataa isaanii qopheeffatanii ganda keessa naanna'uun ni qulqulleessuu. Haala qulqullinaa ni to'atu. Boollti bishaan keessa yaa'u akka hin cufamne, dirreen isaan itti taphatan akka hin xuroofne qabatamaan hirmaachaa to'annaa geggeessu. Jiraataan naannoo sanaa balfa iddo argetti akka

hin ganne barumsa kenu; barreeffamaa fi poostaroota adda addaa maxxansuun hawaasa ni kakaasu. Miseensoonni iskaawutii kun fakkeenya gaarii ta'uudhaan hojjatanii hawaasas hojjachiisu. Barreeffama naannoo isaaniiiti maxxansan keessaa:-

“Balfi abbuma xureessa”

“Anii fi balfi wal hin agarru”

“Naannoo kiyya qulqullinaan haa beekkamtu”

“Manni fincaanii kiyya qulqulluudha”.

“Ani naannoo kiyyatti dantaa dhabummaan beekamu hin qabu” kan jedhaman fa'atu keessatti argama.

Naannoo iskwutoonni jiraatan keessatti namoonni balfa iddo arganitti gatan yookiin karaa irratti harcaasan hin mul'atan. Namoota mana fincaanii tajaajila waleetiif oolu karaa danta dhabummaan itti fayyadamanii fi fayy-aa hawaasaa balaa irra buusaniif akksumas namoota gocha yaraa raawwatan, namoota naannoo irraa filatamaniin adabbiin irratti murtaa'a.

Namoonni kamiyyuu hojiwwan misesensota Iskaawutiitiin hojjataman ceephaniif fi hojiin akka hin hojjatamne dura dhaabataniif gufuu ta'an, namoota filatamaniin ni adabamu. Haaluma kanaan bakkeewwan kanaan dura balfi itti gatamaa turan yeroo ammaa bakka biqiltuuwwan itti oomishaman ta'anii jiru. Meeshaan balfi itti haramuu

fi manni fincaaniis qulqullinni isaanii eegamuu danda'ee jira. Fakkeenya gaarii dargaggoonni raawwatan kana irraa ka'uudhaan gandichi maqaa “qulqulluu” jedhuun moggaafamee jira.

Gilgaala 4

Haala barreeffamaatiin gaaffilee armaan gadii deebisaa

1. Gochi Iskaawutoonni ganda qulqulluu, barumsa akkamii akka isinii dabarse hiriyoota keessaniif ibsaa.
2. Haalli qulqullina naannoo keessanii maal fakkaata?
3. Naannoo keessan keessa dargaggoonni akka iskaawutoota ganda qulqulluu kanatti fakkeenya gaarii ta'an jiruu?



Fakkii 5.4 Balfaan haalaan yoo gatamuu baate fayyaa irratti rakkoo fida.



Fakkii 5.5 Manni fincaanii waliin fayyadaman qulquullini isaa egamuu qaba

- **Fakkiiwan kana irraa maal barattuu?**
- **Naannoo keessanitti rakkoon akkanaa ni mul'ataa?**

Balfa iddo argametti gatuu fi harc-aasuun fayyaa irratti miidhaa guddaa geessisa.

Naannoon keessanitti iddoon balfi itti gatamu qulqullinaan yoo qabamuu baate tisiisni balfa irraa ka'u fayyaa jiraattota naannoo irratti rakkoo fida. Sareen talaallii hin argatin, waraabessii fi bineesoonni adda addaa naannawa balfaa kanaa waan hin dhabamneef miidhaa olaanaa ta'e fiduu ni danda'u. Mana fincaanii of eeggannoodhan qabuu dhabuu irraa kan ka'e jirattooni naannoo dhukubaalee daddarbaan miidhamuu ni danda'u. Gochawwan akka kanaa of eegganna gochuu dhiisuun raawwatan akka sirra'aan dargaggooni hojji qabatamaa ta'e hojjechuu danda'u.

Gilgaala – 5

Gaaffilee armaan gadii irratti mari'adhaa.

1. Rakkolee naannoон xuraa'uu fi manni fincaanii haalaan qabamuu dhabuun kan ka'e uumamuu danda'an irratti gareen mari'adhaa.
2. Dhimmoota naannoo keessanitti dantaa dhabummaan raawwatan irratti gareen mari'adhaa.
3. Barreeffama gabaabaa tokko mata duree "Naannoo kiyya qulqullinaan eeguun gahee koo ti" jedhuun qopheessaa.

5.3 Amaloota Gaarii

5.3.1 Gocha Badaa Kamiyyuu Mormuu

"Jaannataa fi azaabni jiraatus jirachuu baatu, Hammeenyaa irra gaarummaa wayya" (Jechama ummataa)

- **Jchama ummataa kun amala gaarii akka jabeeffannu barumsa akkamii nuu kenna?**

Saree Amanamaa

Qotee bulaan tokko saree baayyee jaallatu qaba ture. Sareen kun amanamaa fi amala isaatiin kan galatoofamee dha. Sareen kun mana gooftaa isaa dammaqinaan eegaa ture. Binen-sotiin biroo dallawaa fi horii isaa akka itti hin uggaamne dammaqinaan irraa ittisaa ture. Sababa saree kanaatiin

hattuun mana qotee bulaa kanaa itti uggamuu hin dandeenye. Qotee bulaan kun yeroo tokko waan rakkateef namicha dureessa tokko irraa saree kana qabsiisee qarshii liqeeffate. Qars-hiin liqeeffate xumuramee hanga kaff-alamutti saricha abbaa qarshii irraa liqeeffateef dabarsee kenneera. Sareen kun rakkoo goftaa isaa hubatee haaluma kanaan dura mana goftaa isaa eegaa tureen manaa fi qabeenya gooftaan isaa qarshii irraa liqeeffatee dammaqinaa fi amantummaan hatt-oota irraa ittisuun tajaajiluu jalqa-beera. Guyyaa tokko ilmi namticha maallaqa liqeessee dhibamee siree irra ciisaa jiruu bofti guddaan tokko mana irra looyaa dhufe. Saree kun sochii bofti gochaa jiru kana hordofaa waan tureef saffisaan qabee cicciree ajjee-ssuun daa'imni kun bofaan akka hin nyaatamne godheera.

Goftaan lammaffaan saree kanaa gocha gaarii saree kanaan raawwata-meen waan gammadeef, saricha gara goftaa isaa duraatti deebisuuf murt-eesseera. Haaluma kanaan morma saree kanaa irratti xalayaal galataa raraasee gara goftaa isa duraatti akka deebi'u eebbisee geggeesse. Yaa ta'u malee,namni armaan dura sareen kun hattummaan saaxilee fi goftaa saree kanaa hin jaalanne tokko saree fi goftaa saree wal-lolchiisee saree kana irra miidhaan akka gahu toftaa tokko umee. Namichi kun dursee gara mana goftaa sarichaa deemuudhaan, sareen

kun goftaa isa lammaffaaf akka ajaj-amuu didee fi namtichis saricha gara isaatti deebisuuf akka yaadaa jiru soba qindeessee itti hime. Goftaan saree inni duraa gocha saree kanaatti gadduudhaan maallaqa liqeeffatee deebisuuf qabatee gara namicha maallaqa irraa liqeeffatee deemaa osoo jiruu, sareen kun immoo gara goftaa isaa kan duriitti dhufaa osoo jiruu karaa irratti walitti dhufan. Sarichis goftaa isaa yeroo argu haaluma kanaan duraatiin jaalala qabuuf ibsuufii eegale. Haa ta'u malee goftaan sarichaa badii sarichi namticha mallaqaa irraa liqeeffatee irratti raaw-wate jechuun itti himame irraa kan ka'e sarichi badee gara mana goftaa durii galaa kan jiru waan itti fakkaateef ulee qabatee deemuun al-tokko yoo rukutu sarichi battaalamatti du'e. Qotee bulichi dhaabbatee gaddee reeffa sarichaa osoo ilaaluu xalayaaa morma sarichaa irratti hidhame arge. Xalayaaa kana saaqee yoo dubbisu, gocha gaarii sareen kun raawatee kan ibsuu fi xalayaal galataaf barreffame ta'u isaa hubate. Gocha gaarii sareen kun qabuun dureessi liqaa qotee bul-aaf liqeessee ture kan dhiiseef ta'u kan ibsu ture. Goftaan sarichaa xalayaal ilaalee icciticha erga beekeen booda mararfatee boo'uudhaan gochi raawwate kun garaa isa nyaatee gadd-uu eegale.

(madda Kabbadaa Mikaa'el hiibboo fi Mammaaksa, Kitaaba lammaffa maxxensaa 6ffaa bara 1994)

Gilgaala - 6

**Seenaa armaan olitti ibsame
bu'uura gochuun gaaffilee
armaan gadii deebisaa.**

1. Gaarummaan amala saree haala kamiin ibsame?
2. Sarichi loogii tokko malee mana goftaa isaatii fi mana nama goftaa isaatii maalla liqeesseef walqixxu-mmaan tajaajilaa ture. Gocha kana irraa maal baratte?
3. Sarichi du'uu kan danda'e sababa maaliin ture?
4. Sareen haala kanaan hattuu saaxiluu fi gocha gaarummaa qabu yoo agarsiisu, isin irraa amala akkamiitu eegama jettanii yaaddu?

Amalli gaariin namummaa nama tokkoo jaalatamaa taasisa. Amalli gaariin duursa irratti abbaa fayyada. Namni amala gaariin yeroo hundaa galatoonfamu gammachuun argata. Nama dhukkubsate gaafachuun, nama rakkate gargaaruun, nama abdii kutate jajjabeessuun, namoota hangafaa fi quxisuu ta'aniif kabajaa sirrii ta'e kennuun, fedhii keenyaan qofa kan raawwatan osoo hin ta'in, dirqama namummaa keenyaas dha. Amalli gaa-riin narratti mul'atu namoota birootiif faayidaa kan qabu ta'ee argama. Amalli gaariin miseensoota maatii, ollaa, naa-

nnoo, hiriyaan mana barnootaa, hawaasa naannoo biratti namni gaariin kan ittiin beekamu dha. Namoonni amala gaarii hin qabne fudha tamni hawaasa keessatti qaban baayyee gadaanaa dha.


Gochaalee namoota biroo miidhuu danda'anii fi hojimaata loogummaa qaban ciminaan mormuun, gocha amala gaarummaa isa biroo ti. Fakkeneenyaaaf, namni naannoo keenyatti hanna irratti bobba'e jiraachuu isaa osoo beenknuu maaltu na galche jennee yoo bira dabarra ta'e nullee badii raawwataamaa jiruuf deggarsa keennuu keenya akka ta'e hubachuu qabna.

Nama tokko hattuun miidhaa irraan gahaa jiraachuu osuma agarruu kan bira dabarru taanaan gama biraatiin nu illee rakkoon wal fakkaatu osoo nu qunnamee gargaarsa nama biraan haala kamiin gaafachuun dandeinya?

Gilgaala- 7

1. Gabateeewwan armaan gadii yaadannoo keessan irratti gara galchuun, amaloota jajjabeef-famuu qaban jettanii fi gochaalee mormuu qaban adda baasuun agarsiisaa.

Amala gaarummaa jajabeffamuu qabu	Gocha badaa mormamuu qabu
- Mana keessatti 1.Fkn.Angafaaf ajejamuu 2. 3.	- Mana barnootaa keessatti 1. Fkn.Namoota meeshaalee tajaajila walee balleessan kallatiin saaxiluu dhabuu 2. 3.
- Mana barnootaa keessatti 1.Fkn.. Yeroo kabajanii barumsa irratti argamuu 2. 3.	- Naannoo keessatti 1. Namoota qulqullina naannoo irratti rakkoo uuman ifaan mormuu dhabuu 2. 3.
Naannoo kootti 1. Fkn.Gocha fakkeenya gaarii ta'e raawachuu 2.	- Mana keessatti 1.Sobaan miseensota maatii walitti buusuu 2.



5.4. Hiyyummaa Dhabamsiisuu

5.4.1. Imaammataa Fi Tarsiimoo

**Misoomaa Hiyyummaa
Balleessuuf Barbaachisan**



Fakkii 5.6 Jabaatanii hojjechuun hiyyummaa dhabamsiisun ni danda'ama.

- Fakkii tokko kan birootiin wal-bira qabuun, ergaa maalii akka dabarsan hiriyoota keessan wal-in irratti mari'adhaa?*

Ijoollee Ganda Iffooyitaa

Wanti Daamxee, Bongar, Radaa'i fi Saaguree akka beekaman godhe amala godhee isaan qaban ture .Dargaggooni kun hundi, ni hatu, ni mach-aa'u, araada adda addaaf kan saaxi-laman turan. Amala badaa ijoolleen kun

qabaniin maatii fi namoonni naannoo bayyee gaddaniiru. Yeroo hundaa poolisiin qabamanii waan hidha-maniif, yoo qe'ee irraa dhabaman, Damxeen faan eessa dhaqan yoo jedhamu "Komboloojoo" galanii jiru jedhamaa ture. Komboloojoo kan jed-han mana hidhaan dha. Umrii isaanii walakkaa isaa bifa kanaan erga jiraa-tanii booda, dargaggeessa fakkeenyaa garii ta'ee fi naannoo Birbirsoo jedh-amu keessa jiraatuun jireenyi isaanii jijiirame.

Tattaaffii cimaa Birbirsoon godhaeen dargagoonni arfanuu araada adda addaa irraa walaba ta'aniiru. Keessattuu haala imaammata misoomaa fi tarsiimoo mootummaan dagaggoonni fayyadamoo akka ta'an baaseen karaa waajjira ganda isaaniitiin konkolaataa dhiquu akka eegalan haalli mijaa'eefii jira. Daamxee, Bongar, Radaa'i fi fi Saagureen amanamummaa fi damma-qinaan konkolaataa dhiquu waan eeg-alaniif maamm iltoota isaanii biratti yeroo gabaabaa keessatti jaalatamoo ta'aanii jiru. Hojiin isaanii bu'aa qabeessa waan ta'eef qabeenya guddaa kuufachuus danda'aniiru.

Dargagoota kan biroo hawaasa naanno rakkisaa turanis hojii kennaniifii jireenyi isaanii jijiramuu danda'ee jira. Kana irra darbaniis ijoolleek karaa irra jiraatan kan lakkofsi isaanii kudhan ta'an jereenya karaa irraa baasanii uffata bitaniifii nyaataa fi kaffaltii mana barnootaatiif baajata ramadaniifii barsiisaa jiru. Maqaan

dhaabbanni hiriyooni afran kunniin hundeessan inni duraan ittiin beekamu jijiiramee moggaasni "Iffoy-taa" jedhamu kennameef. (Bara 1999 Televizyinii Itoophiyaatiin irra deddeebi'ee kan dhiyaate irraa fooyya'ee kan fudhatame)

Gilgaala- 8

Seenaa armaan olitti dhiyaate ka'umsa gochuun gaafilee armaan gadii deebisaa.

1. Haala jijiirama jirenyaa Daamxee fi hiriyoota isaa booda, bu'aaleen gaariin argaman maal dha.?
2. Dargagoota jireenyi isaanii badaa ta'e haala jirenyaa isaanii jijiiruuf maaltu godhamuu qaba?
3. Hiyyummaay eroo dhumaaf biyya keenya keessaa balleessuuf fayyidaalee imaammanii fi tarsiimoon dinagdee misoomaa qabu maal akka ta'e gareen irratti mari'adhaa.

Biyyi keenya abbaa qabeenya uumamaa fi hambaalee seenaa hedduu ti. Hambaaleen seenaa fi uumama boon-saa ta'an jiraatanillee karaa biraatiin immoo rakkolee baayyee qabdi. Qabeenya uumamaa qabaannullee humna namaa hojiidhaaf kaka'umsa qabuu fi dandeettii kalaquu qabu uumuun waan hin danda'amneef biyyi teenya addunyaatti hiyyummaadhaan kan beekamtu taatee jirti. Hiyyummaan jibbisiisaan kun biyyaa fi lammilee

qaaneessaa tureera. Baroota dheeraaf hiyyummaa nu waliin ture kana itti qabsaa'anii mo'achuudhaaf mootummaan imaammataa fi tarisiimoo misoomaa bu'a qabeessa ta'e diriirseera.

Imaamannii fi tarsiimoon misoomaa kun galma akka gahuu danda'u lamm-iin tokkoon tokkoon isaa cimee barachuu fi hojjachuun biyya isaa misoomsuuf itti gaafatatumummaa qaba. Itti gaafatatumummaa idilee qabu bahuu qofa osoo hin ta'in tajaajila tolaan kennamu keessattis hirmaachuun toftaa hiyyumaan ittiin dhabamsiifamu keessa isa tokkodha. Dhimmi kun "Dhimma mootummaa ti "jechuu manna, dhimmi kun anallee na ilaallata jedhanii hirmaachuun bu'a qabeessummaa imaammataa fi tarsiimoo misoomaa mootummaan baase cimsa.

Gilgaala-9

Gaaffilee armaan gadiitiif deebii kennaa

1. Sadarkaa maatii, naannoo, fi biyy-aatti wantoota mallattoo hiyyummaa ta'an irratti gareen mari'adhaa
2. Hiyyummaa dhabamsiisuuf lammiilee irraa maaltu eegama?

5.4.2 Tajaajila Tolaa Manaa Fi Mana Barnootaa Keessatti Kennuu



Fakkii 5.7 Tajaajila fedhii irratti hundaa'ekennuuun dirqama lammummaa ti.

- **Fakkiiwwan kunnii erga maalii dabarsuu?**

Mana, naannoo keenyaa fi mana barnoota keessatti gochaaleen tajaajila tolaa hedduutu jiru. Gabatee armaan gadii keessatti muraasa isaanii dhiye-essuuf yaalaameera.

Mana kessatti	Naannootti	Mana barnoota keessatti
1. Ajaja maatii eeguu qofa osoo hin ta'in dursanii karooraqop heeffachuun, Itti gaafatatummaa dhuunfaa fi garee bahuu. 2. Mana jireenyaa fi dallawaa isaa qulqullinaan eeguu fi fedha ofitiinmidhagaina isaa eeg-uu	1. Namoota gargaaraa hin qabne, humna dhabeeyyii fi jaarsolee kunuunsuu 2. Hiriyoota qe'ee waliin qulqullina naannoo eeguu Namoota ollaa fi firootaaf amma danda'ameen tajaajila kennuu	1. Mana barumsaa keenya keessatti miseensota gumii siiviksii ta'anii tajaajila kennuu 2. Qulqullina mana barmusa keenyaa fi midhaagina isaa eeguu 3. Barattoota gara amala godhee deemaa jiran gorsuun jijirama amalaa akka fidan deggaruu

Gilgaala- 10

1. Naannoo fi mana barnootaa kee keessatti hojiwwan tajaajila tolaa dhuunfaan yoo kennitan na gamm-achiisa jettan tarreesssaa.
2. Ilma namaatiif tajaajila tolaa kenuun namoota seenaa isaaniin beekamoo ta'an keessaa isa tokko filachuun waayee nama sanaa namoota gaafachuun yook-iin kitaaba dubbisuun hiriyo-oota keessaniif ibsaafii

5.5 Lammummaa

5.5.1 Karaa Lammummaan Ittiin Argamu

- **Lammummaa jechuun maal jec-huu dha? Kanaan dura barumsa barattan yaadachuun hiriyo-oota keessanitti himaa.**

Lammummaan karaa dhalootaa yook-iin seeraan kan argamu jedhamee iddo lamatti qoodama. Namni tokko abbaa fi haati isaa yookiin lamaan isaanii keessaa inni tokko Itoophiyummaa qabaachuu isaatiin /ishiitiin (lammii Itoophiyaa irraa dhalachuu isaatiin) qofa mirgi lammummaa ni eegamaaf. Maatiin isaa/ishee /biyya alaa kan jiraatan ta'us mirga lammummaa argachuu wanti isa dhoowwu hin jiru. Karaan lammummaan ittiin

argamu lamaffaan, lammummaa seeraan argamu jechuun beekama. Namni lammummaa biyya alaa qabu tokko fedha isaatiin lammummaan Itoophiyaa akka kennamuuf mootummaaf gaafii yoo dhiyeessee fi seerri biyyattii wanti gaafatu guutuun isaa yoo mirkanaa'e mirga lammummaa argachuu ni danda'a.

Gilgaala- 11

Gaaffilee armaan gadii deebisaa

1. Akka heera Itoophiyaatti karaa lammummaan ittin argamu meeqa?
2. Mirgi Lammummaan dhalootaan argamu mirga lammummaa seeraan arga-mu irra wanti adda baasuu maal dha?
3. Namni lammii Itoophiyaa irraa dhalate tokko, Itoophiyaa keessa jiraataa lammummaa Itoophiyaa hin barbaadu jechuu ni danda'aa?

5.6 Alaabaa Biyyooleessaa

5.6.1 Alaabaa Fi Hiika Faajii Biyyooleessaa



Fakkii 5.8 Alaabaa Biyyooleessaa
Itoophiyaa

- ***Faajiin biyyooleessa alaabaa keenyaa irra jru ergaa maalii dabarsa?***

Alaabaaan kun,

Gammachuu waliin jirenyaa, oduu injifannoo

Yaa boonsituu biyyaa, walabummaa ummataa

Alaabaan tun yoomiyuu haa jiraattu
Yeroo hunda haarawaa moofoftee hin beektu

Abdii laliiftuudhaa abaaboo fi firii
Jaalala wareegama miidhaaginaibsituu
Gammachuu irraa kan ka'e eenyutu
hin boonye

Walabummaa biyyaatiin eenyutu hin
boonne

Alaabaan teenyalleen argatte kabjaa
Gammacuun keenyallee garmalee
cimeera.

*(Madda:-I Taaddala Gadilee Tsag-gaayee,
Tiniqniq 1993)*

Gigaala- 12

Bu'uuruma walalootiin gaaffilee armaan gadii deebisaa

1. Ergaan walalichi dabarsuu bar-abaade maal dha?
2. Walaloo kana keessatti hii-kni bifoota alaabaa teenyaa akkamitti ibsame?
3. Yeroo alaabaa keenya injifannoontaa haaga'u miirri dawwattootaa maal fakk-aata? Miirri kun akkamitti ibsame?

Alaabaan biyyoleessa Itoophiyaa jalq-abaa magaariisa, gara jiddutiin keelloo, gara gadiitiin diimaa ta'ee walakkaa isaatti immoo faajii biyyooleessaa akka qabaatu heera mootummaa keewwata 3 irratti tarreeffamee kaa'ameera. Halluun sadeenuu wal qixa ta'anii kaa-amu. Halluun sadeen alabaa keenyaa hiika mataa isaanii qabu. Haala kan-an:-

Magariisni badhadhinaa fi lalisa yoo bakka bu'u keelloon immoo abdii fi hawwii bara dheeraa agarsiisa. Halluun diimaan immoo gootummaa fi wareegama bakka bu'a. Walakkaa alaabichaatti faajiin biyyooleessaa sararoota walqixa ta'anii boca urgii qabaniin qophaa'ee jira. Qaanqeen urjii irraa

facaatu ifaan mul'ata. Urjichi kan bocame halluu warqee qabuun yoo ta'u gitni cuqliisaa sabni, sablamoonnii fi ummattoonnii fi amantiwwan adda addaa Itoophiyaa, walqixummaa fi tokkummaan waliin jiraachuuf abdii qaban agarsiisa.

Gilgaala- 13

Gaaffilee armaan gadii deebisaa

1. Halluu guutuu alaabaa fi faajiin Itoophiyaa qaban ibsaa.
2. Hiika halluu alaabaa Itoophiyaa tokko tokkoon ibsaa?
3. Hiika faajiin biyyooleessaa qabu gabaabinaan ibsaa.

Xumura Boqonnaa

Jaalala biyyaa cimsuuf wantoota barbaachisaan keessaa maalummaa mirga dhuunfaa fi garee, hojmaatni loogummaa akka hin jiraanne dhuunfaan gumaacha gochuun barbaachisaa ta'uu isaa, seenaa naannoo fi biyya ofii cimsanii beekuun barbaachisaa ta'uu isaa hubattee jirta. Gocha farrummaa fi miidhaa qaban irratti qabsaa'uun jaalala biyyaa cimsuun ni danda'ama. Keessattuu meeshaalee waliin itti fayyadamanuuf of eeganno gochuun tokkoo tokkoon lammii irraa kan eegamu dha. Haalli namummaa keenya ittiin ibsinu keessa inni tokko amala gaarii qabaachuun gocha fakkeenya gaarii ta'u raawwachuu dha. Wantoota adda addaa miira quuqama hin qabnee fi maaltu nagalche jechuun bira yoo dabarre naanna'ee naanna'ee miidhaan isaa numa irratti deebi'ee calaqqisuu ni danda'a.

Biyyi keenya hiyyummaa keessaa akka baatu tokkoo tokkoon lammii gahee mataa isaa qaba. Imaammataa fi tarsiimoo misoomaa mootummaan baase raawwachiisuu irratti lammileen hundi hanga humna isaanii gumaacha gochuu qabu. Mana jirenyaa keenya, naannoo fi mana barnootaa keenya irraa eegalee, hawaasa tolaan tajajiluun dirqama lammummaa ti. Lammummaa dhalootaanis ta'e seeraan argamuun dirqama nurraa eegamu raawwachuudhaan gahee dhuunfaa fi garee bahuun dirqama lammii hundaa ti.

Alaabaa biyyooleessaa fi faaruu biyyooleessaatiif kabaja kennuun barbaachisaa waan ta'ef lammijin kamiiyuu kana raawachuutu irraa eegama.

JECHOOTA IJOO

Ardii- Uumama lafaa (FknTulluu, sulula, laga, dirree wkf.)

Loogji – Gocha karaa maleen nama fayyaduuf raawwatamu.

Mallattoolee seenaa- Ragaalee dhaabbataa seenaa fi aadaa ummata biyya tokkoo ibsan dha.

Malaammaltummaa – Gocha nama biroo ykn mataa ofii fayyaduuf seeraan ala raawwatamu

Walaloo ummataa- Walaloowwan ummataa dhaloota irraa gara dhaloota itti aanutti darbanii fi barreessaan isaanii hin beekamne.

Imaammataa fiTarsiimoo – Seera, dambii fi qajeelfama mootummaan baasu

Sona – Hawaasni tokko gaarii dha jedhee kan qabatee jiru.

Isaakwutii –Dargaggeessa fedhaan naannoo fi hawaasa isaa tajajiluuf waadaa galee fi tolaan tajaajila kennaa jiru

Daawwannaan- Hambaalee seenaa, meeshaalee gurgurtaa ykn hojii kalaqaa ifatti ummataaf bifa agarsiisaan (egzibiishiniin) dhiyaatu

Milkaa'aa – Nama gochaan ykn hojiin bu'a qabeessa ta'e

Namummaa –Amala ilmi namaa uumama kan biroo irraa adda isa taasisu

Gaaffilee keessa deebii

I. Gaaffilee armaan gadii sirrii yoo ta'an 'dhugaa' sirrii yoo hin ta'in 'soba' jechuundeebisaa.

1. Barmaatilee boodatti hafuu fi yeroon itti darban farra guddinaa ti.
2. Iccitii eeguun amala nama cimina qabuu ti.
3. Gochaalee tajaajila tolaaf qajeelfama kennuu kan qabu mootummaa qofa dha.
4. Imaammataa fi tarsiimoon misoomaa mootummaan baasu raawachuu kan qabu waajjiraalee mootummaa keessatti qofa dha.

II. "A" jalatti kan barreeffamaniifa "B" jala kan jiran keessaa filachuun firoomsaa

"A"

1. Umrii malee heerumuun
2. Mallattoo jaalala biyyaa
3. Malaammaltummaa
4. Lammummaa
5. Yaada sababaan osoo hin
deeggaramin kennamu
6. Iccitii
7. Loogii

"B"

- A. Ilaalcha dimokraatawaa
- B. Dhimmoota Ciminaa fi of eegannoon qabaman
- C. Ardi qabaman
- D. Mataa oftiif yookin faaydaa nama
biraatiif jecha gocha seera dhabeessa ta'e
raawwachuu
- E. Barmaatilee miidhaa qaban
- F. Garaagarummaa uuma
- G. ummata kabajuu
- H. Biyya tokko keessatti lammí seera
qabeessa ta'uu
- I. Gocha badaa

III. Gaaffilee armaan gadii iddo duwwaa irratti jecha ykn gaalee sirrii ta'een guutaa.

1. Mirgi dhalootaan yookiin seeran argamu _____ dha
2. Gochi nama biraan ykn biyya miidhuu danda'u _____ jedhama.

IV. Gaaffilee araan gadii deebii sirrii ta'e filachuun deebisaa

1. Gochaaleen lammii biyya koo nan jaladha jedhu irraa eegaman
 - A. Aadaa fi afaan hawaasaa kabajuu
 - B. Kaka'umsa hojji qabaachuu
 - C. Loogiin hojjechuu dhiisuu
 - D. Hundi debí dha.
2. Hiyyummaa biyya keenyaaf sababa ta'uu kan danda'u
 - A. Qabeenyaa uumamaa dhabuu
 - B. Hanqina bishaanii
 - C. Aadaa hojji cimsuu dhabuu
 - D. Gargaarsi xiqqaachuu
3. Meeshaalee walee ta'an kunuunsnuu kan qabnu
 - A. Seerri waan nu dirqisiiseef
 - B. Miidhaan waan keenya ta'eef
 - C. Qabeenyi biyyaa akka hin qisaasne
 - D. Hunduu deebii dha.
4. Dantaa dhabummaa kan hin ibsine
 - A. Balfaa iddo adda addaatti gatuu
 - B. Mana fincaanii seera malee itti fayyadamuu
 - C. Qabeanya walee mana barnootaa seeraan itti fayyadamu.
 - D. Deebiin hin kennamne
5. Tajaajila araan gadii kessaa isa kamtu tajaajila tolaan kenamuu dha?
 - A. Maatii fi barsiisootaaf ajejamuu dirqama ofii bahuu
 - B. Yeroo barumsaatti haalaan fayyadamuu
 - C. Jaarsolii fi humna dhabeeyyii kunuunsuu
 - D. Heera mootummaa biyyattiifiif ajejamuu
6. Hattuu fi nama loogiin hojjetu saaxiluun
 - A. Gahee poolisii qofaa dha.
 - B. Qaama seeraa qofa kan ilaalu dha.
 - C. Dirqama lammii kamiiyuu ti.
 - D. Hunduu deebii dha.

V. Gaaffilee araan gadiif deebii gaggabaabaa kennaa

1. Mirgaa fi dirqama lammii hunda irraa eegaman keessaa lamaan isaanii eeraa.
2. Gochoonni badaa fi miidhaa qaban dhiibbaa guddina dinagdee irratti geessisan ibsaa.

BOQONNAA JAHA

MIIRA ITTI GAAFATAMUMMAA

Kaayyoolee Boqonnichaa: Boqonnaa kana barattee erga xumurtee booda:

- *Lammileen itti gaafatamummaaisaanii amanamummaa fi gahu*
- *Lammileen hundi qabeenyaa uumamaa fi hambaalee seenaa biyya keenyaa Kunuunsuuf itti gaafatamummaa kan qaban ta'uu isaanii ni hubatta.*

6.1. Waadaa



Fakki 6.1. Dargaggoonni ogummaa fayy-aatiin eebbisaman waadaa yommuu galan

- Dargaggoonni fakkii armaan olii ogeessa fayyaa ta'an maal goch-aa jiru ?
- Waadaa galuu jechuun maal jehuu dha?

Goota Ammayyaa

Abarraa Dagguu, ogummaa mahaandisiitiin eebbfamee hojii osoo hin eegaliin abbaan isaa akka isaatti goota akka ta'u ni gorsa ture. Abarraanis amantaa fi ilaalcha abbaa isaa yeroo hunda ni dingisiifata."Biitti Haadha. Lammien haadha isaa haqummaan hin tajaajille lammii miti." jedha. Abbaan Abbarraa goota diina biyya isaa irraa ittisuuf Xaaliyaanoota waliin lole dha. Abarraanis fedhii abbaa isaa guutuuf ogummaa isaa seeraan hojii irra olchee ummata tajaajiluuf of qopheesseera. Kabajaa fi beeksumsa guddaan kan eebbfame Abarraan to'ataa hojii daandiiwan ta'uun qaxarame.

Yeroo tokko qulqullina hojii daandii yoo to'atu hojiin hojjatame sadarkaa qulqullina isaa kan hin eegnee fi malaammaltummaan keessatti kan gaggeeffame ta'ee arge. Abarraanis dhabbanni daandicha hojjechuuf waligaltee raawwate daandicha diijee irra deebi'ee akka hojjetau murtii dabarse.

Haa ta'u malee hogganaan dhaabbatichaa daandii haala sadarkaa qul-qullina isaa eeggateen hojjatuu dhiisuu isaatti osoo hin qaana'in obbo Abarraa sobuudhaan konkolaataa ammayyaa gatii guddaa baasuu fi haaraa ta'e Isaaf kenniudhaan murtii isaa jiji-irsiisuuf qophaa'e. Haaluma kanaan waraqaa moodeelaa fi halluu konkolaatichaa ibsuu fi furtuu konkolaatichaa poostaa keessa kaa'ee guyyaa beellamaatti jechoota amansiisuu danda'an hedduu erga itti haasa'ee booda kenneef.

Obbo Abarraanis poostaa banee erga ilaalee booda hogganaa dhaabbatichaa taajjabbiin ilaalee "Ati garuu lammii Itoophiyaa ti?" jechuun gaafatee poostaa darbiseefii biraad deeme.

Hogganaa haafa'aan kunis kaayyoon isaa harkaa fashalaa'uu akkuma huba-teen haaloo bahuuf of qopheessee obbo Abarraa eddo dhokataa ta'etti yeroo filatee konkolaataa itti buusuun balaa irraan gahe. Ta'us garuu yakka kana eenu akka hojjate hordoffii poolisiidhaan godhameen haala amansiisaa ta'een irra gahame. Obbo Abarraan yaala irra turee haala raawwatame hunda yennaa yaadatu waadaa abbaa isaatiif seene kabajuun isaa waan hunda caalaa gammachuu sammuu kenneef .Abbaan isaatis biyya isaa amanamaa ta'ee tajaajiluuf ijjannoosirrii ta'e qabaatuu isaatiif ni galate-

effatae. Abarraanis goota hattuutti qabsaa'u ta'uu isaa yeroo gabaabaa keessatti bal'inaan odeeffameef. Ogeey-yii yaalaa dirqama ogummaa isaanii seeraan bahaniin gargaaramee yeroo gabaabaa keessatti fayyee hojii isaa eegale. Gocha isaa kana irraa ka'uudhaan moggaasa "Goota Amma-yyaa" jedhuun waamamaa kabajaa fi jaalala hawaasaa gonfate.

Gilgaala- 1

Seenaa armaan olii bu'ura godhachuun gaafiw-wan kennaman deebisi

1. Gochi namicha Abarraa kennaan (badhaasaan) sobuu yaalee dhiibbaan guddinna irratti fidu maal dha?
2. Gootummaan maal dha? Maal fa'aan ibsama?
3. Sababni Abarraan "Goota hammayyaa" jedhameef maal dha?

Waadaa jechuun dhimma tokkoof amanamaa ta'uun dhugaa irratti hunda'uudhaan ofiif ykn kanneen birootiif amanamaa ta'uu dha.

Waadaa seenuuun dirqama hamilee fi itti gaafatamummaa guddaa gaafata.

Kanaafuu waadaa galuun dura waadaa galamu sana eegudhaaf humnaa fi dandeettii keenya beekuun barbaachisaa dha. Waadaan tasa seenamu

hojii irra waan hin oolleef wal amanuu dhabuu fida. Kabajaas dhabsiisa.

Dabalataanis sababoota fudhatama hin qabne dhiyeessuu fi dhiifama naa godhaa gara jechuutti nama geessa.

Kanaafuu, yeroo barataa jirtan kanatti ofii keessaniif, maatiif, hawaasa biroottifis waadaa yoo seentan humnaa fi dandeettii keessanii olitti akka hin taane of eegganno gochuun ni barbaachisa. Waadaa kabajuu dhabu-un amaanaa nyaachuu dha. Kan raawwachuu dandeessan kutannoo fi amantaadhaan raawwachuun barbaachisaa dha. Kunis itti gaafatamummaa bahuudhaaf adeemsa sirrii ta'edha.

Waadaa seenuu if waadaa kabajuun jiruu fi jirenya maatii keessatti jalqaba. Barnoota sirnaan barachuu fi bu'aa gaariin itti fufuun waadaa bahuu fi ajeja fi gorsa maatii fudhachuu dha. Akkaataa humnaa fi dandeettiin eeyyameen hojii mana keessaa qarqaaruun maatiif jaalalaa fi kabajaa kennuun alatti gocha itti gaafatamummaa ofii bahuu ti.

Gilgaala- 2

Gaaffilee armaan gadii

deebisaa

1. Waadaan maal dha?
2. Waadaa fiixa hin baane jechuun maal jechuu dha?
3. Waadaa kennameef nanni raawwate hawaasa keessatti kabajaa akkamii argata?

6.2 Qajeelummaa, Amanammummaa fi Dhugummaa

- **Fayyaaleessa ta'uun jechuun maal jechuu dha?**
- **Fayyaaleessa fi nama dhugaa ta'uun akkamitti ibsama?**
- **Tokko tokkoon irratti mairi'a-dhaa.**

Namichi hojii humnaa hojjetaa jiraatu tokko osoo gamoo ijaaruu boorsaa qarshii hedduu fi sanada adda addaa of keessaa qabu lafatti argee rifate. Boorsaa kana gaggaragalchee yoo ilaalu qabeenyummaan isaa kan namicha isa hojjechiisuu akka ta'e hubate. Hojjetaan kun yeroo kanatti hojjechiisaan isaa hangam akka aaruu fi dhiphatu yaadee gaddeef. Deebisuufii akka qabus murteesse.

Itti aanseetis waan ta'e hunda hiriyaanisaatti himee maal gochuun akka irra jiru gaafate. Hiriychis faayidaalee argatuu danda'u hunda itti hime. Namichi gamoo ijaaru garuu yaada hiriyaanisaatti hin amanne. Haaluma dursee karoorfateen qabeenya abbichaaf deebise. Abbaan qabeenyichaatis hojjetaan gamoo kun ama-namaa ta'uun isaa ilaaluun sanadoota qofa hanbifatee qarshicha garuu isa badhaase. Guyyaa itti aanu ammoo itti gaafatamaa fi to'ataa qabeenya ijaarsa gamoo gochuun muude.

Gigaala- 3**Gaaffilee armaan gadii****deebisaa**

1. Hojjetaan gamoo qabeenya lafaa argate abbichaaf debé-isuu isaatiin faayidaalee argate ibsaa.
2. Gochi hojjetaa gamoo maal nu barsiisa?
3. Amanamaa ta'uun amala nama boonsu dha. Ibsa itti kennaa.

Fayyaaleessa fi amanamaa ta'uu fi dhugaa irratti hundaa'uun hojiin ibsama. Hojiinis amala hawaasummaa qaba. Hojiin tokko galma gahuuf yeroo fi bee-kumsa humna namaa hedduu gaafata. Namni kamiyyuu gahee isaa fayyaaleessa, amanamaa fi dhugaa qabeessa ta'ee yoo raawwate faaydaa hedduu argamsiisa. Fakkeenyaaaf, konkolaachisaan tokko nageenya konkolaataa sakatta'ee, of eeggannaan yoo oofe lubbuu fi qabeenya baraaruu irratti itti gaafatamuummaa guddaa bahuu isaa mul'isa. Qonnaan bulaanis yeroon qotee calleessee itti fayyadamtootaaf dhiyeessuun gahee itti gaafatamuummaa qaba. Ogeessi kamiyyuu itti fayyadamtoota bu'aa ogummaa isaatiif fayyaaleessa ta'ee taja-ajiluun isa irraa eegama. Haala kanaan namni kamiyyuu gosa hojii qabateen

fayyaaleessa ta'ee, amantaa fi dhugaadhaan yoo hojjete dirqama lammummaa bahe jechuu dha.

Barbaachisummaan fayyaaleessa ta'uun, amanamaa ta'uun akka-sumas dhugaa irratti hunda'uun itti gaafatamuummaa lammii hunda biratti hubatamuu qaba. Barbaachisummaa isattii namni hundi yoo amanee fi hojii bu'aawan fayyalessummaan, amanamaa ta'uu fi dhugaa qabachuun argaman jijiiramaa fi guddinaaf bu'uura ta'u. Kanaafuu isinis hojiiwan dhuunfaanis ta'e gareen mana brn-oottaa itti barattanitti fayyaaleessa ta'uun, amanamaa ta'uu fi dhug-aadhaan hojjechuun bu'aa arga-miistanii itti gaafatamuummaa /dir-qama/ bahuu qabdan.

Gigaala -4**Yaad-rimee armaan olitti
kenname irratti hundaa'uun
gaaffilee kennaman deebisaa.**

1. Hojiin amala hawaasummaa qaba maaliif jedhamaa?
2. Fayyaalessa, amanamaa ta'uu fi dhugaa irratti hundaa'uun maaliif barbaachisa?

6.3. Qabeengaa Umamaa fi Dabareewwan Seenaa



Fakkii 6.2. Haaromsa gamoo Harariif taasifamaa jiru

- **Gamoon Harar naannoo kamii fi magaalaan kam keessatti argama?**



Fakkii 6.3. Biyyoon akka hin dhiq amne Koonsoo keessatti hojii daagaa

Laggeen Weellisan

Paarkiin gaarreen Baalee paarkiwwan akka Afrikaatti qabeenyi uumamaa guddaan keessatti argama jedhamanii eeraman keessa isa tokkodha. Parakichi bal'ina iskuweer kiloomeetirii

kuma lamaa fi dhibba lama qaba. Biyya keenya keessatti olka'insa isaatiin sadarkaa lammaffaa irratti kan argamu gaara Tulluu Diimtuu of keessaa qaba.

Paarkiin bineesota hoosisan gosa digdamaa olii fi gosa sinbirrootaa dhibba tokkoo fi afurtamaa ol of keessaa qabu kun bosona gosa biqloota sanyii biyya keessaa adda addaatiin uwatifamee argama. Sanyii gosa sinbirroo addunyaa irratti biyya kamittuu kan hin argamne digdamii afurtu biyya keenya qofatti argamu. Kanneen keessaa sanyiin gosa sinbirroo kudha afur paarkii gaarreen Baalee keessatti argamu.



Fakkii 6.4 Bineeldota paarkii gaarreewan Baalee keessatti

Dabalataanis biyya birootti kan hin argamne biyya keenyaaf immoo qabeenya dinqisiifamaa kan ta'an kan akka Niyaa laa, Gadamsaa fi Jeedala Diimtuun naannoo uumamaan bareedaa kana keessatti argamu. Laggeen Gannaalee fi Waa-bii shabaleetis sulullan Baalee keessa weellisaa jirenya gabisa kibba bahaatti suuta yaa'u.

(*Madda:- Barruulee Inistituumii Wondo Gannat Giraar (1978) irraa*)

Gigaala – 5

Dubbisa armaan olii bu'ureeffachuuun deebii kennaa

1. Paarkii jechuun maal jechuu dha?
2. Gaarrii guddinaan 2ffaa ta'e Tulluu Diimtuu yoo ta'e inni 1ffaan eenyu dha?
3. Niyaalaan eessatti argama?
4. Haalli paarkii Baalee yeroo ammaatti qabiinsi /kunuunsi isaa haala durii irraa fooyya'aa dha jettanii yadduu?

Itti gaafatamummaa Hambaa fi Qabeenyi uumamaa fi seena qabeessa ta'an akka hin badne eeguu jechuun namni kamiyyuu ilaalcha qabeenyi kun 'kiyya' jedhu qabaatee hawaasaaf akka sumas biyyaaf eegudhaaf dirqama lamummaa qabu jedhoo dha.

Ilaalchi itti gaafatamummaa kun yaada nama hundaa yoo ta'ee fi fudhatama qabaate, qabeenya uumamaa, qabeenya seenawaa fi hambaalee badii fi qisaasa'ina irraa eeguun amansiisaa ta'a.

Namni kamiyyuu eddo jirenyaa, eddo hojii fi eddoowwan qabeenya waleetti tajaajilli itti kennamu kunuunsuun tajaajilaaf akka oolan taasisuu qaba. Fakkeenyaaf, barattoonni itti gaafatamummaaakkanaa isinitti dhagahame hojjechuu kan eegaltan mana keessaa ta'a. Qabeenya mana keessaa kan yeroon, beekumsi, qarshii fi humni namaa itti dhangala'e hundaaf kunuunsa barbaachisaa gochuun yeroo dheeraaf akka tajaajilan gochuu qabdu.

Mana barnootaa keessattis qaeenya hojii baruu fi barsiisuuf tajaajilan hunda akka qabeenya dhuunfaa keenyatti eeguun faaydaa irra akka oolanii fi dhaloota itti aanuuf dabarsuun haalli baruu barsiisuuf akka jalaa hin gufanne gumaacha gochuu qabdu. Naannoo mana jirenyaattis qabeenya uumamaa fi hambaalee seenawaa jiran hunda akkasumas bobboca adda addaa kunuunsuu fi eeguun isini irraa eegama.

Qabeenya uumamaa fi hambaalee seena qabeessa eeguu fi kunuunsuun, lammileen hundi jirenya mijaa'aa fi guutuu akka jiraatan dandeessisa.

Bishaan, biyyee, bosonni, albuuddan, bineensotaa fi bineeladoonni badii fi

miidhama irraa eegamanii fi seeraan misoomaaf yoo oolan guddinnii fi dagaaginni biyyaa ni dabala. Hojii dhabdummaa, beelaa fi hiyyummaan hin jiraatu. Haaluma kanaan bineensotaa fi simbirrootaaf paarkiin sadarkaan isaa eeggeme akka jiraatu gochuun bay.'ina daawwattootaa dabaluun hojii tuurizimii jabeessuun ni danda'ama. Kunis dinagdee biyyaa cimsa. Hambaalee seenaawaa sadarkaa qarooma durii ibsan eeguu jechuun seenaa biyyaa kunuunsuu fi eenyummaa ofii hojii damee turiizimiitiif haala bal'aa mijessu dha.

Kanaafuu bu'uura guddina biyyaa kan ta'an qabeenya uumamaa fi qabeenya hambaalee seenaawaa miira itti gaafatamummaan kunuunsuuf murteessuu fi kanneen of jaalatanii fi maaltu na dhibeedhaan badii geessisan to'achuuf qophii ta'uu qabna. Kuni ammoo gocha lammii gahumsa qabu nama jechisiisu dha.

Gilgaala- 6

Gaaffilee armaan gadii deebisaa

1. Hambaalee seenaa fi qabeenya uumamaa eeguu eenyu fayyada ?
2. Hojii dhabdummaa, beelaa fi hiyyummaa balleessuuf qabeenyi uumamaa akka-mitti fayyada?
3. Tuurizimiin maal dha?
Faaydaa isaa ibsaa.

6.4. HIV/AIDS

1. Karaalee HIV/AIDS iin ittiin dad-darbu maal fa'a.?
2. Faca'insa AIDS hir'isuuf tarkaanfiin fudhatamaa jiru maal dha?

Ganda Abdii Boruu

Barsiistuu Ballaxuun kutaa jahatti barsiistuu herregaa ti. Barattoota kutaa <>6D<> maqaa waamtu keessatti barachaa jiran soddummaan maqaan, dandeettii fi amala isaanii adda baaftee beekti. Ni jaalattis. Hojin isaanii ijoon barumsa akka ta'es hubachiisuun hojji isaanii seeraan akka raawwatan itti gaafatmummaa akka qaban yeroo hundaa gorsiti. Isaanis ishii ni jaallatu. Kabajaas ni kennuuf. Gorsa isheetis ni fudhatu. Ajejas ni raawwatu. Barataan hojii manaa osoo hin hojjetin dhufu hin jiru ture.

Yaa ta'u malee Kiroos walitti aansitee hojii manaa osoo hin hojjetiin waan dhufuu jalqabeef daree keessatti gaaffii gaafatmuuf deebii kennuun ishii dhibe. Rakkina barattuu tanaa hubac-huudhaaf barsiistuu yeroo boqonnaa ishiitti kiroosiin dubbiste. Abbaan ishee dhibee Eedisiitiin akka du'anii fi haatis dhukkubsatanii siree irra akka jiran hubatte. Du'a abbaa fi dhukkubsatuu haadhaatiin rakkina uumameen kiroosii fi obbolaawwan ishee xixinnoon lamaan sadarkaa barumsa isaanii itti fufuu hin dandeenye irra akka gahan bartee.

Barsiistuuun, Kiroosii fi obbolaawwan ishee barumsa isaanii akka addaan hin kunne gochuu fi haadha isaanii wal'aanaa turaniifis qarqaarsa barbaad-uuf karoofatte. Gara dhaabbata "Qeyee Abdii Haaraa "tti deemudhaaan akkaataa hojmaata dhaabbatichaa gaafatte. Sababa dhaqxefis ni hubachiiste. Dhaabbatichis buusii lamm-iileen itti gaafatamummaan itti dhagahamuun walitti qabameen dhukkubsattoota eedsii fi daa'imman maatii hin qabne kan gargaaru ta'uun isaa ibseef.

Barsiistuu Ballaxuun miseensa dhaabbatichaa ta'uun buusii qarqaarsaa dhaabbataan gochuuf murteessite. Barattoonni kutaa jahaaffaa 'D' tis ji'a-tti tokko tokkon isaanii saantima dig-damii shan walitti buusudhaan deeg-garaa fi miseensa dhaabbatichaa akka ta'an goote. Kana booda Kiroosii fi obboleewwan ishee dhaabbaticha irraa ji'a ji'aan qarqaarsa argachaa barumsa isaanii itti fufuu danda'aniiru. Haati isaanitis yaala argatan. Kiroosis bu'aa gaarii galmeessisaa barumsa ishee itti fufte.

Gigaala- 7

Seenaa gabaabaa armaan olii irratti hundaa'uun gaaffilee armaan gadii deebisaa.

1. Abbaan kiroos yennaa du'uun fi haatis yeroo dhukkub-satan haalli uumame maal ture?
2. Gochi barsiistuu Ballaxuu maal agarsiisa?

HIV/AIDS iin saffisaan babal'achuun diina adda duree ilmaan namaa fixaa jiru dha. Hanga ammaatti eedsiif dawaan hin argamne. Dhukkubichi akka lakkoofsa Awurooppaatti naannoo bara 1981 kan uumame yoo ta'u addunyaa irratti saffisaan babal'ataa jira.

Karaalee dhukkubichi ittiin dad-darbu keessaa knneen armaan gadii eeruun ni dnada'ama

- ***Yeroo dhiigni vaayirasichaan faalame gara dhiiga nama fayyaatti makamu***
- ***Rigaa ilkaanii dhukkubsataan itti fayyadamee fi meeshalee qara qaban fkn murtuu qeensaa, haadduu, fi kkf namni fayyaan yoo fayyadame.***
- ***Lilmoo dhukkubsataan waraannateen namni fayyaan yoo fayyadame***
- ***Karaalee eedsiin ittiin hindarbine***
- ***Harka walfuudhuun***
- ***waliin yaatuun***
- ***mana fincaanii waliin fayyadamuun***
- ***Daree keessatti waliin barachuun***
- ***Waldhungachuun***

Namni HIV/eedsiin qabame dhibee of irraa ittisuun waan dadhabuuf salphaadhan dhukkuba garaagaraatiif saaxilama. Humnaa fi fayyaa waan hin

qabneef hojjechuu ykn barachuu hin danda'u. Yeroo kanatti nama isa degaruu hin qabu yoo ta'e rakkoon ham-aan irra gaha. Hojjechuu dhabuu isaatiinis maatiin ni rakkata, hojiinis ni miidhama. Dhukkubichi hanguma nama dhuunfaa irratti miidhaa qabu, guddinna biyyaa irrattis dhibbaa qaba.

Dhiibeen hamaan ummata fixaa jiru kun miidhaan geessisaajiru hedduu dha. Sababa dhibee kanaatiin haadhaa fi abbaan yoo du'an jiruun maatii jeeqamuu irrayyuu daa'imman rakkatanii barumsa isaanii addaan kutu. Nama isaan kunuunsu waan dhabaniifis ni bittinaa'u. Dargaggoonni abdii biyyaa ta'an ba'aa biyyaa ta'u. Haalli kunis jirenya hawaasummaa keessatti rakkoo uumuun alattis hiyyummaa, boodatti hafummaa fi yakka raawwatuun akka babal'atu taasisa.

kanaafuu atis/anis balaa dhukkuba HIV/eedsii irratti hubannoo barbaachisaa ta'e qaabaachuun dhukkbichaaf akka hin saaxilamne of eegganno cimaa gochuun nurraa eegama. Dabalataanis namoota biroo hubachiisuu fi dadammaqsuuf namota dhukkubichaan qabamanifis deeggarsaa fi kunuunsa gochuuf dirqama lammummaa qabna. Dhibee kanarraa of eeguun itti gaafatamummaa ofii bahuu fi waadaa eeguu waan ta'eef lammiin kamiyyuu hojji irra olchuutu isa irraa eegama.

Gigaala- 8

Gaaffilee armaan gadii

deebisaa

1. Karaalee eedsiin ittiin darbu ibsaa
2. Haalli maatii dhibee eedsiin miidhame maal fakk-aata? Ijoolleen maatii eedsiin qabamanii rakkoo akka-miitu irra gahaa?

Yaada Xumura Boqonnaa

Lammilee itti gaafatamummaan itti dhagahamu horachuuf bu'urri maatii dha.

Maatii gaarii keessaa dargaggoonni amala gaarii horatanii bahan itti gaafatamummaa fudhachuu fi dirqama bahuuf gahumsa ni qabaatu.

Itti gaafatamummaan jiruu fi jirenya maatii keessaa jalqaba. Kunis gorsaa fi ajaea abbaa fi haadhaa hojii irra oolchuuf itti gaafatamummaa kennamu bahuu fi waadaa kabajuun mirkanaa'a. Turtii mana barnootaa keessattis ajeja mana barnootaa fi barsiisota irraa kennamuuf ajejamaa ta'uunii fi dhugaa irratti hundaa'uun raawwachuun jalqaba itti gaafamummaa bahuu isa kan biroo ti.

Qabeenya uumamaa fi hambaalee seenawaa kan maatii, hawaasaa fi biyyaa miira lammummaa "kiyya"

jedhuun eeguu fi kunuunsuun seenaa jiruu ofii eeguu waan ta'eef gaocha sirrii ta'e dha. Hundaa ol HIV/eedsii irraa of eeguu fi tatamsa'ina isaa ittisuuf sochii godhamu irratti hirmaachuun itti gaafatamummaa guddaa bahuu ta'uun isaa beekamuu qaba.

Itti gaafatamummaan bifaa fi sadarkaalee garagaraa qaba. Hojjetonni hundi akkuma dandeettii fi sadarkaa barnootaa isaanitiin dameewwan hojii adda addaa keessatti bobba'anii hojjetu Kun ta'us garaa-garummaan hanga itti gaafatum-maa sadarkaa adda addaa irra kan jiru ta'uun isaa ifa dha. Namni kamiyyuu hojii qabate irratti haqaa fi amanamaa ta'ee yoo hojjete bu'aan waliigalaa misoomaa fi guddina ta'a.

JICHOOTA IJOO BOQONNICHAA

Kakuu- amaanaa fudhachuu, (waadaa galuu)

Eebifamuu- Sadarkaa barnoota tokko xumuruun ragaa argachuu.

Goota – Lammii ogummaa isaatiin bu'aa olaanaa galmeessise.

qulqullina -haala bu'aa sadarkaan isaa eegame.

Waadaa seenuu- Dursanii amaanaa walii fudhchuu.

Amala –Yaada ilaalchii fi gochi namaa sirrii ta'uu fi ta'uu dhabuu ibsuu.

Hamilee –gochii gaarii fi hamaan kan ittiin madaalamu,

Hambaa- Yeroo fi seenaa kan eeru, bu'aawwan hojii fi qarooma namoota durii kan agarsiisuu.

Paarkii - eddoq abeenyi uumamaa, kan akka bineesotaa, simbirrootaa fi biqiltootaa itti eegaman.

Dafqaan bulaa – kan hojii humnaa hojjetu.

Gaaffilee keessa Deebii

I. Himoota araan gadii dubbisuun sirrii yoo ta'e "dhugaa" dogoggora yoo ta'e "soba" jechuun deebisaa

1. Amaanaan ykn abdiin gochatti hiikuuf karoorfamee fi namaaf kennname waadaa jedhama.
2. Namni tokko yeroo kabajee waajjira hojii isaatti argamuun qofti itti gaafatamummaa isaa akka bahetti lakkaawamaaf.
3. Hojjettooni hundi itti gaafatamummaan qabanii fi sadarkaan hojii isaanii walfakkaata.
4. Eddoon bineesonni, sinbirroonni fi biqiltooni adda addaa itti eegaman paarkii jedhama.
5. Babal'inni dhibee eedsii hiyyummaa fi boodatti hafiinsaaf gahee qaba.

II. "A" jalatti kan tarreeffamaniif "B" jala kan jiran keessaa filachuun firoomsaa

"A"

1. Itti gaafatamummaa
2. Maatii
3. Jeedala Diimtuu
4. Qabeenya uumamaa
5. Tuuriizimii
6. H.I.V
7. Hambaa seenawaa

"B"

- A. Qabeenya baraa fi seenaa ibsu
- B. Fedhiidhaan ykn ajejaan hojii hojjechuu
- C. Hojii Hambaalee seenawaa fi qabeenya uumamaa daawwachiisuun galii argamsuu
- D. Gufuu guddinaa biyyaa fi farra namaa
- E. Qabeenya hojii fi beekumsa misoomuu danda'uun fi kunuunsa barbaadu
- F. Kutaa hawaasaa ijoollee, abbaa fi haadhaan kan gurmaa'e
- G. Qabeenya biyya keenyaa qofa kan taate

III. Himoota araan gadii dubbisuun bakka duwwaa jecha ykn gaalee sirrii ta'een guutaa

1. Gahee hojii gosa kamiyyuu gahumsaa fi bu'a qabeessummaan raawwachuuun _____ jedhama.

2. Warqii, meetii, sibiilaa fi, pootaasiyemiin _____ yoo ta'an kitaabonni biraannaa, masqiidotaa fi fakkiiwyan holqa keessaa _____ dha.
3. Rakkolee guddina biyyaa dadhabsiisan keessa isa hamaan _____ dha.

IV. Gaaffilee araan gadii dubbisuun deebii sirrii filadhaa.

1. Fayyaaleessummaa fi amanamummaan itti gaafatamummaa bahuun:
 - A. Obsa qabaatuu
 - B. Ajajaanis ta'ee fedhiin hojiif kaka'umsa dhabuu
 - C. Bu'aadhaaf qabsaa'uu fi dirqama lammummaa bahachuu
 - D. Amala namaan walii galanii hojjechuu
2. Qajeelfamaa fi gorsa maatii raawwachuun
 - A. Hojii mana keessaatiin qabamuu
 - B. Seera kabajuu dhabuu
 - C. Qo'annaa fi yeroo dhabuu fi dhiibbaa jalatti bu'uu
 - D. Waadaa kabajuu
3. Takkoon tokkoo namaan itti gaafatamummaa hin bahu yoo ta'e
 - A. Jirenya hawaasummaa irratti rakkinni hin uumamu
 - B. Waadaan ni eegama
 - C. Naannoo fi guddina biyyaa irratti dhiibbaa ni fida
 - D. Jirenyi nagahaan itti fufa.
4. Guddina sadarkaa qaroomaa fi aadaa ummataa kan hin ibsine

A. qabeenya uumamaa	C. hambaalee seenawaa
B. kitaaba seenaa	D. ragaa bahuu manguddootaa
5. Faca'insa dhibee HIV / AIDS to'achuun kan danda'amu
 - A. Karaa ittiin daddarbu saaxiluun
 - B. Dhukkubsattoota irraa fagaachuun
 - C. Karaa ittiin daddarbu beekuun of eeguu
 - D. Walitti dhufeinya hawaasummaa hir'isuun

V. Gaaffilee araan gadiif deebii gabaabaa kennaa

1. Waadaa galan hojiin mul'isuun akkamitti itti gaafatamummaa bahuu ta'uu danda'a?
2. Paarkii jechuun maal jechuu dha? Paarkii fi qabeenya uumamaa paariikicha keessa jiran kunuunsuu kan qabu eenyuu?
3. Ijoolleen warri isaan dhibee HIV/AIDStiin irraa dhuman miidhaa maaltu irraa gahaa?

BOQONNAA TORBA

AADAA HOJII CIMAA

Kaayyoolee Boqonnichaa: Boqonnaa kana barattee yoo xumurtu :

- *Hojiin kabajamaa ta'uu ni hubatta*
- *Bu'aawwan jabaatanii hojjechuu fi seeraan yerootti fayyadamuu ni beekta?*
- *Kaayyoolee dinagdee fi misoomaa heera mootummaa rippabliika federaalawa Itoophiyaa keessatti tumaman ni beekta.*

7.1. Maalummaa Aadaa Hojii Cimaa

7.1.1. Jabaatanii Hojjechuu

- *Jabaatanii hojjechuu jechuun maal jechuu dha?*
- *Jabaatanii hojjechuu irraa faaydaan argamu maal dha?*

Hojjidhaaf haa kaanu

Qotee bulaan qote meeshaa isaa warraaqsee. Daakuu osoo hin dhabin Birraanis bari'e. Qotee bulaan yaraan qonna irratti laafe. Adoolessa keessa rakkoodhaan xaxame.

Lafa isaa kan qote sanyiif kan qoph-eeffate

Calleessee galfate oogdii irraa hamm-aaree. Ciccimoon yoo hojjetan kan boqochuu hede. Hojii isaa hojjechuuf beekumsaa fi humna isaa kan qustate Ijoolleen isaa daabboo yoo gaafattu jalaa ni dhokate. Qonna industirii baadiyyaa magaalaa Cimanii hojjechuun biyyi yaa misoomtu. Namni kan hojjeteen faaydaan akka arg-amu. Hojii aadaa gochuun biyyaaf yaa oomishnu. (Walaloo Hawaasaa Waliin walsims-iisuun barsiisuuf akka tolutti kan qop-haa'e. Amajji, 2000)

Gigaala- 1

Bu'uura walalichaatiin gaaffiilee armaan gadii deebisaa

1. Yaada walalicha irraa hubattan barruulee keessan irratti barreessuun barsiisaa keessaniif dubbisaa
2. Qotee bulaan yaraan qonna irratti laafee Adoolessa keessa rakkoodhaan xaxame. Yaadni walaloo bo'oowwan lamaan armaan olii kanaaf faallaa ta'e bo'oowwan kamiin ibsame?
3. Mee, isinis waayeebo'oowwan barataa cimaa ilaachisuun walaloo gabaabaa barree-ssuun hiriyoota keessaniif dubbisaa.

Aadaa Hojii cimaa jechuun yaada cimaa akkaataa hojjettoonni ogummaa isaaniitiif qaban fedhii hojjechuu fi kutannoo ogummichaan bu'aa fooyya'aa galmeessisiisuuf qaban jechuu dha. Hojiin dhala namaa hundaaf wabii jirenyaa waan ta'eef jabaatanii hojjechuun mataa ofiif qofa otuu hin ta'in, maatii fi hawaasa naannoo haa-lli jirenya isaa jijiiramee sadarkaa guddaatti kan ceesisu dha. Hojiin wantoota naannootti argaman irratti hundaa'uun waan salphaa ta'e irraa eegalanii yoo hojjatan sadarkaa gud-daa irra akka gahanii fi jirenya fooyya'aa akka qabaatan nama taasisa. Jabaatanii hojjachuu jechuun hojii irratti bobba'an sana bu'a qabeesa taa-sisuu qofa osoo hin ta'in yeroo hojii kabajuu, naamusa ogummaa qabaac-huu fi quliqullina oomishaa guddisuu kan dabalatu.

Gigaala- 2

Gaaffilee armaan gadii dee-bisaa

1. Mee wantoota naannoo ke-essanitti hojjatamuu dand-a'an tarreessaa.
2. Faaydaa jabaatanii hojjachuu naannoo keessaniifis ta'e biyyaaf qabu gareen irratti mari' adhaa.

7.1.2. Hojii Tuffachuu Dhiisuu



Fakkii 7.1. Hojiin kamyuu kabaja

- **fakkii kana irraa maal hubattan?**
- **Namooni naannoo keessanitti argaman hojii akkamii irratti bobba'uu?**
- **Hojii tuffachuu dhiisuu jechuun maal jedhuu dha?**

Ilmaa Cimaa

Badiruu Xaahir kan dhalate naannoo Somaalee maagaalaa Jijiigaatti yaa ta'u malee yeroo dargaggummaa isaa kan dabarse maagalaa Dirree Dawaatti ture .Magaalaa Dirree Dawaatti carraaleen hojii adda addaa akka jiran yeroo baay'ee obboleeyyiin isaa yoo haasawan ni dhaga'a. Haaluma kanaan Badiruun eessuma isaa waliin gara maagalaa Dirree Dawaa deemuun, eesumni isaa meeshaalee hojiji bitaniifitti tajajiilamuun mucaa cimaa kophee qulquelleessu ta'uu danda'e. Mucaa cimaa jedhamee kan beekamu Badiruun ganamaan ka'ee kopheewwan muraasa ergaa miidhaksee ykn qulquelleesee booda, gara mana barnootaa kan deemu. Badiruun hojii manaa kennameef seeraan hojjetee akkasumas qo'atee gara kutaa waan galuuf barisiisootaa fi barattoota biratti barataa jaalatamaa ture.

Mucaan hojii jaalatu kun maallaqa xiqqoo kuufateen hojii gosa biroo hojjechuu akka qabu yaaduu eegale. Dhuma irratti jiraattoota naannootiif mana suphaa kophee tajaajila itti kennubane. Yeroo gababaa keessatti lakk-oofsi maamiltootaa gara mana suphaa kophee Baadiruutti dhufan baay'achaa dhufe. Yeroo ammaa abbaa ijoollee sadii kan ta'e obbo Badiruun warshaa kophee naannoo Dachaatuu jedhamutti dhaabe keessatti naamoota sadarkaa umurii kamiyyuu keessatti

argamaniif kophee mijaa'aa fi cimina qabu oomishuu eegale .Hojii salphaa irraa kan ka'e Badiruun har'a maa-galla Dirree Dawaatti abbootii qaa-beenyaa jiran keessaa tokko ta'uu danda'eera.

Gilgaala- 3

Seenaa armaan olitti dhiyyaate kana irraa ka'uun gaaffilee kanneen gadiif deebii kennaa.

1. Badiruun maamiltoota isaa biratti akkamiin waamamaa ture?
2. Namoonni naannoo keessan keessatti hojii xiqqaa irraa ka'anii sadarkaa guddarrraa gahan yoo jiran ta'e warra keessan gaafachuun akkaataa raawwii hojii isaan itti adeemsisan tartiiban barreesuun gareef gabaasaa.
3. Wantoonni obbo Badiruun aadaa hojii cimaa akka horatu bu'uura ta'aniif maal isintti fakkaatu?

Hojii tuffachuu dhiisuu jechuun hojii kamiyyuu bifaanis ta'e sadarkaan adda osoo hin baasin ykn hin filatin hojjechuu jechuu dha. Hojiin kamiyyuu xiqqadha ykn guddadhaa osoo hin jedhin xiyyeffannaan itti kennamee yoo hojjetame madda galii gaarii ta'uu danda'a .Har'a hojiin xiqqaa jedhamu

xiyyeffanaan itti kenamee yoo hojjatame sadarkaa olaanaa irra nama geessisaa

7.1.3. Yerootti Seeraan Faayyadamuu

- Barattoota mee haala itti fayyadama yeroo keessan hiriyootta keessanitti himaa.**
- Yeroo haalan hojii irraa oolchuu jechuun maal jechuu dha?**

'Adde Haaddaas'

Addee Haaddaas jiraattuu magaalaa Shiree Ganda sadii ti. Umuriin ishii wagga 35 yoo ta'u,naannoo jiraattutti amala hojii gaariin ittin beekamtu keessaa tokko yeroo ishii haalan hojii irra oolchuu dha. Naannoo jirenya ishiitti ilaalchi ishiin yeroof qabdu akka fakkenyaatti kan ilaalamu dha. Haala kanaan yeroo ishii qoqqooduun, cimnaan hojjetee jirenya ishee fooyessuuf karoorfattee jirti. Kana raawwachuuuf dhaaba waldaa liqiif quzanloo Daddabiit seenuuun liqii yeroo murtaa'aa keessatti kaffalamu fudhacuun sa'a rimeessa tokko bitatte. Saani ishiis yeroo baay'ee osoo hin turin raada takka dhalteef .Saati tun guyyaatti leetira sadu elmamaa waan turteef aannan namoota naan-nootti kireessituun liqii ishee yeroon xumurate. Wagga waggaanis sa'a tokko itti dabalaan deemte. Haala kanaan yeroo ishee haalan itti fayy-adamuun hojii horsisummaa irratti bobbaate .Har'a addee Haaddaas maagalaa Shiree

keessatti dhaaba beek-amaa horii itti horsiistu qabdi.

Gilgaala – 5

Dubbisa armaan olii bu'u-ureeffachuun gaaffilee gaditti eeramaniif deebii kennaa

1. Itti fayyadama yeroo addee Haaddaas irraa maal barattan?
2. Sababoota gurguddoo hojii kanaaf kaka'umsa ta'aniif keessaa lamaan isaanii eeraa.
3. Faayadaan yeroo seeraan itti fayyadamuuudhaan argamu maal dha?

7.1.4 Bu'aa Hojii Tuffachuu Dhiisuun Biyyaaf Qabu.

- Yeroo seeraan itti fayyadamuu jechuun maal jechuu dha?**
- Jechi <<Yeroon warqee dha>> jedhu maal agarsiisaa?**

Kiyyeessitoota Qurxummii

Namni kamiyyuu daawwannaadhaaf gara magaalaa Baahir Daar deemu haroo Xaanaa irratti dooniwwan xixiqoon olii fi gadi yoo deeman arguun isaa kan hafu miti. Namoonni kunis batoo asii fi achi gochuun doo-niiwwan kan oofan yoo ta'u jirenyi isaanii magaalaa Baahir Daar ta'ee fi kanneen qurxummii kiyyeessan dha. Namoonni qurxummii kiyyeessan kun gamtaad-

haan gurmaa'anii ciminaan hojjec-huudhaan qurxummii haroo kee-ssaa akka baasaniin uummata maga-alaa kanaaf kan dhiyeessan dha. Mise-ensonni garees haala dandeettii hojii isaanitiin gurmaa'uun hojii qoqqood-datanii jiru. Gareen tokkoo tokkoon isaa itti gaafatamaa fi karoora hojii qaba.

Miseensonni garee yeroo mijaa'aa haroo keessaa oomisha qurxummii baay'ee walitti qabuuf dandeessisu ni beeku. Tokkoo tokkoon miseensi gareewwanii yeroo mijaa'aa kanatti fayyadamuun sa'aatii isaanii eeguun jabaatanii hojetu. Miseensooni kunniin yeroo ammaa kana hojii karooraan qoqqooduun hojjechuu isaanitiin meeshaa ammayyaa oomisha qurxummii kuu-suun isaan dandeessisu gurmeeffatanii jiru. Dooniiwwan xixiqloon dur turan doonii mootora qabuun bakka bu'anii jiru. Meeshaalee ammayyaa qurxummii itti kiyyeessan ,oomisha keessa itti tursiisan (firijii)bitataniin jiru

Magaalaa Bahir Daar keessatti suuq-iiwwan oomisha qurxummii itti raabsan waan qabaniif ummanni naannoo sanaa aadaa qurxummii nya-achuu amaleeffatee jira. Dargaggoonni hojii dhabdoota turan hedduun oomishaa fi gurgurtaa qurxummii irratti bobba'-aniiru. Yeroo irraa gara yerootti oomishni qurxummii isaaniis qulqullinani isaa dabalaa waan deemeef omisha isaanii magaalaa biroof dhi-yeessaa

jiru. Akkasumas, oomisha qurxummii biyyootii ollaatti erguu-dhaan biyya isaaniitiif sharafa alaa guddisuu irratti argamu.

Gilgaala 6

Haala dubbifama armaan olitti dhiyaateen gaaffilee itti aananiif deebii kennaa.

1. Itti fayyadamni yeroo mis-eensota garee maal fakk-aataa? Dubbifama irraa raga a dhiyeessuun deebisaa.
2. Qabxiwwan gurguddaa namoota gurmaa'anii qurxummii qabaniif hundee jabinaa ta'e keessaa sadieeraa.
3. Oolmaa keessan kan guyyaa tokkoo yeroon qoqqoodaatii barsiisaa keessanitti agrasiisaa.

Hojii osoo hin tuffatin xiqaadha ykn guddaadha jedhanii osoo hin filatin hojjechuudhaan lammiiwwan hedduu bu'aa gaarii argatanii jiru. Hojii tuffachuun hin barbaachisu. Hojii kam-iyyuu qixa sirrii ta'een kan raa-wwatamu karoora baafachuu fi karoora bahe sanaan hogganamuun hojjechuun waan ta'eef karooratti fayyadamuun barbaachisaa dha. Mataa Lammuin itti fayyadama yeroo beekuun cimee hojjete maatii isaafis ta'e hawaasa isaatiif jijiirama fiduu danda'a.

Gilgaala 7**Gaaffilee armaan gadii
deebisaa**

1. Faaydaan yeroo seeraan hojii irraa oolchuun qabu maal?
2. Hojii tuffachuun barbaachisaa miti kan jedhame maaliif isinitti fakkaata?

7.2. Osoo Hin Hojjatin Nyaachuu**7.2.1 Osoo Hin Hojjatin Nyaachuun Miid-haa Inni Sadarkaa Maatiitti Qabu**

Fakkii 7.2. Kadhaan rakkoo haww-aasummaa kabaja dhala namaa xuqudha

- **Kadhaan nama dhuunfaa irra darbee akkamiin rakkoo hawa-asummaaf sababa ta'a ?**
- **Namoonni gara kadhaa akka hin deemne maal gochuu qabna?**

Kadhaan gargar baane.

Ayyaantuun intala ishee umurii wagga 8 taate waliin gamoo Xiquur Anbassaa jala mana laastikaan ijaa-ramte keessa jiraatti. Yeroo hundaa karaa foddaa konkolaataa fi balbala

suuqii jala deemuun harka ihsii diriirsuun qarshii argattuun garaa ishee fi intala guutuuf yaalii taasisti turte. Guyyaa ayyaanotaa eeguun bakka adbaarii hunda deemuun akka-sumas nyaata dhukkubsattoota hoospitaala Xiqur Anbassaa irraa hafu argachuuf kadhattoota kan biroo waliin tattaafatti turte.

Haa ta'u malee, namni akka ishee fayyaa guutuu fi sammuu nagaa qabu maaliif kadhannaal irratti akka bobba'u ishumaafillee ifa hin taaneef. Ayyaantuun qabeenya maatii ishee gurgursiistee biyya arabaa erga deemtee booda ,achiiyis deebi'uun daandii maagalaa Finfinneetti baatee jirenya kadhannaal eerga jalqabdee waggoota 14 guuttee jirti.

Ayyaantun umuriin ishiitiis dabala, abdiin ishees dukkanaa'aa waan dhufef jirenya jibbisiisaa kana keessaa akka baatu ni yaaddi turte.

Dhuma irrattis Ayyaantuun jiruu jab-bisiisaa kana keessaa intala ishee fudhattee keessaa ba'uuf murteesite. Ayyaantuun intala ishii feestaala xi-qoon qabattee gara otoobisii biyya ishee deemu yaaphatte. Guyyaa lama booda ganda ishee yoo geessu wanta argite amanuu hin dandeenye. Karaan haaraan, saararri ibsaa fi bilibili diriireera. Ujummoon bishaanii ganda hundatti galeera. Gandi Ayyaantuun inni baadiyyaa ture gara maagalaatti jijji-ram-

eera. Ayyantuunis carraa kanaatti fayyadamuun akka ganda isheetti of jijiiruuf murteessite. Kanaaf immoo maatii fi namoonni naannoo ishee gargaarsa akka godhaniif hubachuun (amanuun) gara dhaaba waladaa liqii fi quşanña ganda isheetti argamu dee-muun maallaqa xiqqoo liqeeffattee suuqii shaqaxaa banatte. Guyyoota fayyadaa tokko malee dabarsaa turt yaadachuun gaabbaa halkanii fi guy-yaam osoo hin jedhiin ciminaan hojjete .Yeroo ammaa Ayyantuun suuqii mi'oota adda addaa qabu banattee of dandeesee jiratti .

Miseenssonni maatii tokko keessa jiran hundi haaluma dandeettii isaanitiin hojii irratti hin hirmaanne yoo ta'e namoonni hojjetan muraasni ni mii-dhamu. Gee'essonnis ta'an, daa'im-man ykn dubartoonni, akkasumas namoonni dhiira ta'an haaluma umrii isaanii fi dandeettii isaaniin hojii wal-rgaaruu qabu. Gama biroon immoo osoo hin hojjetinii fi hin dadhabin kan namoonni biroo itti dadhaban nyaachuuun gocha jibbiisaa ta'u huba-chuun hojiif kaka'uu qabna.

Gilgaala- 9

Gaaffii armaan gadiitiif deebii kennaa

1. Ijoolleen hojii mana keessatti hojjetamu irratti akkamiin hirmaachuu qabu?
2. Wantoota osoo hin hojjetin nyaachuu hambisuudanda'an keessaa lama barreessaa.
3. Maatii tokko keessatti hojii wal gargaaruun akkamiin baratamuu danda'a?

7.3 Dandeettii Ogummaa Fi Naamusa Hojii

7.3.1. Maalummaa Dandeettii Ogu-mmaa Fi Naamuusa Hojii

1. ***Hojjetaan tokko dandeettii hojii ni qaba jechuun maal jechuu dha?***
2. ***Naamusni barataa tokko irraa eegamu maal fa'a dha?***

Ogummaan gosa hojii beekuumsaa fi dandeettii mataa isaa gaafatu dha. Fakkeenyaaaf ogummaa qonnaa, gaa-zexeessummaa, barsiisummaa, abb-aa seeraa fi k.k.f ogummoota hojii adda addaa irratti nama bobbaasuuf gargaaran dha. Kanaaf, hojiawan kana irratti bobba'uuf beekuumsaa fi dandeettii qabaachuu qabna. Naamuusa ogummaa jechuun seerota ogummicha

hojiitti jijiiruuuf hordofuu qabnu kan mul'isu dha. Dandeettii fi naamusa hojii kan jedhamu gahumsaa fi amala namni tokko hojii irratti qabu kan agarsiisu dha. Hujjetaan tokko dandeettii hojii qabaatee naamusa hojii hin qabu yoo ta'e tajaajila isa irraa eegamu kennuu waan hin dandeenyeef maa-milli isaa ni miidhama.

Namni ogummaa fayyaa qabu tokko tajaajilamtoota gara isaa dhufaniif gargaarsaa fi yaalii akka argatan goch-uun dirqama ogummaa isaa ta'uun beekee tajaajiluu qaba. Hawaasni akk-Oamitti dhukkuuboota daddarboo irraa of ittisuu akka danda'u barnoota kennuu dirqamaa ogummaa isaa ti. Gama birootiin akkaataa qorichi itti fudhatamuu fi akkaataa of eegganno-on itti godhamu barsiisuun irraa eegama. Isaan kun naamusa ogummaa yaalaa ti.

Gilgaala -10

Gaaffilee armaan gadiif deebii kennaa

1. Ogummaanii fi naamuusni ogummaa adda bahanii hin ilaalaman jechuun maal jechuu dha?
2. Ogummoonni hundi misooma biyyaaf gahee olaanaa qabu jechuun maal jechuu dha?

7.3.2 Miidhaa Hanqinni Naamuusa Ogummaa Lammilee Irraan Gahu

- *ogeessi tokko naamuusa ogummaa yoo hin kabajne eeny-utu hubamaa?*
- *Ogummaan qofti kophaa isaa bu'aa hin qabu jechuun maal jechuu dha?*

Ogummaan kamiyyuu guddina namoota dhuunfaa, kan naannoo ykn hawaasaa fi misooma biyyaa yoo hin bu'u-ureeffatiin gatii hin qabu. Ogeessi tokko naamuusa ogummaa isaa hanga hin eeginitti bu'aa hin argatu. Kun immoo sadarkaa jirenya isaaas ta'e, kan maatii isaa fooyyessuu hin danda'u.

Ogummaa isaatiin bu'aa dhabaa yoo deemu ogummaa isaa fooyyeeffachuuuf fedhiin inni qabu gad aanaa ta'a.- Akkana yoo ta'u immoo tajaajilli fayyadamtoonni argatan ni xiqlaata. Ogummichis akka hin babalanne ykn hin guddanne taasisa. Tajaajilli lammilee argachuu qabu guutuu hin ta'u. Carraan hojii lammilee ni dhiphata. Kun immoo misoomaa fi fooyya'uun jirenya hawaasaa irratti miidhaa olaanaa geessisa

Gilgaala- 11**Gaaffilee armaan gadiif
deebii kennaa**

1. Naamuusni ogummaa kava-jamuu dhabuun miidhaan gama misoomaatiin biyyattii irraan ga'u maal?
2. Ogummaanii fi naamusni ogummaa akka kabajamu maaltu godhamuu qaba?
3. Naamuusni ogummaa kava-jamuu dhabuun tajaajila-mtoota irratti miidhaa inni geessisu ifa gochuun barr-eessaa.

7.4 Aadaa Hojii Cimaa Fi Misooma**7.4.1 Kaayyoolee Misoomaa Heera Mootummaa Fedeeraala Itoophiyaa**

- ***Kaayyoolee misooma dinagdee kan jedhaman maal fa'a dha?***
- ***Kaayyooleen misooma dinagdee hojii irraa akka oolan maal goc-huu qabna?***

Mootummaan federaala Itoophiyaa biyyattii keessatti misooma ariifachiisaa fi itti fufiinsa qabu fiduf imammataa fi tarsiimoo baadiyyaa giddu-galeessa godhate diriisuuudhaan hawaasa hojiif sochoosee bu'aawwan nama jajjabeessan galmaa'aa jiru. Har'a Ity-oophiyaan kaayyooleen misooma dina-

gdee adeemsisaa jirtu ummata sada-rkaa sadarkaan fayyadamtoota dinagdee kan taasisuu fi hirkattummaa jalaa bahanii guddina misooma ariifachiisaa akka fidan gochuu kan daneessisu dha..Kunis kaayyoolee bu'uuraa afur qaba.Isaanis:

1. Guddina diinagdee ariifachiisaa mirkaneeffachuu akka kaayyoo bu'uuraa fi ka'umsaatti qabaachu.
2. Guddina diinagdee ariifachiisa mirkaneessuun alatti ummanni haala fooyii qabuun fayyadamaa akka ta'u haala mijeessuu.
3. Biyya keenya kadhaa jalaa baasuu fi haala dinagdee addunyaatiin yeroo yeroon jijiiramaa akka deemtu taasisu.
4. Armaan oliiti akka ibsameetti gud-dina ariifachiisaa fiduuf biyya keenya keessatti sirna gabaa bilisaa hojii irra oolchuu dha.

Kanas galamaan gahuuf imaammataa fi tarsiimoo misoomaa baadiyyaa gidduu galeessa godhate diriisuuudhaan miisooma qonna baadiyyaa adeemsisuu fi misooma dinagdee kan biroo irratti harka waliqabachuun tumsanii hojjechuun ni barbaachisa.

Gilgaala- 12**Gaaffilee armaan gadii Irrati
mari'adhaa**

1. Dinagdee gabaa bilisaa
jechuun maal jechuu dha?-
Ogeessa gaafachuun daree
keessatti irrattimari'adhaa.
2. Misooma dinagdee baadi-
yyaa qonna giddu galeessa
godhate yoo jedhamu yaadni
hubattanmaal?
3. Guddina dinagdee misooma
biyyaa irratti gaheen kee-
ssan maal? Daree keessat-
ti irratti mari'adhaa.

Yaada xumura boqonnichaa

Hawaasni aadaa jabaatanii hojjachuu qabu guddinni isaa ariifataa, dinagdeen isaas kan cime dha. Hojiin dhala namaatiif bu'uura (wabii), jireenyaaf immoo furtuu guddinaa waan ta'eef biyyoonni aadaa cimanii hojjechuun gonfatan jiruu mijaa'aa jiraatu. Hojii osoo hin tuffatin akkasumas osoo hin filatin hojiif kabaja qabaachuun warr-oonni hojjetan guddinaan sadarkaa tokko irraa gara sadarkaa olaanaatti jijiiramaniiru. Hojiin yeroo baay'ee hirmaannaa ummataa fi lammilee waan barbaaduuf namoonni hundinuu ogummaa fi dandeettii qabaniin gahee isaanii ba'uu qabu. Inni tokko hojjetaa kuun taa'ee kan nyaatu yoo ta'e kufatii nama dhuunfaa fi hawaasaa fiduu qofa osoo hin ta'in giddina biyyaatiifis

gufuu ta'a. Kana waan ta'eef hojjetaan hundi ogummaa fi naamusa ogummaa isaa walsimsiisuun aadaa hojii cimaa gonfachuuf mataa isaa amansiisuu qaba.

Akkuma beekamu mootummaa feder-aalaa Itoophiyaatis ta'e imaammanni dinagdee keenya lammiin hundinuu kallattii hojii kamiyyuu irratti hirmaatee biyya isaa akka misoomsu carraa bal'aa kennee jira.

Carraa fi mirga lammummaa kanaatti fayyadamuu ogeessi hundi yeroo hojii kabajuun, naamusa hojii eeguun, ogummaa isaa yeroo gara yerootti foo-yeeffachuus ta'e jijiirama misooma dinagdee biyyaa fiduu irratti itti gaafatamummaa qaba.

Gaaffilee Keessa Deebii

I. Gaaffilee armaan gadii dubbisuun kan sirrii ta'e 'dhugaa' kan sirrii hin taane 'soba' jechuun deebii kennaan.

1. Biyyi kan misoomu lammileen hundi aadaa cimanii hojjechuu yoo amaleeffatani dha.
2. Cimee hojjechuu kan qabu qotee bulaa baadiyyaa keessa jiraatu qofa dha.
3. Ogeessi tokko tajaajila ogummaa kenuun alatti naamuusa ogummichaa kabajuun barbaachis dha.
4. Ogeessi tokko ogummaa itti leenjifameen hojii yoo dhabe hojii xixiqqoo kan biroo hojjechuu hin qabu
5. Osso hin hojjetin nyaachuun mallattoo hirkattummaa ti.

II. Kanneen Armaan Gadii Walitti Firoomsaa

"A"

1. Kadhaa
2. Naamuusni ogummaa kan ittiin ibsamu
3. Aadaan hojii gabbachuu
4. Hojii gamtaa liqii fi quşannaan
5. Beekumsa dhokate

"B"

- A. Seeraan Yerootti fayyadamuu
- B. Bu'uura guddinaa fi misooma hawaasaa
- C. Nama beekumsi isaa nama biraan hin fayyadne
- D. Yeroo fi dhala murtaa'aadhaan liqaa liqeefachuu,deebisuu,
- E. Rakkina hawaasaa keessaa isa tokko dha
- F. Qurxummiin kan ittiinkiyyeffamu

III. Bakka Duwwaa armaan gadii jecha ykn gaalee sirrii ta'een guutaa.

1. Guddinni biyya keenyaa kan dhugoomu lammileen aadaa _____ yoo guddifatan dha.
2. Rakkinoota hawaasummaa biyya keenyaa keessaa _____ fi _____ eeruun ni danda'ama.
3. Ogeessi tokko dandeettii ogummaa isaatiin alatti dabalataan wanti kabajuu qabu _____ jedhama.

IV. Gaaffiilee armaan gadiif deebii Sirrii Kennaa.

1. Ogeessa tokko irraa dirqamni eegamu
 - A. Dandeettii ogummaa
 - B. Yeroo seeran itti fayyadamuu
 - C. Naamusa ogummaa
 - D. Hunduu sirriidha

2. Biyyi tokko misoomuu kan dandeessuu
 - A. Aadaa hojii cimaa guddifachuun
 - B. Osoo hin hojjetin nyaachuun yoo cimu
 - C. Hojiwwan muraasni kabaja walqixaa argachuu
 - D. Hundinuu deebii ta'uu danda'u

3. Hojii ilaalcissee sirri kan hin ta'in kamii ?
 - A. Hirakattummaa balleessuu
 - B. ogummaa ofitiin hawaasa tajaajiluu
 - C. Yerootti seeraan fayyadamuu
 - D. Osoo hin hojjetin nyaachuu

4. Rakkina guddaa hawaasummaa tokko kan ta'e isa kam?

A. Aadaa hojii isa cimaa	C. Walqixxummaa
B. Kadhaa	D. Hunduu sirriidha.

5. Kanneen armaan gadii keessa tokko hojii qonnaa miti.

A. Horii furdisuu	C. Qonna Amayyaa
B. Biqiltoota kunuunsuu	D. Albuuda baasuu

V. Gaaffilee armaan gadiif deebii gabaabaa kennaa

1. Hojiin xiqqaa fi guddaa hin qabu jechuun maal jechuu dha?
2. Hirkattummaan maal maaliin ibsama?
3. Yeroo seeraan itti fayyadamuu dhiisuun miidhaa maal fida?

BOQONNAA SADDEET

OF DANDA'UU

Kaayyoolee Boqonnichaa: Barumsa kana erga xumurtee booda:

- *Maalummaa hirkaattummaa hawaasummaa fi dinagdee ni hubatta .*
- *Barbaachisummaa ejennoo mataa ofii yaada namoota kan biroo waliin wal simsiisuu ni hubatta.*

8.1. Faaydaa of danda'uu

- Waan kutaa 5^{ffaa} kessatti barattanii fi muuxannoo keessan ka'umsa gochuun faaydaa of danda'uu ibsaa.
- Namoota naannoo jirenya kees saniitti of irratti amantaa qaban jettanii yaaddan maqaa isaanii eruun sab-aba kana jettaniif ibsaa.

Of Danda'eera

Dandeettii fi humna koo madaalee beekeera. Waanan danda'e hunda cimee hojjachuuf ka'eera. Nama barsiisuuudhaan ofiifis barachaa. Hirkattummaas ta'e kadhaarraa ba'eera.

Akka namaa gadi hin taane ofitti amaneera. Kanaan booda hin jiraadhuu eenyuttuu hirkadhee. Kadhaan hin jiraadhu harka koo diriirsee. Ofiin of nan bulcha. Kadhattuu hin ta'u nan jiraadha hojjedhee. Of danda'uu kootiin jabe-enya argadhee.

Galgaala -1

Walaloo armaan olii irratti hundaa'uun gaaffilee kanaa gaditti kennamaniif deebii kennaa

1. Of danda'uuf maal gochuu qabna?
2. Walaloo kana keessaa jechootaa fi gaaleewwan faaydaalee of danda'uu ibsan adda baas-un irratti mari'adhaa.

Of danda'uu jechuun beekumsa, diinagdee fi humna ofii itti gaafatamummaa fudhatanii ofiif , maatiif, hawaasaa fi biyya ofiif fayyaduuf qabatamaan hojjachuudhaan hirkattummaa jalaa ba'uu jechuu dha. Haaluma kanaan mana keessatti, mana barnootaatti hariiroo hawaasummaa kees-

satti, dinagdeenis ta'e yaadaan namo-ota biroo irratti osoo hin hirkatin fedhii ofii gama adda addaatiin guutt-achuu ni dandeessisa. Fakkeenyaaf baratt-oonni of danda'anii hojjechuu kan qaban keessaa seeraa fi qajeelfama mana barnoota isaanii kabajuu fi barumsa isaanii cimanii barachuu dha. Kana yoo raawwatan immoo lammii mataa isaaniif, Maatii fi biyyaaf fayy-adu ta'uu danda'u .Haala yeroo qo'annaa isaanii hin tuqneen warra isaanii hojiin gargaaruu akkasumas ofis gargaaruun jirenya isaanii gara fulduraaf bu'uura cimaa buusuu qabu.

Walumaagalatti, of danda'uun hirkattummaa hawaasummaa fi dinagdeef osoo hin saaxilamin of irratti amantaa qabaachuu ,yaada mataa ofiin hogg-anamuu ,eijennoo mataa ofii qabaachuu fi murteessuu nama dandeessisa. Namoonni of danda'an miirri wal qixxummaa waan itti dhagahamuuf faaydaa nama biraan irraa argamu jala hin galan; Hin kadhatanis.Kanaaf, walabummaa isaanii eeganii kaka'-umsa mataa isaanii fi itti gaafatam-ummaan hojii misoomaa ni hojetu.

Gilgaala -2

Gaaffilee armaan gadiif deebii kannaa.

1. arattoota mee isin keessaa nama tokko kan isin mari'acihiisuu fi barreessaa filadhaa. Sanaan booda harka baasuun faaydaa of danda'u irraa argamu tarreessaa. Barreessaan gabatee gurraacha irraatti yaa barreessu. Itti aanuun tarreeffamoota dhiyaatan keessaa sirrii kan ta'ee fi kan hin taane irraatti sababa dhiyee-ssuun irratti mari'adhaa .Xu-mura irrattis yaada tokko irraa gaha .

8.2 Hirkattummaa

8.2.1. Hirkattummaa Jechuun Maal Jechuu Dha?



Fakkii 8.1 Barataa qorumsa irratti barataa biraan irraa deebii hataa jiru

- ***Akka fakkii kanaatti sababni barataa kana hirkataa taasise maal?***
- ***Akka fakkii armaan oliiti barataan kun hirkattummaa irraa walaba ta'uuf maal gochuu qaba?***

Ilma Hirkataa

Obbo Ismaa'eel ijoolee lama Fatiyaa fi Ahimad kan jedhaman qabu. Dabalataan Zayinuu guddifachaan fudhatanii jiru. Warri Zeyinuu waan irraa du'aniif obbo Ismaa'eel isa kan guddisan. Ahimad yeroo mara ispoortii meeshaalee ulfaatu kaasuu hojjeta. Nyaatas sirritti nyaata. Kanaaf, qaamni isaa baay'ee jabaa fi cimaa dha

Fatiyaan uffata isaa miiccitiif. Zayinuu kutaa ciisicha isaa qulqulleessaaf. Nyaata qophaa'ee dhiyaate nyaachuufillee bishaan harka ittiin dhiqatu hatatamaan yoo hin kennamneef ni lola ture. Mana barnootaattis barattoonni kutaa humna isaa waan sodaataniif qormaata ofi hojjechiisaa turan. Zaiyinuu garuu hirkataa ta'uun waan hin barbaadneef mana isaa keessatti hanga humna isaa hojiidhaan ni gargaara. Beekumsa argachuus waan barbaaduuf qo'annaa isaa yoo xumuru hojii manaa kennameef hojjeteet gara gaaraajii obbo Ismaa'eel deema. Achittis makaanikoota meeshaalee adda addaa dhiyeessaa fi waan isaan hojjetan hubata.

Obbo Ismaa'eel haala Zayinuu irra jiruun gammadanis haalli Ahimad irra jiru garuu baay'ee isaan gaddisiisa ture. Jireenyi isaa kan gara fuula duraas baay'ee isaan yaaddessa ture.

Obbo Ismaa'eel guyyaa tokko haala Ahimad irra jiru isa hubachiisuuf mala waan argatan itti fakkaannaan lamaan isaanii waamanii "Ani dulloomee jira waan ta'eef gaaraajichaa lamaan keessan keessa namni tokko itti gaafatatummaa fudhattanii bulchitu jedhan. Waan hunda dura garuu bee-kumsa waayee gaaraajii irratti qabdan madaaluuf waayee gaaarajii ilaachissee qormaata isiiniif kenna jedhan. Zayinuu dafee toolee jedhe. Ahimad garuu hojii hojjeteet waan hin beekneef ykn namoonni yoo hojjetan hubatee waan hin beekneef of irratti amantaa qabaachuu hin dandeenye. Aareet "Anii bar ilma kee ti." jedheen. Kanaaf, hirkataa waliin hin dorgomu jedhe. Obbo Ismaa'eelis amala hirkattummaa kan qabu Ahimad ta'uun isaa ifatti waan itti mul'teef gaddanii "Hirkataa si dha malee Zayinuu miti " jedhanin.

Gilgaala- 3**Dubbisa Armaan olii bu'uura godh-achuun gaaffilee kanaan gadiif deebii kennaa**

1. Obbo Ismaa'eel Zeyinuun hirkataa miti yoo jedhan maal jechuu isaanii ti ?
2. Ahimad ofitti amanee akka hin dorgomne gufuu kan itti ta'e maal?
3. Akka Ilaalcha keessaniitti Ahimad fi Zeyinuu keessaa yaada hirkat-tummaa kan qabu eenyuu?
4. Ahimad gara fuuladuraatti nama ofitti amanee jiruu fi jirenyaa isaa fooyeessee of bulchu akka ta'u maal goc-huu qaba?

Hirkattummaa jechuun meeshaalee fi fedhii ofii beekumsa, maallaqaa fi humna nama birootiin akka guutamuuf eeguu jechuu dha. Fedhiin kun immoo dandeettii keenyaatti akka hin fay-yadamnee fi akka of hin kabajne taasiisuun walabummaa keenya dabarsinee namoota birootiif akka kenninu nu taasisa. Ofittis amantaa waan dh-abnuuf hojii hojjechuu ni sodaanna. Hojii yoo hin hojenne immoo beekumsaa dagaagfachuun hin dand-aamu jechuu dha. Yeroo dargaggummaa beekumsa argannee hojii bu'a qabeessa ta'e akka ittiin hojjechuu hin

dandeenye nu taasisa. Kanaaf, lammii gaarii taanee hirka-ttummaa ijoollum-maa keenya irraa kaasnee dhabamsiisuu qabna.

Gilgaala- 4**Gaaffilee armaan gadiitiif deebii kennaa**

1. Hirkattummaan haala kamiin beekumsaan akka hin gud-danne guufuu ta'uu danda'a?
2. Hirkattummaan ofitti amanummaa akkamiin dhabamsiisa?
3. Hirkattummaan haala kam-iin walabummaa keenya akka dhabnu nu taasiisaa ?

8.2.2 Hirkattummaa Dinagdee Fi Hawa-asummaa

1. Daldalli seeraan alaa (kontiroba andii) miidha hawaasummaa fi dinagdee irratti qabu ibsaa.

Hibboo

Hibboo Lakk 1	Hibboo Lakk 2
<p>1. Hibboo Habbakka</p> <p>Gaaffii: Miidhaan daldala seeraan alaa maal?</p> <p>Deebii: Qorichaa fi nyaata qulqulina hin qabne gara biyya keessaatti galchuu dha.</p> <p>Gaaffii: Miidhaan biroo hoo maal dha?</p> <p>Deebii: Meeshaalee waraanaa yakki ittiin hoijetamuu fi baalli sammuu dhala namaa hadoochu daangaa cabsuun biyya keessa galuun fayyaa fi tasgabbii ummataa jeequ.</p>	<p>2. Hibboo Habbakka Gaaffii:</p> <p>Daldalli seeraan alaa biyya hiyoomsa, gárg-aarsa eeggattuu nama taasisa. Kun akkamitti akka ta'e eenyu kan ibsu?</p> <p>Deebii: Ana, Gibira otuu hin kaffalin akka darban nan beeka. Daldaltoonis seeraan ala gibira osoo hin kaffalin hafuun maallaqa ummataa misoomaaf oolu hatanii hambisi.</p> <p>Gaaffii: Maal wayya ree?</p> <p>Deebii: Biyyi keenya biyyoota guddatan waliin akka deemtu namota osoo gibira hin kaffalin seeraan ala daldaluun qabeenya ummataa fi biyyaa hatanii hambisan irratti ni qabs-oofna.</p>



Fakkii 8.2 Daldalli kontiroobaandii biyya miidha

Gilgaala -5

Hibboo fi hibbakka armaan olii bu'uura godhachuun ga-affilee armaan gadiitiif dee-bii Kenaa.

1. Hibboo fi hibbakka armaan oliitti ibsame qo'adhaatii lama lama ta'uun haala seera tapha hibboo fi hibbakkaatiin taphadhaa.
2. Nama tokko kan isiin mari'achisuu fi barreessaa tokko filadhaa. Daldala seeraan alaa ilaachisee hibboo fi hibbakka keessatti kan ibsam an akkamiin miidha dinagdee fi hawaasummaa geessisuu akka danda'an irratti mari'adhaa.

Meeshaaleen adda addaa karaa daldala seeraan alaatiin biyya keessaa yoo bahanii fi galan qabamuu isaanii sub-qunnamtii adda addaa irraa dhagahama. Meeshaaleen qabamuu qofa osoo hin ta'in abbaan qabeenyichaas mana murtiitti dhiiyaachuun adabbiin maallaqaa fi hiidhaa itti murtaa'aa jira. Xiyyeffannaan kun hundi daldala seeraan alaatiif maaliif barbaachise isiniti fakkaata? Sababiin xiyyeffanna kanaa : Daldala seeraan alaa seera biyyaa cabsuun meeshaalee garagaraa gara biyya keessaatti

galchuu fi gara biyya alaa erguun kan raawwatu ta'uun isaa ti. Kun immoo mootummaan tajaajila hawaasaa guut-uuf galii keessaa fi alaa gama gibiraa fi sharfaan argatu hir'isuun dinagdeen biyyaa akka kufuu fi biyyattiin hirkattuu akka taa'tu kan godhu dha. Karaa birootiin immoo fiilmii, poo-staraa fi fakkiwwan adda addaa fi duudhaa akkasumas safuu hawaasa waliin kan hin deenmee fi jirenya hawaasummaa irratti miidhaa geessisan biyya keessa ni galu. Dbalataaniis meeshaaleen waraanaa seeraan ala daangaa cabsuun ni galu. Meeshaaleen kun immoo seeraan otuu hin galmaa'in harka namoota dhunfaa galuun qabeenyi ummataa fi mootummaa akka saamamuu fi jeequmsi akka ittiin gaggeeffamu ta'a.

Nyaatnii fi qorichi qulqullinni isaanii hin mirkanoofne yeroon itti tajaajila kennan hin beekamne, qaama namaa irratti miidhaa kan hin geessisne ta'uun isaanii hin hubatamne, gara biyya keessaa akka galan godha. Kanumaan walqabatee yeroo ammaa sadarkaa addunyaatti gochi seeraan alaa ykn sochiwwan yakkaan walqabatan kan akka baala sammuu dhala namaa hadoochuu kan raawwtamu karaa daldala seeraan alaa kanaan dha. Waan kana ta'eef daldalli seeraan alaa dinagdee fi hawaasa biyyaa irratti miidhaa kan geessisu waan

ta'eef hundi keenya daldalli ser-aan alaa kun diina biyyaa ta'uun beeknee irratti qabsaa'uu qabna.

Gilgaala - 6

Gaaffiilee armaan gadiif deebii kennaa

1. Miidhaan daldalli seeraan alaa gama dinagdee fi hawaasummaa biyyaa irratti fidu ibsi.
2. Daldala seeraan alaa irratti namoonni hirmaatan namoota amala akkamii qaban dha?

8.3. Oifiiti Amanuu

8.3.1. Malawwan Ofitti Amanuun Ittiin Ibsamu

- ***Gochawwan ofiitti amanuun ittiin ibsamu jettanii yaaddan tarreesaa.***
- ***Barattoonni mana barnootaa keessatti amantaa of irratti qabachuun isaanii akkamiin akka bee-kamu ibsaa.***

Firii Baratichaa

Barsiisaan firii qormaata barattootaa afaaaniin himaa jiru. Kana keessa barataan tokko barataa maddii isaa taa'etti hasaasuun," Barsiisaan keenya firii koo na jalaa dogoggorsiiseera" jedheen. Hiriyaan isaas "Na irraa callisi.

Akkamitt dogoggorte naan jetta jec-huun ni dheekkamu” jedheen.

”Dogoggorri jiraachuun isaa dhugaa dha.Kana ibsuus nan danda'a.”-jedhe.

Sana booda bakka taa'ee ka'uun:- ”Barsiisaa, firii koo na jalaa dogoggortan” jedheen. Barsiisichis fuula isaa walitti guuruudhaan ”Waraqaa qorumsa`keessanii sirriitti ergan soro-orsee booda dha galmeessee kanan baase” jedhan. ”Lakkii barsiisaa tasumaa sirrii miti. Ani barumsa koo daree keessatti sirritti hordofeera. Hojii manaa nuuf kennname hundas hojj-adheera. Qormaataafis qophaa'eetan gale. Sirritti wantan irratti qophaa'eef qorumsichis natti hin ulfaanne. Kanaafuu, firiin natti himtan inni gad aanaan kun kan koo ta'uu hin danda'u” jedheen. Barsiisichis sababni barataan dhiyeffate amansiisaa waan ta'eef gara biirootti deebi'anii deeman. Isa booda waraqaa qorumsa baratichaa yeroo ilaalan baay'ee dinqisiifatan. Sababiin isaas firiin baratichi argate baay'ee olaanaa ture. Barsiisichis gara dareetti deebi'uudhaan dhiifama gaa-fatan.

Gilgaala- 7

I. Dubbisa armaan olii irratti hundaa'uun gaaffilee armaan gadii deebsi.

1. Barattoota dura taa'aa fi barreessaa tokko filadhaa. Sana booda dubbifama armaan olitti dhiyyaate irraa ka'uun barataan kun mataa isaatti abdachuu akka danda'u taasisan gadi fageenyaan ibsaa. Dabtara keessan irrattis yaadan-noo barreessuu hin dagatinaa.
2. Isin akka barataa cimaa kanaatti rakkoon osoo isin mudatee maal gootuu?
3. Sababoota yaadni barataa cimaan kanaa fudhatama akka argatu taasisan ibsaa.

Ofitti amanuu jechuun mataa ofii danda'uu wajjin walitti hidhama qaba. Namni hirkattummaan jiraatu lammii mataa isaatti amanu ta'uu hin danda'u. Mataa ofii danda'uun immoo aadaa hojii cimaa qabaachuu dhimma bu'uura ta'e dha.Lammiin aadaa hojii gaariin qarame mataa isaa danda'ee mataa isaatti amanuun isaa kan oolu miti.Namni haala kanaan of irratti amantaa qabu nama waayee isaa irratti hubannoo sirri qabu dha. Kanaafuu, waliin mari'atanii wal hubachuu fi yaada mataa isaa yaada namoota kan birii waliin wal simsiisuuf akk-

asumas dogoggora jiru amanee fudhachuu fi sirreessuu hin rakkatu. Kana irra darbee immoo lammiileen ofitti amanan yaada namoota biroo waan keessummeessaniif guddina dimokraasi, nageenyaa fi misooma biyya keenyaaf gahee murteessaa ta'e qaba.

Gilgaala-8**Gaaffilee armaan gadiif deebii kennaan**

1. Ofitti amanuuf of danda'-uun barbaachiaa kan ta'e maaliif?
2. Amala namoota ofitti aman-anii ibsaa.

Yaada xumura boqonnichaa

Of danda'uun aadaa hojii cimaa guddiffachuu fi itti gaafatamummaa fudhachuu waliin kan walqabatu dha. Of danda'uun miira ofitti amanuu fida. kadhaa balleessuun walqixxummaan akka jiraannu nu taasisa. Gama biroon immoo hirkattummaan humna dadh-absiisuun kaka'umsa dhalli namaa hojii adda addaa irraatti qabu ajjeesuu irra darbee jirenya namaa keessatti gufuu ta'a. Daldalli seeraan alaas fayyaa, dinagdee, nageenya fi jirenya

hawaasummaa garmalee miidhu. Ku nis bu'aa yaada hurkattummaa ti. Kanaaf, humna qabnu haalaan xinx-aluun, yaada keenya yaada nama biroo waliin wal simsiisuu qabna. Dhim-moota mataa keenyaaf, maatii fi biyya keenyaaf ni fayyadu jennee itti amannee ejjennoon hojii irra oolchuunf itti deemuu fi dogoggora jiru amannee fudhachuun sirreessuun bu'a qabe-essa dha. Tattaaffiin lammiin kamiyyuu of danda'uu fi ofitti amanuuf god-hu guddinaa fi badhaadhina biyyaaf gahee olaanaa qaba.

JECHOOTA IJOO

kadhattuu: Osoo hin hojjetin namoota kadhaadhaan jiraatan.

Matta'aa: Kenna karaa seeraan ala ta'een dhimma tokko raawwachiisuuf jech amaallaqa ykn waan biraan namaaf kennamu ykn nama irraa fudhatamu

Beekumsa Namoota Biroof Dabarsuu: Waan beekan namni biraan akka beeku gochuu

Hirkattummaa: Osoo hin hojjetiin bu'aa dhafqa namoota birootti hirkatanii jiraachuu.

Gaaffilee keessa deebii

I. Gaaffilee armaan gadii dubbisuun jecha sirrii ta'eef 'dhugaa' jecha sirrii hin taaneef 'soba' jedhuun deebisaa

1. Of danda'uun miira kadhaa dhabamsiisuuf ni gargaara natti hin fakkaatu.
2. Miirri hirkattummaa humna keenya guutummaan guutuutti akka itti hin fayyadamne nu taasisa.
3. Humna qabnuun namoota biroo gargaaruun nuti akka of hin dandeenye gufuu nutti ta'a.
4. Ofitti amanuu kan dandeenyu waa'ee mataa keenyaa hubannoo sirrii ta'e yoo qabaanne dha.
5. Yaada keenya yaada namoota kan biroo waliin wal simsiisu akka dandenyu yaada namoota kan biroo fudhannee raawwachuu qabna.

II. Gaaffilee "A" jalaa kan "B" jala jiraniin Walitti firoomsi

"A"

1. of danda'uun
2. Barataa of hin dandeenye
3. Waayee ofii hubannoo sirrii kan qabu
4. Matta'aa kenuun dhimma ofii Raawwachiisuu
5. Daldala seeraan alaa

"B"

- A. Nageenya hawaasaa fi dinagdee biyyaa ni miidha.
- B. Ofitti kan amanu
- C. Hirkataa
- D. Falmanii amansisuu ykn yaada namoota biroo amananii fudhachuu
- E. Qormaata nama biroo irraa hojjachuu

III. Gaaffilee armaan gadiif deebii sirrii ta'e filadhaa.

1. Ofitti amanammummaa jechuun

- A. Namni kamiyyuu tattaaffii yoo taasise figichaan tokkoffaa baha jechuu dha.
- B. Dandeettii fi humna ofii madaaluun tattaaffii ofiitiin qabeenya ittiin jiraatu argachuuf madda galii horachuu jechuu dha.
- C. Fedhii ofii guutuuf jecha hirkataa ta'uun dhiisuu
- D. 'B' fi 'C'n deebii ta'u

2. Of danda'uu

- A. Nama beekamaa ta'uun barbaachisaa dha.
- B. Humnaa fi dandeettii ofii madaaluun beekuu fi hojjechuun barbaachisaa dha.
- C. Beekumsa ofii guddisuu fi of cimsuun barbaachisaa dha.
- D. hunduu sirrii dha.
- E. “a” n alatti hunduu deebii dha.

3. Namoonni ofitti amanan

- A. Yaada namoota biroo hin fudhatan
- B. Wantoota haaraa uumuuf yaalii taasisu
- C. Yaada namootaa seeraan ni dhaggeeffatu, amantaa mataa isaaniis namoota biroof ni ibsu
- D. “A” n alatti hundinuu sirrii dha

4. Hirkattummaa jechuun

- A. Osoo hin dadhabin jiraachuu waan nama dandeessisuuf faaydaa qabeessa dha.
- B. Hamilee namaa laamshessuun miira gad aantummaa uuma
- C. Bu'uura guddinaa ti
- D. Hundinuu deebii dha.

5. Dogoggora amananii fudhachuun faaydaa qabeessa kan ta'e

- A. Namoota lolan irraa walaba ta'uuf jecha yoo raawwate dha.
- B. Faaydaa dinagdee argachuuf jecha yoo raawwate dha.
- C. Amala wantootaa madaaluu fi hubachuudhaan kan raawwatu yoo ta'e dha.
- D. Namoota birootiin galatoomfamuu fi faaydaa argachuuf jecha yoo raawwate dha.

IV. Bakka duwwaa armaan gadii jecha ykn gaalee sirrii ta'een guutaa

1. Daangaa biyyaa cabsuun meeshaalee adda addaa seeraan ala biyya keessa galchuun _____ jedhama.
2. Akka bishaan boollaa yaa'uutti yeroo hunda yaada namaa irratti hunda'uun _____ jedhama.
3. Kensi namoota aangoo qabanitti fayyadamuun faaydaa seera qabeessa hin taane argachuuf jecha kennamu _____ jedhama.

V. Gaaffilee armaan gadiif deebii gabaabaa kennaa

1. Miidhaa hrkattummaan fiduu danda'u ibsaa.
2. Faaydaa of danda'uun argamsiisu tarreessaa.
3. Yaada mataa keenyaa fi kan namoota biroo wal simsiisuun maaliif barbaachisa?

BOQONNAA SAGAL

AADAA QUSANNA

Kaayyoolee Boqonnichaa: Barumsa kana erga xumuteen booda

- *Faaydaa qusannaan qabu ni beekta*
- *Baasii baraachisaa hin taane hiri'isuun mallaattoo qusanna ta'uu ni hubatta.*
- *Humnaa fi dandeettiin buluudhaan aadaa qusannaakka akkamitti cimsuun akka danda'amu ni hubatta.*

9.1. Qusanna

9.1.1. Faaydaalee Qusanna

- *Naannoo jirenya keessatti namoota qusannaatti fayyadamuun of danda'an beektuu? Jiruu isaanii kan duraa fi kan ammaa wal bira qabuun madaaluun garaagarmmaa ykn jijiirama jiru hiriyyoota keessanitti himaa.*

Tirsiiifi obboleeyyan ishee

Tirsiiifi fi obboleeyyiin ishee abbaa fi haati isaanii balaa konkolaatatiin erga du'anii wagga tokko darbeera. Yaa tu'u malee warri ijollee kanaa yeroo lubbuun turan maallaqa waan qusataniif ijoolleen isaanii rakkoo malee jiraachuu itti fufan. Tirsiiit beektuu waan taateef quxusuwwan ishii

hogganuun maallaqa qaban seeraan itti fayyadamaa barnoota isaanii barachuu akka qaban itti himte. kanumaan maallaqa kanatti fayyadamaa walii yaaduun jiraatu. "Maa tiin keenya osoo maallaqa kana yeroon qusachuu baatanii har'a eessa seenna turre ?"- jechuun warra isaanii galateeffatu.

Gilgaala -1

Gaaffilee armaan gadiif deebii sirrii ta'e kennaa.

1. Tirsiiifi fi obboleeyyiin ishee barumsa isaanii osoo addaan hin kutin barachuu kan danda'an maallaqa warri isaanii olkaa'aniifiin ta'uu isaa see-naa kana irraa hubachuun ni danda'ama. Kanaaf, warri ijollee kanaa maallaqa kana qusachuu kan danda'an tasa du'uu ofii waan beekaniif ta'-innaa laata? Deebiin keessan "eeyyee" yoo ta'e akkamitti beekuu danda'an? Deebiin keessan "miti" yoo ta'e maallaqa kana maaliif akka olkaa'an ibsaa.
2. Dubbisa armaan ol bu'uureeffachuu Tirsiiifi fi obboleeyyiin ishee hanga of danda'anitti barachuuf jecha maallaqaa warra isaanii irraa dhaalan akkamitti itti faaydamuu qabu?

Qusannaan faaydaa hedduu qaba. Galii yeroo murtaa'aa ta'e tokko keessatti argamu qusachuun of fuulduraaf olkaa'u fi rakkoon tasaa yoo nama qúnname rakkoo ittiin bahuuf nama fayyada. Qusannaan fedhiwwan bu'uura ta'an guuttatanii jiraachuuf baa'yee fayyada. Fedhiwwan bu'uura jirenya dhala namaaf barbaachisoo ta'anis kan akka midhaan nyaataa, uffataa fi mana jirenyaa fa'a dha. Qusannaan dhunfaanis ta'ee, maatiin akka of danda'anii fi dandeettii ofitti amanuu akka horatan taasisaa. Namoonni mataa ofii danda'an miira hirkattummaan ykn gad antummaan ykn hiyyummaan itti hin dhagahamu.

Qusannan barumsaan of guddisuuf nama gargaara. Wayeen barumsaa yoo ka'u yeroo baa'yee summuutti kan dhufu waayee barumsa ijoolee qofa ta'uu danda'a. Haa ta'u malee barumsi umuriin wan hin daangeffamneef maatiin ijoollees sadarkaa olaanaa irra hin geenye yoo ta'e jiruu ofii foy-yeffachuuf jecha hojjechaa baratu. Fakkeenyaaaf, mana barnootaa fi koll-ejjii keessatti namoonni galgala bartan hojji idilee kan qabanii fi maatii bulchan dha. Kana gochuu kan danda'an galii argatan irraa qusachuun baasii barumsaaf barb-aachisu kaff-aluudhaan dha. Qusa-nnaan yeroo dhukkubsatan, dullo-omanii fi sababa adda addaan humna daban kadhaaa namaa irraa nama oolcha.

Gilgaala -2

Gaaffilee armaan gadiif deebii kennaa

1. Faaydaalee qusannaa
keessaa sadeen isaanii maatii
ykn namoota naannoo
keessanitti beekatan irraa
ka'uun akka-sumas dubbisa
armaan olii irraa ka'uun
hiriyoota kees-saniif ibsaa..
2. Wanti sadarkaa keessanitti
qusachuu dandeessan jira
yoo ta'e ibsaa.

9.1.2. Tooftaalee Qusannaa

Maloonni qusannaan ittiin gaggeeffamu jechuun maal jechuu dha? Mee barsiisa fi hiriyoota keessanitti himaa.

Al- Kudhan safarii si'a tokko muri

Ganda tokko keessatti hanqinni roobaa ni qunnama jedhanii yaaduun ogeessonni qonnaa ummataaf barnootaa fi akeekkachiisa kennuuf gara gandichaa dhaqan. Haala kanaan namoonni naanno kana jiraatan bara dhufutti beelaa akka hin saaxilamne qabeenya isaanii ammumaa kaasee qusannaan akka itti fayyadamuu qaban barsiisan. Kana booda obbo Tasammaa fi haati manaa isaanii Aadde Achaamyallash hojiiwwan bara kanaa fi bara dhufu raawwachuu barbaadan irratti mari'achuu akka qaban walii galan.

Bara kana intalli isaanii angaftittiin kolleejjii dhunfaatti galmooftee barachuu akka qabdu waan ama-nsiisteef yaada ishii fudhatanii jiru. Ilmi isaanii immoo haati manaa isaa ulfa waan taateef isaan bira dhuftee dahuu akka qabdu murteessanii hanga dhuftutti qophaa'anii eegaa jiru.

Sadaffaan immoo mana isaanii citadhaan ijaaramee ture gara qorqoorrootti jijiiruu akka qaban arm-aan dura murteessanii waan turaniif isuma kana gochuuf qophaa'aa jiru.

Baasiwwan armaan olii kan isaan eegan ta'uwaan hubataniif irratti karoorfatanii qotiyoo sadeen qaban keessaa tokko gurguruuf, midhaan bara darbe galfatan keessaa immoo dheedhii kuntaala lama akkasumas lukkuu buphaa buustu takka gurguruuf yaadanii jiru. Barnoonni ogeessota qonnaatiin kennameef garuu hojii hojjechuuf karoorfatan irra deebi'anii akka itti yaadan taasise. Kanuma cinaatti immoo maatii isaan bulchan saglaniif uffataa fi nyaata dhiyeessuuuf itti gaafatamummaa qabu. Kanaaf, akka yaada alkudhan safarii si'a tookko muri jechuun hawaasa keessatti himamutti rakkoo dhufuu danda'u ilaaluun hawwii isaanii hojii irra oolchuun dura irra deebi'anii xinxaluu qabu.

Gilgaala- 3

Gaaffilee armaan gadii irratti mari'adhaa.

1. Obbo Tasammaa fi Achaam-yellash bara kana keessa karoora meeqatu isaan eeggata Maal fa'a dha ?
2. Galii qaban keessaa bahii gochuuf kan karoorfatan rakko Isaanii waliin wal madaalaa? Akkamitti?
3. Karoora Isaanii keessaa kan haqamuu danda'u jiraa ? Deebiin keessan "Jira "yoo ta'e isakam? "Hinjiru" yoo ta'e maa-liif?
4. Gorsa ogeeyyi dhaga'u fi hordofuun nama fayyadaa?

Dubbisicha bu'uura gochuu fi haala qabatama naannoo keessanii irraa ka'uun deebii keessan kennaa.

Maallaqa baayyee si'a tokko argatn irraayis ta'e galii yeroo yeroon argatan irraa kuufachuun barbaachisaa dha. Haa ta'u malee maloonni qusannaan itti gaggeeffaman maal fa'adha? Maloota qusannaal ilaachisee isaan armaan gadii akka fakkeenyatti eeruun ni danda'ama.

A. Baasii hin barbaachisne hambisuu ykn hir'isuu

Baasii hin barbaachisne hambisuun ykn hir'isuun maloota qusannaa keessaa isa tokko dha. Fakkeeny-aaf, maatiin ijoollee barsiisaa jiran baasii humnaa olii gammachuu (cidhaa) fi gaddaaf baasuu irra wantoota barumsa ijoollee isaanitiif barbaachisu guutuuf dursa kennuu qabu. Namoonni kunniin qabeenya gahaa qaban yoo ta'e malee meeshaalee bareedinaa bituu, yeroo yeroon iddo bashannanaa deemuu ,yeroo yeroon humnaa ol keessummaa afeeruu hin qaban.

B. Mataa Ofii fi maatii ofii karooraan bulchuu

Maloota qusannaa kan ta'an keessaa kan biroo mataa ofii fi maatii ofii karooraan humna ofii irratti hunda'uun bulchuu dha. Akkuma bee-kamu biyya keenya Itoophiyaa keessatti aadaa maatii baay'ee horachuu fi wal gargaaraa waliin jiraachuun kan barame dha. Haalli kun immoo karoora fi humna qabaniin jiraachuun keessatti gadi fageenyaan itti yaaduu gaafata. Maatiin miseensa baay'ee qabu baasii midhaan nyaataa, uffata,fayyaa fi barnootaa guutuuf yeroon itti rakkatu jiraachuun ni danda'a.Kana waan ta'ef ,maatii ofii bittinsuun ,ijoollee jiruu fi jirenya daandiif saaxiluu ykn ,humna isaanii ol hojjechuun akka bulan taasisuu danda'a. Al-tokkoon miseensota maatii hundaaf uffata

bituun rakkisaa ta'uu danda'a. Yeroo murtaa'e keessattis galii faaydaa maatii hundaaf oolu argachuun rakkisaa ta'uu danda'a. Miseensa maatii loogii malee bulchuun barbaachisaa dha. Kana keessa wanti guddaan yaadamuu qabu aadaa qusannaa cimsuu fi isuma kana miseensonni maatii hundi akka hubatan gochuu dha. Maallaqni qusatame altokkoon fedha maatii hundaa guutuu hin danda'u yoo ta'e rakkoo cimaa ta'ef dursa kennun barbaachisaa dha. Dabalataanis akka fakkeenyatti yoo fudhanne biyya keenya keessatti iddo baay'eetti ilma dhiira gara mana barumsaatti erguun akka-sumas dubartii immoo sagantaa cidhaa humnaa ol ta'e qopheessuun heer-umsiisuun kan barame dha.Inni kun immoo loogii kan qabuu fi yaada bu'uura qusannaatiin kan wal faallessu dha. Maatii horachuu irraa kaasee galii argamu rakkolee ciccimoo ta'an hiikuuf oolchuun murteessaa dha. Maatii baay'isuu dhiisuun ,galii fi baasii waliin madaaluun karooraan jiraachuuf haala mijeessa.

C. Mallaaqa kuufame qabaachuu

Herrega baankii banuu,iqqubii,hojii gamtaa qusannaaa fi liqaadhaan gurmaa'uun mala qusannaa isa bayeessa dha. Maallaaqa baay'ee si'a tokko kaa-wachuunis dirqama miti.Qusannaa saantima muraasa kaawwachuun jalq-abuun ni danda'ama.


Gilgaala- 4**Gaaffilee armaan gadii
deebisaa**

1. Karooraan jiraachuu jech-uun maal jechuu akka ta'e haala barattaniin ibsaa.
2. Tooftaalee qusannaa maatii ykn naannoo keessanitti baraman barreeffamaan qop-heessuun hiriyoota keessaniif daree keessatti dubbisaa.
3. Maatii keessan keessaa baankiitti ykn Iqqubiitti fay-yadamuu ykn miseensa hojii gamtaa qusannaa fi liqaa ta'e yoo jiraate gaaffilee armaan gadii gaafadhaa. Deebii isaas barreeffamaan barsiisaa keessaniif dhiyeessaa.

- D. Mana baankii deemuun maallaqaa kan kaawwatan yoom yoomii? Kan baafatan hoo?**
- E. Mallaaqa kana deemanii kan baafatan yoo rakkinni akkamii isaan mudate?**

9.2 Hawaasa Keessatti Gochaalee**Faallaa Qusannaa**

Daa'imman
Oabeenva!

**Fakkii 9.1. Gochaalee faallaa qusannaa ta'an**

Ergaawwan fakkii irratti mul'atan akkamiin faallaa qusannaa ta'uu akka danda'an ibsaa.

A. Baasii humnaa olii

- **Naannoo jirenya keessaniitti namoonni baasii humnaa ol baasuun rakkoo fi miidhaa adda addaatiif saaxilaman yoo jiraatan ibsa itti kenna.**

Rakkoo Walxaxaa

Hiiruutii fi Tsadaaluun uffanni seeraa mana barnootaa isaanii kan bitame waggaa sadii dura ture. Uffanni seeraa isaanii kun moofa'uun irra darbee kan bututee fi binxame ture. Akkasumas halluun isaa jijiirratee jira.. Hiiruutiif uffanni seeraa mana barnootaa akka bitamuuf yeroo gaafatan warri isaanii maallaqa uffata seeraa mana barnootaa ittiin bitamuuf akka hin qabne itti himaa turan .Kanaafis sababa kan ta'e

warrii isaanii gibira yeroo baay'ee osoo hin kaffalin kuufame akka kaffalan waan dirqamaniif, waamicha cidhaan boodaafafeerraa humnaa ol taasisuun intala fira isaanii waan waamaniif, dabalataan immoo bara haarawaa kana keessa ollaadhaa gadi osoo hin ta'in baasii guddaa baasanii maagaalaan alatti deemuun ayyanna kabajuu waan qabaniif fi ayyaana masqalaa itti aanuuf sangaa bitanii qaluu waan qabaniif ta'u isaa tarreessaniif.

Gilgaala- 5

Dubbisa armaan olii irratti hundaa'uun gaaffilee armaan gadiif deebii kennaa.

1. Rakkoon maatii kanaa inni guddaan maal?
2. Rakkoo kana akkamiin ba'uun danda'u?

B. Ilaalchaa duubatti hafaa

- **Ilaalchaa duubatti hafaa jechuun maal jechuu dha? Mee wanti be-ktan yoo jiraate ibsa irratti kennaa.**

Rakkoo Obbo Maahidarii fi Haadha manaa isaa

Intalli obbo Mahiidarii fi aadde. Tirringoo, Tizzitaa kan jedhamtu baay'-ee jalaa dhiibamtee jirti. Dhibee intala isaanii Tizzitaa beekuuf jecha naannoo isaan irraa baay'ee fagoo ta'e ganda mortuu tokko deeman. Mortichi sab-

aba maatiin kun gara mana isaa dhufaniif erga hubateen booda dhibeen intala tanaa "budaan nyaatamu" ishee waan ta'eef furmaata dhibichaa itti himuuf dursee akka hoolaa adii fidaniif hubachiise. Maatiin kun haaluma itti himameen hoolicha bitanii fidaniif. Hoolicha erga harkaa fuudhee booda warri intalattii biyya fagoo deemuun warqee gatiin isaa baay'ee mi'aawaa ta'e bitaanii galii akka godhan gaafate. Maatiin kun yeroo kanatti maallaqa harkaa qaban fixanii turan.Yaa ta'u malee maallaqa hin qabnu yoo jenne furmaata nuuf hin kenu jedhanii waan sodaataniif ollaa isaanii irraa liqeeffachuuuf deeman.Kun immoo rakkoo cimaa keessa isaan galche. Haa ta'u malee maddi dhibee intala isaanii hin argamneef. Silumaa dhibeen ishee cimaa dhufe. Maallaqni harkaa dhumaan deemuu fi liqii keessa galuun isaanii yeroof itti hin dhagahamne. Bara dhufu kaffaltii mana barnootaa ijoolee isaanii Kaffaluu akka hin dandeenye hin hubanne.

Gilgaala -6

Gaaffilee aramaan gadiif deebii kennaa.

1. Ilaalchaa duubatti hafaa jechuun maal jechuu dha?
2. Akka armaan olitti ibsametti hojmaata duubatti hafaa namoota dhiphisuu fi rakkinaaf saaxilu

maatii fi ijoollee naannoo keessanii gaafachuun barsiisaa keessaniif daretti barreeffamaan dhiyeessaa.

Ilaalchonni duubatti hafoo ta'an jiruu fi jirenyi namaa akka hin fooyyofne godhu. Fakkeenyaaf, maal naan jedhan jechuun maallaqa hedduu baasuu fi meeshaalee miidhaginaa adda addaa bituu, mana mortuu deemanii malaqa bahii gochuun isa kanaaf ragaa ta'u. Akkasumas dubartoonni dhiiraa gadi akka ta'anitti ilaaluunis ilaalcha duubatti hafaa dha. Sababa Kanaan dubartiin hojjetee qabeenya akka horattu hin jajjabeeffamtu. Ilaalchoota duubatti hafoon kunniin qusannaa kan hin jajjabeessine dha.

Gilgaala -7

Gaaffilee armaan gadii deebisaa

1. Ilaalchoonni duubatti hafoon guddina, jiruu fi jirenyi namaa irratti akkamiin gufuu ta'u danda'u?
2. Naannoo jirenyi keessaniitti ilaalchoota duubatti hafoo dha jedhaman tarreesaa.

9.3 Hiyyummaa

9.3. Salphina Hiyyummaan Fidu



Fakkii 9.2 Ibsitoota hiyyummaa keessaa tokko

Fakkii armaan olii ilaaluun balaa hiyyummaa fi beelli nama irraan gahu ibsaa. Hiyyummaan eenyumaaa namaa xiqqeessa. Hiyyummaan waan jaalatan nama dhabsiisa. kabaja nama dhorka. Kadhf nama saaxila.

Hiyyummaan bifa lama qaba. Inni tokko hiyyummaa maallaqa ti. Inni lammaffaan immoo hiyyummaa beekumsaa ti. Isaan lachuu dhalli namaa jirenyi sadarkaa gad aanaa akka jiratuu fi akka walitti bu'insi jiraatu kan godhan dha. Isaan lachuu hirkattummaa uumu. Hirkattummaan immoo nama hirkate irra darbee nama ofitti hirkises rakkoof saaxila. Namni hiyyummaa beekumsaa qabu hojii hojjechuu hin danda'u Kan namni hojjetuun jiraachuu fedha. Hiyyummaan beekumsaa hiyyummaa qabeenya caala balaaf dhala namaa saaxila. Hiyyummaa maallaqaa jabaatanii karooraan yoo hojjatan mo'achuun ni

danda'ama. Hiyyummaan beekumsaa kan badu garuu barumsaan qofa dha. Beekumsaa fi hojmaata haaraa fudhachuufis fedhii gaafata.

Gilgaala- 8

Gaaffilee armaan gadii deebisaa

1. Miidhaawwan hiyyummaan dhala namaa irratti geessisuu danda'u keessaa sadi barreessaa.
2. Hiyyummaanii fi aadaa hojii cimaa jiraachuu dhabuun gargar bahuu kan hin dandeenyeye ta'uu isaanii barreffamaan barsiisaa keessaniif dhiyeessaa.

9.3.2 Hariiroo Qisaasummaa Fi Hiyyummaa

- ***Qisaasummaa jechuun maal jechuu dha? Hiyyummaa wal-in haala kamin wal qabatu?***

Hiyyummaan kan dhalatu sababa adda addaan dha.. Kanneen keessaa tokkoo fi inni ijoon qisaasummaa dha. Qisaasummaa jechuun immoo mallaaqa ykn qabeenya qabnu karooraan ala baasuu fi balleessuu jechuu dha. Fakkeenyaaaf namoonni iqqubii fudhatan.

- a) Afeerra sababa malee gageesan yoo ta'e

- b) Meeshaalee ittiin tajaajilamnu see-raan kunuunsanii itti fayyadamuu dhiisuun qisaasummaa dha.

Isa kana mee fakkeenyaaan yaa ilaallu. Namichi gaarii oofu tokko meeshaalee gaarii isaa yeroo yeroon suphisiiisee yoo kunuunse, gaarichi yeroo dheeraaf akka isa tajaajilu gochuu isaa ti. Akkasumas farda isaa nyaata gahaa fi boqonnaa gahaa yoo kenneef ,yeroo dheeraaf tajaajila irraa argachuu danda'a.Yaa ta'u malee gaarichi yoo jala miidhamu argaa maallaqa bahii goch-uudhaan hin suphisiiisu yoo ta'e ,farda isaaf boqonnaa fi nyaata gaarii yoo hin dhiyeessineef humna dhabaa deema. Dhumni isaas bayeessa hin ta'u.

Gilgaala -9

Gaaffilee armaan gadii irratti mari'adhaa

1. Maloonni qusannaa jijabeessan maal maal fa'a dha?
2. Qisaasummaan bu'uura hiyyummaa ti. Kun akka-miin ta'uu akka danda'u hiriyoota kee waliin irratti mari'adhaa.

9.3.3 Hiyyummaa Balleessuuf, Baasii Xiqqeessuu Fi Qusannaa Barachuu

- ***Wantoonni baasii hir'suu dandeessisan maal fa'a isintti fakkaatu?***

Baasii xiqqeessuuf baasiwwan barbaachisoo ta'anii fi hin taane addaan baasanii beekuun murteessaa dha. Fakkeenyaaaf baadiyyaa keessatti iddoor ibsaan hin galitti qotee bulaan tokko boba'aa bitee yoo itti fayyadama ta'e qabeenya qisaase jechuu miti. Garuu ayyaana sababeeffachuun ijoollee isaaniiif yeroo hundaa huccuu bituu fi ani eenyuu gadi jechuun baasii humnaa ol baasuun qisaasummaa ta'uu danda'a.

Ayyanaa fi afeerraa adda addaa irrattis fira dhiyoo qofa waamuun afeeruu osoo danda'amuu ani eenyuu gadi jechuun nama hedduu waamuun afeeruu rakkoo bara dheeraaf keessaa hin baane keessa nama galcha.

Gilgaala- 10

Gaaffilee armaan gadii fi deebsaa

1. Baasii barbaachisaa ta'ee fi hin taane haala qabatamaa naannoo keessaniitti argamu irraa ka'uun fakkeenyaaan ibsaa.
2. Baasii barbaachisaa hin taane hir'suun, akkamiin hiyyummaaballeessuun akka danda'amu irratti mari' adhaa.

Yaada Xumura boqonnichaa

Namoonni jiruu tasgabbaa'ee fi mijaa'-aa jiraachuuf aadaa qusannaa barachuu qabu.Aadaan qusannaa jiraac-huun faayidaalee garaagaraa qaba.

Namoonni qusachuun rakkoo fi hiyyummaa moo'atanii jirenya mijaa'aa jira-atan hedduu dha. Qusannaan jirenya ofii fooyessuu fi barumsaa fi beek-umsaan of cimsuuf gargaara. Qusannaan gosa adda addaa qaba. Kanneen keessaa haala galii ofiitiin jiraachuun isa ijoo dha. Maallaqa olkaawwachuu fi humna ofiin jiraachuun baasii hin taaneef akka hin saaxilamne godha.

Aadaa qusannaa guddiffachuuf barm-aatilee duubatti hafuu adda baasanii beekuun ni fayyada. Barmaatileen

kunniin qisaasummaa fi hiyyummaaf nama saaxilu. Humnaa ol afeerraa qopheessuu,ilaalchonni duubatti haf-oon wkf. barmaatilee qisaa-summaaf nama saaxilan dha.

Walumaagalatti aadaan qusannaa jira-chuu dhabuun isaa hiyyummaaf nama saaxila. Aadaan qusannaa jiraachuu dhabuu immoo qisaasinni jiraachuu isaa agarsiisa. Qisaasum-maan itti fayyadama maallaqa seeraan ala ta'e dha.Rakkoo kana hambisuuf baasii hir'isuu fi qusannaa baruun barbaachisaa dha. Sababni isaas hiyyummaan kabaja namummaa nama dhabisiisa. Kanaaf, amantaa of irratti qabaatanii jiraachuu fi hirkataa ta'anii nama rakkisuu manna aadaa qusannaa gabbifachuu qabna.

JECHOOTA IJOO

Hiyyummaa: Dhabiinsa, rakkoo, hiyyeessa ta'u

Qisaasummaa: Mallaqa seeraan ala, karoora fi kaayyoo malee balleessuu

Qabeenya: Mallaqa , hambaa,

Jiruu mijaa'aa: Jirenya amansiisaa, ofitti amanuun jiraachuu, jirenya milkaa'aa rakkoo hin qabne, jirenya rakkoo hin qabne

Liqii: Fuula duraaf kan kaffalamu, rakkina nama mudate ittiin bahuuf namoota biroo irraa fudhachuu fi itti fayyadamuu

Gaaffilee keessa deebii

I. Gaaffilee armaan gadii dubbisuun sirrii kan ta'e "dhugaa" sirrii kan hin taane soba" jechuun deebsaa.

1. Namni hiyyeessa ture sooreessa ta'uu akkuma danda'u, sooreessa kan ture immoo hiyyeessa ta'uu danda'a.
2. Hiyyummaan iiaalchaa fi hiyyumaan qabeenyaa gonkumaa kan adda hin baane dha
3. Karoorri jirenyaa fi qusannaan duubaa fi fuula dura saantima tokkoo ti.
4. Namni tokko liqii osoo hin fudhatin jiruu fi jirenya isaa gaggeessuu hin danda'u.
5. Hojii hojannee jiraannu kamiyyuu keessatti qusannaan barbaachisaa dha.

II. "A" jala kan jiran " B" jala kan jiraniin Walitti firoomsi

- | "A" | "B" |
|---------------------------------|-----------------------|
| 1.Hiyyummaa | A. guddina walee |
| 2. Dhaabbilee qusannaan aadaa | B. Hirkattummaa |
| 3.Qisaasummaa | C. Baasi sababa malee |
| 4.Dhaabbilee qusannaan ammayyaa | D. Of danda'uu |
| | E. Baankii |
| | F. Uqqubii |

III. Gaaffilee armaan gadii dubbisuun bakka duwwaa ta'e guutaa

1. Naanno itti jiraattan keessatti _____ fi _____ miidhaawwan qusannaan daangessan dha.
2. Malawwan qusannaan kan ta'an keessaa_____ fi _____ eeruun ni danda'ama.

IV. Gaaffilee armaan gadii dubbisuun deebii sirrii filadhaa.

1. Qusannaan jechuun
 - A. Qabeenyaa dhalootaa darbuu danda'u kaa'uu jechuu dha,
 - B. wabii yeroo rakkinaa fi balaa ti.
 - C. Namoota rakkatan dhaqqabuuf
 - D. hundinuu sirrii dha.

2. Baasii barbaachisaa hin ta'in hir'irsuu jechuun
 - A. karooraan jiraachuu
 - B. maatii miidhanii jiraachuu
 - C. Of miidhanii boruuf yaaduu
 - D. hunduu sirrii dha
3. Qisaasummaa jechuun
 - A. qusannaa yaaduu dhiisuu
 - B. Itti gaafatamummaa dhabuu
 - C. Baasii bakka baasuu qabanitti baasuu dhiisuu
 - D. "a' fi 'b" n sirrii dha
4. Aadaa qusannaa horachuun wabii jirenyaa ti yoo jedhamu
 - A. Gatii dafqa ofiitti fayyadamuun nama gammachiisa
 - B. Maatiin akka hin diigamne gargaara
 - C. "a" fi "b"n deebii dha.
 - D. deebiin hin kennamne
5. Hiyyummaa iiaalchaa jechuun
 - A. Hojii jaalachuu dhiisuu jechuu dha.
 - B. Faayadaa waleef yaaduu dhiisuu jechuu dha.
 - C. Barmaatilee boodatti hafoo jala buluu jechuu dha.
 - D. Hunduu deebii dha

IV. Gaaffii armaan gadiitiif deebii gabaabaa kennaa


1. Aadaa qusannaa horachuun akkamiin hiyyummaa balleessuuf akka gargaaru ibsa irratti kennaa.
2. Naannoo jirenyaa keessanitti barmaatilee qusannoo irratti miidhaa geessisan jettan yoo xiqlaate fakkeenya lama eeruun isaan kana akkamiin akka of irraa ittisuun danda'amu ibsaa.

BOQONNAA KUDHAN

DAMMAQINAAN HIRMAANNAA UMMATAA

Kaayyolee boqannichaa: Boqonnaa kana
barattee erga xumurtee booda:

- *Faayidaalee hawasni
dammaqinaan
hirmaachuun isa
argamsiisu ni beekta.*
- *Dhimmoota hawaasni
dammaqinaan akka irr
atti hirmaatu barbaad-
amu ni beekta.*
- *Maalummaa waldaalee
siivikii naannoo keetii
ni hubatta*



*Fakkii 10.2 Hirmaanna hojii misooma
naannoo irratti*

- *Garaagarummaa fakkii lamaan
jidduu tokko tokkoon ibsaa.*
- *Garaagarummaa lamaan giddu-
utti mul'ateef sababni isaa maal
isinitti fakkaata? Hawaasni dam-
maqinaan kan hirmaatus kam
keessatti dha?*

10.1 Barbaachisummaa Dammaqinaan Hirmaanna Hawaasaa



*Fakkii 10.1 Duula hojii mana barnootaa
keesatti*

Haasawa dura taa'aa mana barumsaa

Dura taa'aan mana barnootaa Gonjila jalqaba cufiinsa Simisteeraa irratti barattoota mana barnootichaatiif haasawa godhan. Haala ibsa isaanitiin mul'atni mana barnootichaa lammilee gahumsa qaban horachuuf bu'uura buusuu dha. Kanaafis mana barnootaa kana keessatti barumsi qulqullinni isaa eegame kennamuu qaba. Qulqullina barnootaa mirkaneeffachuuuf

immoo mana barnootaa Gonjila keessatti rakkoleen armaan gadii dhabamuu akka qaban ibsanii jiru Hir'inni bishaan qulqulluu, hanqinni mana fincaanii, mana kitaabaa dhaabuun , manni yaalaa hojjatamuu dhabuun adeemsa baruu barsiisuu irratti gufuu kan ta'anii fi barumsa qulqullina qabu dabarsuu irratti rakkina fidaa kan turan ta'uu isaanii ibsan. Manni barnootichaa barattoota kutaa kudhan yeroo jalqabaaf qorm-aata biyyooleessaakka fudhatan waan godhuuf barattooni haala gaariidhaan qophaa'uu isaanii mirkaneessuu dha-buun rakkoo kan biraa ture. Barattooni turtii mana barnootaa isaanii keessatti barumsa dareen alaan beekumsa dabalataa argachuuf carraa hin qaban ture. Amma garuu, barattoota hojmaata mana barnootaa keessatti hirmaachuu, akkasumas maatiin barattootaa hoggansa mana barnootaa keessatti gurmaa'anii socho'uu erga eegalaniirakkinoonni heddu hiikamanii jiru. Sararri bishaanii dabalataan galee jira. Manni kitaabaa bayeessi ijaaramee kitaabileenis waan walitti funaanamaniif yeroo ammaa barattooni kitaabilee dabalataatti fayyadamaa jiru. Manni yaalii haaraan waan ijaarameef barnoonni yaaliidhaan deggaramee kennamaa jira. Barattooni barnoota daree keessaa barnoota wal maddeessaan akka deggaran godhamuu isaatiin gumiiwwan akka lammummaa fi amala gaariitiin waayee haqummaa fi filannoo

shaakala gochuun isaanii gumaacha olaanaa akka qabu hubachiisanii jiru. Keessattuu manni barnootichaa barattoota kutaa 10ffaa yeroo jalqabaaf qorumsa biyyooleessaakka fudhatan, qophii gahaa akka qabaatan gosa barnootaa adda addaa irratti barsisonni deggarsa adda addaa kan gochaafii jiran ta'uu isaanii ibsanii jiru. Barattooni bulchiinsa mana barnootichaa keessatti akka hirmaatan gochuuf jecha seerri ittiin bulmaataa qophaa'ee ture mana marii barattootaan erga ilaalamee booda hanga ta'e fooyyessuun mirkanaa'ee jira. Tarkaanniin kun hundi kan fudhatame maatii fi ummanni hoggansa barnootaa irratti gurmaa'ee himaachuu waan eegaleef ta'uu isaa cimsanii hubachiisanii jiru. Waan kana ta'eef bara kanas sochiin olaanaan yoo godhame mana barnootaa kana keessatti barnoota qulqullina qabu kenuun akka danda'amu amantaa qaban ibsanii jiru.

(Gaazexaa "Lissaana Naa'ood "jedhamu wagga tokkoffaa lakk 1 Guraandhala -Ebla, 2000 mana barnootaa Atsee Naa'oodiin qophaa'ee ka'umsa gochuun fooyya'ee kan fudhatame.)

Gilgaala-1**Dubbisa armaan olii irratti
hundaa'uudhaan gaaffiilee
armaan gadiitiif deebii kennaa**

1. Rakkooleen mana barnootaa Gonjilamaal maal turan? Furmaanni maaltu kenna-meef isinitti fakkaata?
2. Rakkoolee mana barnootaa Gonjilaa keessa turaniif furmaata kennuu irratti gaheen barattootaa yookan hirmaannaan barattootaa maal fakkaataa?
3. Rakkoolee mana barnootaa Gonjilaa keessa turan adda baasuu fi furmaata itti laachuu irratti haalli barattoonni hirmaannaan fooyyii qabu itti taasisan jira turee ?Fakeenyaan ibsaa.
4. Manni barnootaa Gonjilaa amala magaalaa giddugaleessaa kan qabu dha. Mee isin immoo qabatamaa mana barnootaa keessaan irraa ka'uun rakkinoota gurguddoo mana barnootaa ta'an shan eeruun furmaata waliin kaa'aa.
5. Adeemsa rakkina adda baasuu fi furmaata itti laachuu keessatti hirmaannaan isanii akka cimu gaheen barattoota mana barnoota kan-aa maal ta'uu qaba

Hojiiwwan tokko tokko dhuunfaan kan hojjataman yaa ta'an malee kanneen biroo immoo hirmaanna gareen yoo ta'e malee dhunfaan kan hin hojjetamne dha. Dhunfaan kan hojjetan ta'anis faaydaa qubsaa kan hin qabne ta'u. Fakeenyaaf naannoo keenya irraa osoo kaanee, sochiin seeraa fi naamusa dhunfaan kabajsiisuuf goonu bu'aa qabeessa hin ta'u. Ganda keenyas naannoo biroo waliin waliquunamsiisuun osoo barbaachiisee hirmaanna ummataa malee qofaatti galmaan ga'uun rakkisaa dha. Kunis kan mul'isu hirmaannaan hawaasaa hangam barbaachisaa akka ta'e dha. Hirmaanna akkanaa kana keessa faaydaa dhunfaa argachuun ni danda'ama. Bu'aa adeemsa kana keessa argamu irraa tokkoon tokkoon keenya fayyadamatoota ta'uu dandeenya. Muuxannoo fi beekumsas irraa arganna. Namoonni dhunfaanis rakkoo isaan irra gahuu danda'u irraa ni oolu. Hirmaannaan gareen godhamu kana caalaa barbaachisaa dha. Faaydaa dhunfaa irra kan hawaasaa ni caala. Hawaasni naannoo hundi fayyadamaa ta'a. Naannoo murtaa'aa irra darbee aanaa, ganda, naannoo fi biyyaaf fayyaduu danda'a. Waan kana ta'eef hirmaannaan hawaasni dammaqinaan godhu barbaachisaa dha

Gilgaala -2**Gaaffilee armaan gadiif
deebii kennaa**

1. Namni dammaqinaan hirmaachuun ummataa faayidaa homaatuu hin qabu jedhu osoo isin qunnamee ragaa maal dhiyeessuun falmitu?
2. Faaydaan hawaasummaa dammaqinaan hirmaannaa ummataa irraa akkamitti akka argamu gabaabinaan ibsaa.

Mana Barnootaa Dandaroo

Manni barnoota Dandaroo sadarkaa tokkooffaa mana barnoota magaalaa Fininnee irraa fagaatee argamu dha. Manni barnootaa mootummaa barattoota kuma tokkoo fi dhibba saddeetii ol ta'an qabu kun rakkolee heddu qaba. Rakkinoota hedduu kana keessaa haala baruuf barsiisuu irratti rakkoo fidaa kan ture rakkoo namusaar barattooni gareedhaan uuman dha. Barattooni kunis gareen walii ijaaaruun sa'aa barumsaatti dhugaatii dhuguun gara daree seenuun barsiistoota, barattootaa fi hawaasa mana barnootaa irratti rakkoo guddaa geessisaa turan.

Naamusa badaa daandii fi mana barnootaan alatti uumaniin ala baratto-

onni kun mana barnootaa keessattis barattooni dubaraa tasgabbaa'anii barumsa isaanii akka hin baranne miidhaa irraan geessisu. Sa'aa barumsaa kabajanii waan hin seenneef barsiisota isaanii waliin walitti bu'u. Nama isaan to'atu waan dhabaniif barattoota biroof fakkeenya badaa ta'anii jiru. Barsiisota isaanii waan hin kabajneef namni isaan gorsu hin argamne. Walumaagalatti manni barnootichaa sababa isaaniin amala mana barnootaa qabaachuu hin dandeeny.

Dura bu'aan mana barnootaa haaraan muuxannoo qaban irraa ka'uun rakkoo mana barnootaa ni hiiku jedhamanii ramadaman fala barbaadaa jiru. Rakkoo uumameef fala kennuun yeroo kan fudhatu ta'us haala jiru fooyyessuun akka danda'amu hin shakkine. Bu'aan kun akka argamu gochuuf garuu haalli guutamuu qabu ni jira. Innis tattaaffii dhunfaa isaaniin godhan qofa osoo hin ta'in hawaasni mana barnootaa hundi irratti hirmaachuu qaba. Haala kanaan hawaasni mana barnootaa hundi isaan faana akka hiriiru kakaasan. Kanaanis milkaa'an. Barsiisonnii fi maatiin barattoota gamtaa isaaniitiin ,barattootni kaawunsilii isaaniitiin ,akkasumas hawaasni naannoo gama ganda isaaniiin dura-bu'icha cinaa dhaabbatan. Rakkinichis waliin waan hojjetaniif fala argate. Itti fufuunis hirmaannuma kanaan rakkolee mana barnootaa kan biroo hiikuuf sochiin godhame. Yeroo

ammaa manni barnootaa Dandaroo godina san keessaa sochii barnootaa fi naamusaan filatamee badhaafame.

Hojii Garee

1. *Akka miseensa mana marii barattoota mana barnootichaatti of ilaaluun seenaa dhiyaate irratti hundooftanii gareen ta'uun rakkoolee yeroo san turan adda baasuun yaada furmaataa barr-eeffamaan dhiyeessaa.*
2. *Rakkoolee ijoon mana barnootaa keessan keessa yeroo ammaa jiran addaan baasuun hirmaannaa keessaniin akka hiikaman yaada furmaataa barreeffamaan qopheessuun dhiyeessaa.*

Manni barnootaa akkuma dhaaba kumiyyuu hawaasa mataa isaa kan qabu dha. Dhimmi mana barnootaa kumiyyuu hawaasa ilaallata. Namni hundi dhuunfaanis ta'e gareen dhimma mana barnootaa keessatti gahee olaanaan qaba. Kanaaf,murtiwwan mana barnootaa ilaallatan keessatti hirmaannaan hawaasaa mirkanaa'uu qaba. Namni kumiyyuu kaka'umsa mataa isaatiin guddina mana barnooticha keessatti hirmaanna gochuun gumaachuu qaba. Barataan mana barnooticha dhimmi mana barnooticha waan isa ilaallatuuf yoomiyuu taanaan dammaqinaan hirmaachuun irraa eegama.

Gilgaala -3

Gaaffiilee armaan gadiif deebii kennaa.

1. Adeemsa dimokraatawaa keessatti hojjattoonni dhaaba ykn waajjira tokko keessatti hojjetan hogganaas ta'uun baatan murtii dhaabichaaa ykn waajjirichaa irratti yaada kennuuf mirga ni qabuu? Maa-liif? Akkamiin?
2. Isin hoo dhimma mana barnootaa keessan keessatti adeemsa murtiikennuu irratti hirmaachuu qabduu? Maaliif ?

10.Faayidaalee Dhaabbilee Siviikii Keessatti Hirmaachuu



Fakkii 10.3 Naannoo xureessuu



Fakkii 10.4 Sochii mormii xuraa'insa naannoo

- **Fakkii armaan olii irraa maal hubattu.**
- **Waldaan Fakkii lakk 10.4 irra jiru, hawaasaa faaydaa maal kenuu ?**

Jireenya Daa'imummaa Aara Tamboo irraa Walaba Ta'en Fedha

Addunyaa kana keessatti wantoonni heddu daa'imman miidhan ni jiru. Daa'imman wantoota akkanaa irraa eegamuuf mirga kan qaban ta'uun isaanii seera addunyaa irratti tumamee jira. Daa'imni waggaa 12 Maatiyoos jedhamuu fi miseensa waldaa farra kaansarii Itoophiyaa ta'e ergaa nuu dabarse keessatti "sinis wantoota miidhaa geessisan irraa of eeguu qabdu" jedha. Addunyaa irratti guyyaan dhibee kaansarii waggaa waggaan ni kabajama. Waggaan kanatti dhadannoон filatame, "Jireenya daa'imummaa aara tamboo irraa walaba ta'en fedha.>> kan jedhu dha. Kun immoo fedhii daa'imman addunyaa hundaa akka ta'e ni amanama.



Fakkii 10.5 Mirgi naannoo qulqulluu keessa jiraachuu nuuf yaa kabajamu!

Maatiyoos "Tanboo xuxuun mataa ofii irra darbee fayyaa namoota biroo irratti miidhaa guddaa kan geessisuu dha. Kana waan ta'eef mana keessatti ,mana barnootaa keessatti, akkasumas naanno jiraannutti namoonni tamboo xuuxan gocha isaanii irraa of ittisuu qabu. Hundi keenyas namoonni tamboo xuuxan naannawa keenya jiran yoo ta'e gocha isaanii kana irraa akka of qusatan akeekkachiisuun nurraa eegama" jedha .

Dhaabbanni kaansarii addunyaa dhadanno "Daa'imman aara tamboo irraa yaa ittisnu" jedhu hojii irraa oolchuun hirmaannaa hunda keenyaa gaafata. Kunis kan nu yaadachiisu namoonni osoo hin beekin tamboo xuuxuu irratti bobba'an miidhaa inni fidu barsiisuuf itti gaafatamummaa qabnuun hojii akkanaa irraa of qusachuu akka qaban itti himuu akka qabnu dha. Mana keessatti,konkolaataa keessatti , iddo

daa'imman itti guddatanittii fi iddo ummanni wal gahutti akkasumas iddo tamboon akka hin xuuxamne dhorkame hundatti tamboo xuuxuu dhorkuun gahee hunda keenyaa ta'uu ibsa. Yaaliin kun akka milkaa'u gaheen daa'immanii, maatii, jaala daa'immanii wkf. olaanaa ta'uu agarsiisa. Kana waan ta'eef daa'imman iddo qulqullina qabu jiraachuuf mirgi isaanii eegamuu akka qabu nu barsiisa. (Gaazeexaa Addis Zaman irraa Amajii 25/2000 fula 2 irraa fooyya'ee kan fudhatame dha.)

Gilgaala- 4

Dubbisa armaan olii bu'uura godhachuun gaaffii armaan gadiif deebpii kennaan.

1. Dhaabbile siviikii armaan olitti dubbistan irraa ka'uun maqaa lamaan isaanii eeraa. Akkas-umas gaheen isaanii maal akka ta'e ibsaa.
2. Waayee Maatiyoos maal akka hubattan addeessaa.

Hojii Garee

Barreeffama armaan olii irraa wanta hubattan bu'uura godhachuun gaaffii armaan gadii gareen raawwadhaa.

A. Mana barnootaa keessanitti hojii wal fakkaatu hojjechuuf gumii tokko hundeessuu dandeessan.
Waayee gumii hojii wal fakkaatu

hojjechuuf hundeessitan kanaa addeessaa.

B. Faaydaa gumii dhaabbatu kana irraa argamuu danda'u barreesaa.

C. Isuma kana bu'uura godhachuun barattooni mana barnoota keessanii toftaa gumii keessatti akka hirmaatan gargaaru qopheessuun dhiyeessaa .

Dhaabbileen waldaa siivikii kaayyoolee addaa addaa gama hawwaasummaan ykn diinagdeetiin qaban galmaan gaguuf jecha kaka'umsa mataa oftin dhuunfanis ta'e gareen kan ijaaraman dha. Waldaaleen kun fedhii ofii irratti hundaa'uun dhiibbaa mootummaatiin ala ta'uun, walabaa fi seera qabeessa ta'anii kan hundeffaman dha. Kana waan taa'eef sirna dimokraasii keessatti waldaleen kun gama hawaasum maa, dinagdee akkasumas siyaasaatiin tajaajila ummataaf kennuuf caarrraa bal'aa qabu.

Waldaaleen siiviikii faayidaalee heddu qabu. Faakeenyaaaf wantoota mootummaan ummataaf guutuu hin dandeeyne irratti tajaajila heddu kennuu danda'u. Ummanni imaammata mootummaa irratti akka mari'atanii fi adeemsa siyaasaa to'achuu akka danda'u, sirna dimokraasii akka shaakalu haala mijaa'aa ni uumu. Dabalaatanis waldalee siivikii keessatti namoonni dhunfaan miseensa ta'uun hirm-

aannaa dammaqinaan taasisuun muu-xannoo fi beekumsa akka argatan isaan taasisa. Miseensoonnis aadaa walii yaaduu fi wal gargaaruu akka guddifatan akka-sumas jaalala hojii akka horatan gochuufis ni fayyada.

Gilgalaa -5

Gaaffilee armaan gadii hojjadhaa.

1. Ragaa jaarsa ykn jaartii jaalala hojiitiin beekaman funaanuun barreeffama gababaa dhiyyeessaa.
2. Faayidaalee waldaan siivikii qabu taarreessaa.

Tuuttuuyyee fi Akaakayyuu ishee Abbiyyee

Tuuttuuyyee: Abbiyyee, aayyoon wagga meeqaaffaa kee siif kabajje ?

Abbiyyee: Wagga saddeettamii sadeettaffaa kiyya intaala koo. Waaqni ishee yaa eebbisu.

Tuuttuuyyee: Kana eega siif gotee maaliif loltaan?

Abbiyyee: Osoon hin beekin itaala koo; osoon hin beekin "Har'a guyyaa dhaloota kee waan ta'eef miidhagdee taa'uu qabda. Manaayis bahuu hin qabdu." naan jette.

Tuuttuuyyee: Ni beekti mitii ree? Anis ta'u guyyaa dhaloota kiyyaa huccuu

haaraa uffadhee, bareedee, hiriyoota, obboleettii fi obboleessa kiyya gidduu taa'uun akkan bashannanu taasifamaa jira mitii? Ati hoo maaliif guyyaa dhaloota keetii uffata haaraa uffattee maatii kee walin hin teenyee?

Abbiyyee: Tuuttuuyyee wanti siif hin galle tokkotu jira. Abbaa umurii dheeraa ta'uun kanan danda'e naannoo keenya keessatti waldaa misoomaa hundeessuu irraa eegalee hanga saderkaa amma irra jirrutti osoo hin taa'in ol jedhee gad jedhee hojjachuu fi jaalala hojii qabaachuu kootiin dha. Dheerina umrii koo kanaaf sababni isaa jaalala hojii ti. .Kanaafuu, guyyaa dhaloota kiyyaa yoon kabaju hojiin jaaladhuu fi isa asiin na gahe kanaan gargar bahuu hin danda'u. Uffata uffadhee, miidhagee, maatii kiyya waliin ta'een kabaja ture.Kana booda immoo uffata kiyya jijiiree gara hojii deemun qaba ture.Waldaa misoomaa kiyya keessatti immoo dhimma cimaaf beel-lama nan qaba. Guyyaa dhalootaa kiyya ergan kabajee booda akkamiinan jaalawwan koo lamaan dagadha. Haadha keetiin walii galuu kan hin dandeenye sababa kanaan dha.

Tuuttuuyyee: Amma naa gale Abbiyyee. Anis fakkeenyummaa keen hor-dofa.

Abbiyyee: Ishoo! intaala too. Naa guddadhu! Siifis umurii naaf kenne siif yaa kennu!. Jaalala hojii horadhu!

Gilgaala -6

**Marii armaan olii irratti
bu'uureeffachuuun gaaffilee
armaan gadiif deebii kennaa.**

1. Akka ilaalcha keessaniitti garaagarummaan haadha tuuttuuyyee fi akaakayyuu tuuttuuyyee gidduu jiru maal?
2. Beekumsa ijoo lamaan Abb- iyyee irraa argattan barr-eessaa.
3. Tuuttuuyyeen yaada haadha ishee fi akaakayyuu ishee keessaa kam yoo fudhatte wayya? Maaliif ?

Yaada xumura boqonnichaa

Dammaqinaan hirmaannaan ummataa, misooma hawaasummaa fi ijaarsa sirna dimokraasii ummataa, guddisuuf barbaachisaa dha. Sirni dimokraasii kan guddatu, guddinni hawaasummaa kan dhufu, akkasumas naageenyi ummataa kan mirkanaa'u lammileen hundi hirmaannaan dammaqinaan yoo taasiisan dha. Srina dimokraasii keessatti dammaqinaan hirmaachuuf haalli mijaa'aa ta'e ni uumama. Isaan kanneen keessaa tokko mirga walabummaan gurmaa'u ti. Gurmaa'uun immoo humni bittinaa'ee jiru walitti dhufee humna cimaa akka uumu taasisa. Waldaaleen siivikiis bu'uura mirga walabummaan gurmaa'u ti. Namoonni dhuunfanis ta'e gareen fedhii fi kaka'umsa ofiitiin wadaalee siiviikii kaayyoolee haw-

aasummaa fi dinagdee galmaan gahuuuf ni hundeffatu. Waldaaleen kunis dhiibbaa mootummaa irraa walaba dha. Waldaaleen kunnin tajaajila hawaasummaa kennuun mootummaaf degarsa gochuun alatti sirna dimokraasii gabbisuu keessatti gumaacha olaanaa taasisu. Waltajjii ummatni karaa dimokraatawaa ta'een raawwii imammata mootummaa irratti hirmaatuu fi to'annaa akka godhu taasisan ta'uun tajaajilu. Waldaaleen siivikii aadaa wal gargaaruu fi jaalalli hojii akka cimu taasisu. Haaluma kanaan isin hundinuu amma irraa eegalee waldaalee siivikii tokko keessatti miseensa ta'uun hirmaannaan dammaqinaan taasisuu irratti shaakaluu fi gahee lammumaa isin irraa eegamu bahuu qabdu. Dammaqinaan hirmaachuu keessaniinis aadaa fi jaalala hojii ittiin cimsachuu danda'uun isin irraa eegama.

JECHOOTA IJOO

Faaydaa dhuunfaa:- Faaydaa namoonni dhuunfaan waan tokko irraa argatan

Faaidaa hawaasummaa:- Faaydaa namoonni waan tokko irraa waliin ykn qaamni hawaasaa tokko argatu

Kakaasuu: Namoonni kaayyoo ykn hojii tokko akka hubatan ,akka deggaran,akka morman wkf.gochuuf jecha kan raawwatu

Jaajala hojii:- Hojiin jirenyaaaf barbaachisaa ta'uu isaa hubachuun hojii kabajuu

Gaaffilee keessa deebii

**I. Gaaffilee armaan gadii dubbisuun sirrii kan ta'een 'dhugaa' jechuun sirrii
kan hin taane immoo 'soba' jechuun deebii kennaan.**

1. Hawaasni dammqinaan hirmaachuun isaa faaydaa dhunfaa qofa argamsiisa.
2. Yeroo amma jireenyi dorgommii waan ta'eef wanti bu'a qabeessa ta'e hundi kan raawwatamu dhuunfaan qofa.
3. Jaalalli hojii kan ibsamu faaydaa hojii dubbachuu qofa dha.
4. Waldaaleen siivikiin gurmaa'anii hojii bal'aa fi faaydaa qabu hojjechuu akka danda'an sirni dimokraasii isaaniif barbaachisaa dha.
5. Dammaqinaan hirmaannaan ummataa jaalalli hojii akka uumamu gargaara.

**II. Gaaffilee armaan gadii "A" jalatti dhiyaatan kan "B" jala jiraniin walitti
firoomsaa.**

"A"

1. Dhuunfaan kan hin raawwanne
2. Faayidaalee waldaa siivikii
keessaa tokko dha.
3. Qaamoolee faayidaa
hawaasummaa argaamsiisan
4. Dhiibbaa mootummaa irraa
walaba kan ta'e
5. Sirna dimokiraasii

"B"

- A. Maatii, gandaa, aanaa , naannoo fi biyyaa
- B. Dhabamuu dammaqinaan hirmaan
hawaasaa
- C. Waldaalee siivikii
- D. Misooma naannoo
- E. Hojiwwan humna mootummaan
qafa hin hojjetamne deggeruu
- F. Dhiibbaa aadaa
- H. Haala dammaqinaan
Hirmaannaa hawaasaaf
mijaa'aa ta'e

III. Gaaffilee armaan gadii dubbisuun deebii sirrii ta'e filadhaa.

1. Faaydaalee waldaa siivikii keessaa tokko
 - A. Miseensoota isaa aangoo siyaasaatiif geessisuu
 - B. Bakka mootummaan humni isa hanqatetti deggeruu
 - C. Imaammata mootummaa cimsuuf jecha waltajii ummanni irratti hirmaatu uumuu
 - D. Kutaalee hawaasaa dhiibbaan irra gahaa tureef aantummaa siyaasaa qabaachuu

2. Hojiwwan faaydaa qaban kamiyyuu
 - A. dhunfaan raawwachuu qabu
 - B. Gareen raawwachuu qabu
 - C. Akka haala qabamaatti hojii irratti dhuunfaan ykn gareen raawwatamuu qabu
 - D. Deebiin hin kennamne

3. Waldaalee siviikii ilaalchisee dhugaa kan ta'e kam?
 - A. Dhuunfaan ykn gareen fedhii fi kaka'umsa ofiitiin hundeeffamu
 - B. Haala qajeelfama mootummaa irraa kennamuun hojjeta
 - C. Kaayyoo hawaasummaa malee kaayyoo dinagdee hin qabu
 - D. Deebiin hin kennamne

4. Dammaqinaan hirmaannaa ummataan faaydaa hawaasummaa kan argatan

A. Biyyattii	C. Ummata aanaa
B. Ummata gandichaa	D. Hundinuu sirriidha.

IV. Iddoo duwwaa armaan gadii jecha/gaalee sirrii ta'een guutaa

1. Waldaaleen siivikii bu'aawan mirgoota walabaan _____ ti.
2. Hawaasni naannoo tokkoo waliin ta'uun misooma tokko ciminaan hojjetee hojii hojjete irraa bu'aa olaanaa yoo argatu _____ mul'isa.

V. Gaaffilee armaan gadiif deebii sirrii ta'e kennaa

1. Faaydaalee waldaa siivikii keessaa lamaan isaanii eeri.
2. Dammaqinaan hirmaannaa hawaasaa keessatti garaagarummaa faaydaa dhuunfaa fi garee adda baasaatoo fakkeenyaa addeessaa.

BOQONNAA KUDHA TOKKO

BEEKUMSA FEDHUU


Kaayyoolee Boqonnichaa: Barumsa boqonnaa kana erga xumurtee booda:

- *Maddoota beekumsaa gurguddaa ni beekta.*
- *Garaagarummaa yaadaa fi ilaacha duubatti hafaa adda baasuun faayidaa beekumsaa ni hubatta.*
- *Aadaa dubbisuu fi faay-daa haala odeeffannoona itti aabamu ni beekta.*

11.1 Maddoota Beekumsaa Ijoo Ta'an



Fakkii 11.1 Kitaabileen Maddeen Beekumsaa ti



Fakkii 11.2 Barnoonni madda beekumsaa ti



Fakkii 11.3 Namooti Madda Beekumsaa ti

- *Namoonni fakkii tokkoffaa irratti agarru ragaalee madda beekumsaa kan ta'an eessaa argachaa jiru isinitti fakkaata?*
- *Maloonni beekumsa ittiin argatan Fakkii 11.2 fi 11.3 irratti ila-altan maaliin walfakkaatan? Ga-raagarummaan isaanii maal?*

Ji'a Onkololeessa

Ji'ini Onkololeessaa biyya keenya keessatti iddo baay'eetti waan lamaan beekama. Abaaboo fi asheetaan. Abaaboon mallattoo nageenyaa, gamma-chuu fi tasgabbii ti. kanaan alatti namoonni abaaboo, jaalala, amanamummaa, galata ittiin galchuu fi kana kan fakkataniif ittiin faayadmu. Abaaboon yeroo gaddatiifis itti fayyadmu. Sababiin isaas abaaboon yeroo gabaabaa keessatti waan goguuf gaba-abachuu umurii namaa waliin akka fakkeenyaatti dhiyeessu.

Ji'a Okololeessaa adda kan isa taasisu inni kan biroo aesheeta dha. Ji'a dhadhaanii fi aannan akka barbaad-ametti itti argamu dha. Kana qofa miti. Onkololeessi haadha dammaa ti. Sanuu asheeta dammaa. Damma muruun Okololeessa keessa jedhama. Midhaan qusachuunis Onkololeessa irraa eegala.. Sababa kanaan daa'ima harmaan guddisuu, miidhaan immoo Onkololeessatti qabachuu jedhama . Onkololeessi waan hundi baay'inaan kan itti argamu qofa osoo hin ta'in waantoonni argamanis bayeessa ta'uu isaanii agarsiisa. Jechoonni kun wanta argame hunda of eeggnoon qabuun akka barbaachisu mul'isa. Fakkenyaaf daa'ima harmaan, midhaan Onkololeessatti kan jedhamu yoo fudhanne, daa'imihi daa' imummaan haa-laan yoo hin qabamne, yoo hin sooramne ykn yoo hin kunuunfamne yeroo guddatu lammii gaarii hin ta'u. Onkololeessa keessa midhaan akka hin miidhamne eeguu fi kunuunsuun akkasumas omisha ji'a Muddee fi Amajjii keessa argame seeraa fi qusa-nnaan yoo itti hin fayyadamne Wax-abajjii fi Adoolessa keessa beela'uun hin oolu. Kanaafuu, oomisha jalq-abumaa kaasee hanga dhumaatti kunuunsuun barbaachisaa dha. omisha Onkololeessi kan beekamu wantoota kana qofaan miti Bishaan lagaa qul-qulluu ta'ee kan argamus Onkololeessa keessaa. Rakkinni jiru garuu

namni bishaan Onkololeessaa barba-adu xiqqaa ta'uu isaa ti. Bishaan Onkololeessaa osoo dhugamee gaarii ture. Gorsa hiyyeessaas namni dhag-geeffatu osoo jiraatee gaarii ture kan jedhamu sababa kanaan dha.

(Madda kaahsaay Gabre Igzi'aabiheer 1998, fuula 112-113 irraa fooyya'ee kan fudhatame.)

Gilgaala-1

Dubbisa armaan olii irratti hundaa'uun gaaffilee gadiif deebii kenni

1. Namtichi waayee ji'a Onkololeessaa barreessee odeeffanno barreffamicha irratti tuqame essaa fide isinitti fakkaata?
2. Barreessaan kun odeeffanno kana akkamitti funannachuu danda'e?
3. Kana irraa ka'unaadhaan madda beekumsi itti argamuu danda'u tarreessaa.

Beekumsi ragaa umuriin, muxanno fi sadarkaa barumsaa keenyaan argannu irratti hundaa'uun qabeenya gud-datu dha. Karaa biroon immoo beekumsi hanga odeeffanno qabnuun kan madaalamu dha jechuun ni dada'ama. Kanaafuu adeemsa dagaagina beekumsaa keessatti dhimmi odeeffanno salphaatti kan ilaalamu miti.

Beekumsi kitaaba, Gaazeexaa, Raad-iyoo, Televizyiinii akkasumas namootaa fi naannoo keenya irraa kan argamu dha. Kana waan ta'eef naannooni madda beekumsaa keessaa isa tokko dha. Fakkeenyaaf barreeffama waayee Ji'a Onkoloolessaa asii olitti dubbisne qopheessuuf dubbisne qopheessuuf barreessichi naannoo isaa siritti hub-ateera. Jechoota jaarsootaas sirriitti dhaggeeffatee galmeesseera. Haalli kun adeemsa beekumsa horachuu keessatti walitti hidhamiinsa ragaaleen daaw-wachuu, dhaggeeffachuu fi dubbisuu waliin qaban agrisiisa.

Beekumsa naannoo keenyaa irraa kan argannu wantoota kallattiin ilaaluun, urgeeffachuu, dhandhamuun harkan qaqqabuun fi dhaggeeffachuu dha.. Waayee bishaan lageen naannoo keenyaa guutuu fi hir'achuu, waayee nageenyaan socha'uun namootaa, waayee misooma naannoo keenyaa irratti beekumsa kan argannu kalattiin ykn qaamaan iddo sanaatti argam-udhaan

Maddi ijoon beekumsa saayinsii irratti hundaa'e ittiin argannu mana barnootaa ti. Kunis, kan ta'u barsiisoo-nni ogummaa adda addaatiin leenji'an mana barnootaa keessatti waan argamaniif. Isaanis beekumsa ragaa amanamaa irratti xiyyeeffate qindeessanii dhiyeessu. Barreeffama adda addaa dubbisuunis beekumsa heddu argachuun ni dandeenya. Rediyoon fi tele-

vizyiiniinis maddoota beekumsaa bay-eessa ta'an dha. Dabaltaanis ragaaleen dawwannaan beekumsi irraa argamu ni jiru. Fakkeenyaaf, waayee hambawan seenaa biyya keenyaatti argaman kan akka dhagaa dhabbataa Xiyya , fincaa'aa Abbaay , galma sheek Husseen, ijaarsa Harar ,madda dhala namaa kan ta'e Hadaar akkasumas waayee haroowwan sululaa beekuu yoo barbaadne ragaan daawwannaan argamu madda beekumsaa ijoo dha.

Haa ta'u malee ragaalee dagaagina beekumsaa nu barbaachisan yoo fudhannu of eegannoo gochuun barbaachisaa dha. Sababni kanaas gaaze-exoonti ykn buufatni raadiyoo tokko tokko akkasumas namoonni tokko tokko odeeffannoo sirrii hin taane yoo nu dhiyyeessan beekumsi nuti argannu waldhahaa ykn odeeffannoo sobaa ta'a. Kanaafuu, ragaa dhiyaate osoo hin fudhatin dura maddoota biroo waliin walbira qabanii madaaluu, akkasumas barsiistootaa fi namoota beekumsa sana qaban gaafachuun mirkaneef-fachuun barbaachisaa dha.

Gilgaala -2**Gaaffilee armaan gadii
hojjadhaa.**

1. Mataa dureewwan armaan gadii keessaa kan isiniif mijaa'e filachuun ykn mata durebarsiisoonni keessan isinii kennan fudhachuun ragaalee gama adda addaa-tiin funaanaa.

Ragaalee kanneenis karaa adda addaatiin qindeessaa.


- a. Walitti dhufeenyi maatii fi mana barnoota keessanii maal akka fakkaatu
 - b. Ka'umsi dhukkuba saree maraatee maal akka ta'ee fi of eeggannoон godhamuu qabu maal akka ta'e
 - c. Rakkoowwan bu'uurri qonnaan bultoota, horsiisee bulaa ykn daldaltoota naannoo keessanii maal akka ta'anii fi akkamiin fala kennuuf akka tattaafattan
 - d. Adeemsa barachuu keessatti gaheen maatii maal akka ta'e
2. Odeeffannoowwan funaantan haalaan qindeessaatoo barsiisaa keessaniif agarsiisaa.

11.2 Yaadaa Fi Ilaalcha Duubatti Hafaa

- ***Yaadaa fi ilaalcha duubatti hafaa yoo jennu maal jechuu keenya isinitti fakkaata?***
- ***Ilaalchoonni duubatti hafoon naanno keessanitti hubattan maal maal fa'a dha?***

Hojii manaa barsiistuu Galaannee

Barsiistuu Galaaneen barattoota kutaa 6ffaa keessatti barsiisaa jiran yaadaa fi ilaalcha duubatti hafaa naanno isaanii jiru galmeessanii akka fidanii fi daree keessatti akka irratti mari'atan taasisan. Barattoonis haaluma ajejamaniin yaadaa fi ilaalcha duubatti hafaa naanno isaanitti argamu funaananii fidan. Barattooni muraasni kan fidanii dhufan kan armaan gadii turan.



Gilgaala- 3**Gaaffilee armaan gadiif deebii kennaa**

1. Barattoota shanan kees-saa kamtu ilaalcha boodatti hafaa fidee dhufe? Kana jechuu keessaniif sababni maal dha?
2. Isin hoo ilaalchoota boodatti hafooakkanaa naannoo keessanitti hubattaniirtuu? Mee akkeenya eruun kutaa keessatti irratti mari'adhaa.
3. Sababiin ku'umsa yaad-oottaa fi ilaalchoota kanaa maal ta'u danda'a?
4. Miidhaa ilaalchoonni boodatti hafoon fedhii beekumsa argachuu fi guddifachuu irraan geessisan ibsaa.

Ilaalchi boodatti hafaan barmaatilee miidhaa qabanii fi saayinsiidhaan hin deggaramne irratti kan hundaa'e dha. Keessattuu rakkolee uumamaa fi ilmi nammaa geessisuun yoo miidhamnu ilaalcha boodatti hafootiif saaxilamuun ni mul'ata. Fakkeenyaaf teeknooloijiitti fayyadamnee oomisha gahaa omishuu yoo hin dandeenye, roobni xiqlaatee ykn baay'tee midhaan keenya nu jalaa barbadaa'a. Yoo sana ta'e beelaaf saaxilamna. Yoo beelaaf saaxilamne immoo cubbuu wayii waan hojenneef waaqni nutti dhekame nutti fakk-

aachuu danda'a. Haa ta'u melee yaada saayinsaawaa qabaannee bu'aawwan teeknooloojii barnoota ammayyaatiin argamanitti fayyadamnee yoo omishnee fi yoo of dandeenye yaada akkanaa kana irraa bilisa taana.

Namoonni rakkinni fayyaa isaan mudachuu danda'a. Namoonni tokko tokko garuu dhibee isaaniitiif sababaa hin taane dhiyyeessu. Fakkeenyaaf dhibee AIDS/HIVn namoonni dheekkamsa waaqaa waliin wal qabsiisan hin dhabaman. Kun immoo ka'umsa dhibee kanaaf ilaalcha qabatamaa hin taane uumuu dha.

Ilaalchi boodatti hafoon yaada saayinsaawaa hin taaneef akka saaxilamu nu taasisa. Yaadni saayinsaawaa hin taane jireenyi dhala nammaa akka hin mijofne godha.

Namoonni ilaalchaa fi yaada duubatti hafaa qaban misooma hojiin argamsiisuu iirra "kan inni naa ajeje hin dhabu" jechuun carraa ofii eeggachuu filatu. Namoonni isaan fakkaataan rakkina jalaa bahanii yommuu ilaalan "carraan isaaniif ganama barreffameef" jechuun yaadu. Jireenyi milkaa'uufii yoo dides carruma isaanii san balaaleffachuutti galuu danda'u. Kanaaf, namni rakkof uumame dal-dalus bu'aa hin buusu jedhanii yaadu.

Walaloo yaada kana waliin wal qabate ilaala. Ana na aijeesi ykn carraa koo milkeessi Garaan na baqaqe beelaan kanan hooqu Ilaalchi akkasii immoo abdii kutachuu fi mo'amuu fida. Namoonni abdii yoo kutatan ofitti amanuu fi qabsoodhaan rakkina keessaa bahuu irra balaaf saaxiluu danda'u. walumaagalatti ilaalchonnii fi yaadoleen duubatti hafoon yaada namaa kan miidhan dha jechuun ni danda'ama. Waan kana ta'eef miidhaa fi faydaa dhabeessa ta'uu isaanii qabatamaatti hawaasaatti mul'isuun ,adeemsa keessa immoo dhabamsiisuun barbaachisaa dha. Duraan dursee garuu ofii keenyaaf barumsa keenyaan cimnee ilaalcha keenya ilaalcha sayinsaawaa irratti hunde-essuun nurraa eegama.

Gilgaala -4

Gaaffii armaan gadiif deebii kennaa.

1. Ilaalchonni duubatti hafoon miidhaa akkamii fayyaa namaa irraan geessisuun danda'u?
2. Ilaalcha saayinsaawaa hin taane qabachuun maal irraa madda? Miidhaan isaa hoo maal?
3. Barumsaan cimuun haala akkamii ilaalcha duubatti hafaa irraa walaba ta'uuf nama

11.3. Ragaa

- *Isin ragaalee seeraan qindeessitanii ni qabattuu? Ragaalee hanga ammaatti seeraanqabattan qabduu?*
- *Faayidaan ragaalee keessan seeraan qindeessitanii qabachuu maal?*

Zabargaa ilma hubataa

Zabargaan barataa mana barnoota baadiyyaa naannoo dhagoota xiyaan argamutti kutaa 6ffaa keessa baratu dha. Mucaan kun uumamaan dammaqina kan qabuu fi dubbisuu fi barreessuuakkuma danda'een guyyaa dhaloota haadha, abbaa fi obboleeyyi isaa akkasumas kan ofii isaa maatii isaa gaafchuun yaadannoo isaa irratti galmeeffate. Umuriin isaa adaduma dabalaan deemuun firoottan isaa gaafachuun gabaabumatti galmeeffate. Hojii isaa kanaanis dhalataa saba Guraagee ta'uu isaa beeke.

Kana irras darbee maqaa gandoota shanan naannoo sanii jaarsolii gaafachuun galmeeffate. Itti aansuunis gandoonni kun maaliif maqaa akkanaa argachuu akka danda'an jaarsoota gafatee yaadannoo isaa guddicha irratti galmeeffate. Amma yeroo dhiyoo keessatti immoo seenaa dhagoota xiyaan dhalattoota naannoo fi barsiistoota gaafachuun galmeessuu egalee jira.. Barnoota lammummaa fi amala gaarii

kutaa 6ffaa kana baratee yoo xumuru immoo waayee maatii isaa,naannoo isaa, muuxannoowwan faaydaa qab-eessaa fi naannoo sanitti argama ilaachisee ragaa bal'inaan funaanee akka barreessu dubbateera.

Zabargaan kana yaa dalagu malee hiriyooni isaa tokko tokko akka nama hojii hiikuutti isa ilaalu. "Zabargaan yeroo boqonnaa issatti barumsa isaa qo'achuu fi maatii isaa gargaaruu irra waan fayyadus waan hin fayyadnes hojjechaa oola " jechuun itti qoosan.

Gilgaala -5

Yaada armaan olii irratti hundaa'uun gaaffilee armaan gadiitti deebii kennaa.

1. Zabargaan hojii sirrii ta'e hojjechaa jira moo, akkuma jedhame hojii namni hojii hin qabne hojjetu hojjechaa jira?
2. Zabargaan hojii jalqabe kana caalmaatti bu'a qabeessa taasisuuf ragaalee funaanuu cinaatti maal gochuu qaba isinitti fakkaata

Ragaan tooftaa waayee maatii ,naannoo, mataa keenyaa, mana barumsaa, akkasumas hanga ta'e waayee biyyaa ilaachisee yaadolee faayidaa qaban ittiin argannu dha. Zabargaanis isa kana waan hubateef hanga

dandeettii isaa waan hubate hordofaa galmeessuun isaa dinqisiifamuu qaba. Ragaan faaydaa qabeessa dha. Kanaaf, itti fufiinsaan funaanamuu fi of eeggannoon kaawwamuu qaba. Itti fufiinsaan yoo jedhamu ragaa yeroo kamiyyuu argannu osoo hin tuffatin galmeeffachuu qabna jechuu dha. Fakeenyaaf qilleensi torbee darbe turree fi kan har'aa hanga ta'e garaagarummaan irratti mul'achuun isaa hin oolu. Kana waan ta'eef torbee galmeeffannee jirra jennee har'a dhiisuun hin qabnu. Haala kanaan, gatiin meeshaalee daldalaa, haalli fayyaa keenya,, amalli namoota irratti mul'atu ,gud-dinni beelladootaa fi biqiltootaa wkf. yeroo yerootti jijiiramuu danda'u. Osoo addaan hin kutin yeroo yeroon guddinaa fi jijiirama isaanii galmeessuun nurraa eegama.

Ragaan seeraan qabamuu qaba yoo jennu karaa tokkon iccitiidhaan eegamuu qaba jechuu keenya dha. Fakkeneyaaf waayee amala maatii keenyaas ta'e kan mataa keenyaa ykn akka sumas haala fayyaa keenyaa yeroo galmeessinu iccitiin kaa'uu qabna. Haala kanaan dhimmonni dhunfaa, ummataa, maaatii,waajjira mootummaa fi kan biroo iccitiin kaa'amuu qabu. Gama birootiin ragaaleen akka hin bannee fi akka hin qisaasne eeguuf fayyada. Ragaalee galmeessuu qofa osoo hin ta'in isaan galmaa'an seeraan ol kaa'uun akka hin banne taasisa.

Ragaaleen seeraan hin teenye yoo ta'e yeroo barbaannetti argachuu dhiisuu dandeenya. Wal keessa galanii addaan baasuu irratti nu rakkisuun danda'u.. Karaa nuti hin beekneen nu jalaa hatamuus danda'u. Nu jalaa yoo hataman immoo icciin keenya bahuu irra darbee humna ykn dadhabbi keenya namni biroo itti fayyadama jechuu dha.. Kanaaf, namni akka Zabargaa ragaalee funaanuu cinaatti waayee saanadoota of eeggannoona qabachuu fi kaa'uu irratti hubannoo argachuu qaba.

Gilgaala -6

Gaaffii kanaa gadii irratti mari'adhaa

1. Ragaan faaydaa qaba kan jedhamu maaliif?
2. Ragaan seeraan yoo hin qabamne miidhaa maal geessisa?

11.4 Muuxannoo kitaaba Dubbisuu



Fakkii 11.4 Mana kitaabaatti dubbisuu



Fakkii 11.5 gaaddisa manaa jalatti dubisuu



Fakkii 11.6 Muka jalatti dubbisuu

Yeroo baay'ee ni dubbistuu? Yoo ni dubbistan ta'e, guyyaatti yeroo hangamiif muuxannoo dubbisuu qabdu? Hin dubbistan yoo ta'e maaliif hin dubbisne?

- **Barreeffamoota akkamii dubbiftu? Barreeffamoota akkasii dubbisuu maaliif jaalattu?**
- **Yeroo baay'ee eessatti dubbiftu? Bakka akkasii maaliif filattu?**

Inni sirrii ta'e kan eenyuu ti?

Barattooni kutaa 6ffaa Giday, Xankirii fi Zamzam jedhaman muuxannoo dubbisuu irratti qaban ilaalchisee ejjennoo adda addaa qabu. Ejjennoo isaanii kanas akka armaan gadiitti ibsanii jiru.

Gidaay: Ani dubbisuuf fedhii olaanaan qaba. Barreeffamoota baay'een dubbisa. Barreeffamoonni kunis Gaazeexoota, barruuleewwan, kitaabota ykn dabtaroota koo ta'uun danda'u.

Bakkeen itti dubbisus bakka ifnigahaan itti argamu jechuun muka jala, mana kitaabaa keessa, mana jalaa fi mana keessatti dha.

Zamzam: Giday ati sirrii miti. Kan dubbisnu baay'ee ta'uun hin qabu. Kun ta'uun baannan ija keenya balleessuu ni danda'a. Abbaan koos namni baay'ee dubbisu kan hojii hin qabne dha. Mataayis ni dhukkubsata naan jedhee jira. Dubbisuu kan qabnu dabtara keenyaa fi kitaaba barataa qofa ta'uun qaba. Wanta biroo kan dubbisuu qabnu akka barsiisaatti yoo sirritti guddanne dha. Yeroo dubbisnus mana kitaabaa fi mana keenyatti, kutaa qo'annaa keenya keessatti qofa ta'uun qaba.

Xankir: Gidayis ta'e Zamzam dogog-gortanii jirtu. Barreeffama arganne hunda dubbisuu hin qabnu. Kit-

aabilee hojii manaa barsiisonni keenya nuu kennan hojjechuuf nu barbaachisan ni dubbisna. Asoosama dubbisuunis hammeenya hin qabu. Gaazeexaa yoo ta,e garuu kutaa ispoortii qofa dubbis-uun ni gaha. Barreeffamoota kan biroo dubbisuun faaydaa hin qabu.

Gilgaala- 7

**Marii armaan oliitti
dhiyyaate irratti
hundaa'uun gaaffilee
armaan gadii deebisaa.**

1. Barattoota sadan keessaa waa'ee dubbisuu irratti ejjennoo fooyya'aa ta'e kan qabu eenyu? Maaliif isinitti fakkaata?
2. Falmii barattoota sadanii irratti erga mari'attanii booda waayee muuxannoo dubbisuu irratti maal hubattan?

Dubbisuun meeshaa beekumsa keenya ittiin gabbifannu dha. Yeroo barannus barsiisonni wanta nutti himan fudhachuu qofa osoo hin taane, nutis baay'ee dubbisnee beekumsa dabalataa argachuu qabna. Waan kana ta'eef, ijoollummaa keenya irraa kaafnee muuxannoo dubbisuu guddifachuun nurra jira.

Waayee muuxannoo dubbisuu irratti dhimmoonni dagatamuu hin qabne ni jiru. Yeroo dubbifnutti bakka ifni gahaan jiru filachuu qabna. Bakki ifni olaanaan ykn gadi aanaan jirutti dubbisuun ijaaf gaarii miti. Namoonni tokko tokko aduu keessattis ta'e ykn bakka ifni elekitirikii humnaa ol jirutti dubbisan. Bakka ifni gahaan hin jirretti namoonni dubbisanis ni jiru. Ijjooleen akkana godhan yeroo isin mudatan dhukkuba ijaatiif akka hin saaxilamne gorsa kennaafii .

Dhimmii kan biroo inni hubachuu qabnu dhimma filannoон dubbisuu ti. Wanti dubbisuu qabnu wanta barannu qofa miti. Barreffamoota kan biroo ragaalee dabalataan nuuf kennamanis dubbisuun nurraa eegama.Kutaalee gaazexaa fi barruuleewan adda addaa dabree dabrees ta'u dubbisuu qabna.Barreffama dubbisuuf iddo fi yeroo murteessuun barbaachisaa yoo ta'eyyuu wantoota kana sababeeffachuun dubbisuu dhiisuun barbaachisaa miti. Mana kitaabaa qofatti yoo ta'e malee hin dubbisu jechuu hin qabnu. Ifni gahaan hanga jirutti muka jalatti, taaksii fi otobisii keessatti, saalonii keessatti, kutaa ciisichaa, mana kitaabaa fi bakka birootti dubbisuun ni danda'ama.

Barreessaan Mangistuu Lammaa, obbo Yidenaqaachaw Tasammaa, Pirofeseer Akiliiluu Lammaa, obbo Yilmaa

Dheeressaa, Abbaa Ciqoo Tsaggaayee, Gabramadiinii fi kkf biyya keenya keessatti namoota gurguddoo jedhamuu danda'an dha. Kunis kan ta'e namoonni kun baay'ee dubbisuu fi wantoota gadi fageenyaan qorachuu danda'uu isaaniitiin dha. Isinis, fakkeenyummaa isaanii kana hordofuudhaan hayyoota beekamoo taatanii maqaa biyya keessanii waamsisuuf baay'ee dubbisuu qabdu.

Gilgaala- 8

Gaaffilee armaan gadii irratti waliin mari'adhaa.

1. Barreffama dubbisuudhaaf bakka murtaa'e filachuun dirqama miti kan jedhame maaliif?
2. Yeroo baay'ee dubbisuun bu'aa maalii argamsiisa?
3. Namoota barachuu fi baay'ee dubbisuudhaan biyya isaaniiitiif waan gaarii hojjatan keessaaa namoota sadi ilalchisee gaaffii afaaniitiin ykn dhimma isaanii irratti waan barreffame dubbisuun ragaa funaanaa. Kana booda, lammileen kun biyya isaaniiitiif maal akka gumaachan hiriyoota daree keessaniif dhiye essaas.

11.5 Tooftaa Qo'annoo Barumsaa

- ***Barumsa keessan qo'achuu osoo hin eegalin dura qophii maal fa'a gootu?***
- ***Adeemsa qo'annaa barumsaa kees-satti tooftaa akkamii hordoftuu?-***
- ***Yeroo xumurtan hoo?***

Kadiir fi Birmaaciiti

Mana barnootaa keenya keessatti Kadiirii fi Birmaaciit kan jedhaman barattoota kutaa 6ffaatu jira. Kadiir yeroo tokko daree keessatti muge. Barumsa isaatinis firii gadi bu'aa ta'e qaba. Birmaaciit garuu, barattuu cimtuu dha. Daree keessatti yeroo barsiisaan ishee barsiisu wanta hin galleef ni gaafatti. Warri biroon yeroo ishee gaafatan deebisuun ni hirmaatti. Barsiistuuun Birkitiin garaagarummaa ijoollee kana lamaan gidduu jiruu hubattee jirti.

Guyyaa tokko barsiistuuun kun ijoollee lama barumsa isaanii akkamitti akka qo'atan dareef akka ibsan gaafate.

Kadir akkana jechuun ibse. Yeroo hundaa qo'achuun natti hin talu, na nuffisiisa .Kanan qo'adhu yeroo qormsi gahu dha. Guyyaan gosa barnootaa san itti qorambaru dha yeroo jedhamu dابتara koo kaaseen gara kutaa ciisichaa gala.

Kana booda hanga dadhabutti qo'ac-huu dha. Yeroon qo'adhus kan naaf hin galle yoo jiraate homaa gochuu hin danda'u .Irran darba.

Birmaaciitis dabaree isheetiin itti fufte. Ani guyyaa tokkotti dubbisuun mataa koo dhiphisuu hin jaaladhu. Guyyaa guyyaan wantan baradhe jala jalaan qo'adha. Yoo naaf hin galle hiriyoota koo waliin irratti dudubbanna. Yeroo sana yoo naaf galuu dide barsiisaa koon gaafadha. Qo'achuu osoo hin eegalin dura wantoota na barbaachisan jechuun kan akka gal mee jechootaa, yaadannoo, kitaaboleen wabii nan qopheeffadha. Wantan dubbisus yaad-annoo irratti nan qabadha. Akkanatti yoon qo'adhu siritti naaf gala. Bara darbe tokkoffaa bahee kanan bad-haafame kanaaf natti fakkaata. Baranas battallee irratti firii gaarii argachaan jira. Tokkoffaa akkan bahus shakkii hin qabu.

Gilgaala - 9

Gaaffilee armaan gadii irratti mari'adha.

1. Muuxannoo qo'annoo gaarii kan qabu Kadiir moo Birmaacit dha jettu? Maaliif?
2. Haala deebii lakkoofsa 1 irr-arrri kennitaniin firii gaarii argachuuf akkamitti qo'ach-uu qabna jettu?

Qo'achuuf dubbisuu fi kaayyoo kan biraaf dubbisuun garaagarummaa muraasa hanga ta'e qabu. Beekumsa walii galaa fi ragaalee adda addaa argachuuf bakkuma nutti toletti dubbisuu dandeenya. Haala kanaan yoo dubbisnu yaadannoo qabachuu fi irra deddebi'anii dubbisuun dirqama hin ta'u.

Qo'annaaf yoo dubbisnu garuu, yaadni waan dubbisnu sanaa hanga nuuf galutti irra deddeebinee dubisna. Yeroo qo'annus meeshaalee qo'annoof barbaachisan qopheessuu qabna. Kana malees, bakka sagaleen hin jirre filachuu fi teessuma gaarii irra taa'uun barbaachisaa dha.

Yeroo dubbisnus yaadicha gadi fage-nyaan sakatta'uu qabna. Yaada nuuf hin galles addaan baasnee hiriyoota keenyaaf ykn dareedhaaf mariif dhiyyeessuun barbaachisaa dha. Wanti dubbisnu dirqama dabtara keenya qofa ta'uu hin qabu. Mata duree baranne kan ilaallatan barbaaduun ibsa dab-alataa argachuun gocha barataa cimaa ti. Qo'annaar yeroo xumurru qabxiilee ijoo ta'an hangam akka hubanne, gaaffiwwan garaa garaa hojjechuun of madaaluun barbaachisaa dha. Inni kunis ofiin of madaaluu jedhama.

Qo'annoona adeemsa armaan gadiiqaba.

Qophii dursa gochuu

Adeemsa 1

1. Of kenuun dubbisuu
2. Barreeffamoota walitti duufan ilaaluu
3. Irra deddeebi'ianii yaaduu

Adeemsa 2

Of Madaalluu

Adeemsa 3

Gigalaa -9

Gaaffilee armaan gadii ibsa barbaachisaa ta'e kenuun deebisaa

1. Gargaarumman qo'achuuf dubbisuu fi kan biroo ma-al?
2. Qabxiileen yeroo qo'annu nuuf hin galin yoo jiraatan maal gochuu qabna?
3. Yeroo qo'annaag gaggeessitan sadarkaalee armaan gadii irratti maal hojjechuu qabdu?
 - a/ Dursitanii yeroo qophii gootan
 - b/ Yeroo qo'annaag irraa jirtan
 - c/ Qo'annaag erga xumurtanii booda

Yaada xumura boqonnichaa

Boqonnaa kana keessatti waayee madda beekumsaa, waayee ilaalchaa fi yaadoota miidhaa geessisan irratti mari'annee jirra. Beekumsi maddawwan mana barnootaa, kitaabilee, gaazeexaawwan fi kan kana fakkaatan irraa kan argamu dha. Beekumsi kunis mataa keenyaa fi naannoo keenya jijiiruu kan nu dandeessisu ta'uun isaa hubannee jirra.

Qabxiwwan waayee yaadootaa fi ilaalchoota duubatti hafuu ykn miidhaa geessisan ilaalchisee kaasne beekumsa akka argannu nu taasisi jira. Barmaatilee fi tilmaamota qabatamaa hin taaneen akka bullu kan nu taasisu ta'uun isaa ilaallee jirra. Kunis adeemsa mataa keenyaa jijiiruu fi tattaaffii naannoo keenyaa misoomsuuf taasisnu akka miidhu nama hin shakkisiisu.

Miidhaa fayyaas akka nurra geessisuu danda'u nuuf gala. Qabxiilee qo'annaalilaalchisee kaasa-nellee gabaabumatti haala kanaan tee-ssisu ni dandeenyaa.

Qo'annaan dursanii qophii gochuubarbaada. Sadarkaa kanattis wantoota qo'annaaf nu barbaachisan guunnee dhiyeessina. Gara qo'annaatti yoo seennu yeroo murtaa'e keessatti hojii keenya ni raawwanna. Qo'annicha yeroo xumurru immoo haala adda addaan mataa keenya ni madaalla.

Haaluma kanaan boqonnaa kana keessatti qabxiwwan ijoo of eeggannoona ilalaaluun beekumsaa fi qabxiilee ijoo kanneen hubachuun keessan ni amanama. Haa ta'u malee beekumsa argachuun keessan qofti gahaa miti. Waan barumsaan argattan san hojiitti jijiiruuf tattaaffii gochuun isin irraa eegama.

JECHOOTA IJOO

Beekumsa: Dandeettii, yaad-qalbiwwan, wantootaa fi ta'eewan gadi fageenyaan hubachuu.

Ragaa: Yaada ijoon waayee namootaa, naannoo, wantootaa fi waayee dhimmoota adda addaa hubachuuf funaanamu.

Ilaalcha boodatti hafaa: Tilmaamaa fi ilaalcha saayinsiin hin deggaramne, barmaatilee qofaan kan gaggeeffamu

Qo'anna: yaad-qalbiwwan gadi fageenyaan hubachuuf jecha barreeffamoota maddoota ragaa kan biroo siritti sakatta'uun qorachuu

Dubbisuu: barreeffamoota ragaalee adda addaa of keessatti qabatan waliin haasawuu

Of madaaluu: Qo'anna booda gaaffiwwan adda addaa hojjechuun hangam akka hubatan keessa deebi'uun ilaaluu.

Gaaffilee keessa deebii

I. Jechoota armaan gadii sirrii kan ta'e "dhugaa" kan sirrii hin taaneef immoo "soba" jechuun deebsaa

1. Manneen barnootaa madda beekumsaa ijoo dha.
2. Barnoonni yoo babal'atu ilaalchonni duubatti hafoon lafa qabachaa deemu.
3. Mana fooyya'aa keessa jiraachuuf beekumsa fooyya'aa qabaachuun barbaachisaa dha.
4. Beekumsa guddifachuuf filannoowwan jiran keessaa ragaan isa tokko dha jechuun ni danda'ama.

II. Roga 'B' jala kan jiran roga 'A' jala kan jiraniin walitti firoomsi

"A"

1. Ilaalcha boodeetti hafaa
2. Madda beekumsaa isa ijoo
3. Qo'annaa
4. Qophii qo'annaan dura
5. Maddeen odeeffannoo

"B"

- A. Shamarran barsiisuun bu'aan isaa xiqlaadha
- B. Meeshaalee qo'annaa filachuu
- C. Alaabaa kabajuu
- D. Dubbisa biroo irraa haala adda ta'een gaggeeffama
- E. Adeemsa barnoonni gadi fageenyaan itti dubbisamu
- F. Mana barnootaa
- G. Raadiyoo, Jaarsolii, Moobayili

III. Gaaffilee armaan gadii dubbisuun deebii sirrii ta'e filadhaa.

1. Ilaalchoonni duubatti hafoon yoo maal ta'e jijiiramuu danda'u?
 - A. Ummanni barumsaan yoo qaram
 - B. Saayinsii fi Teeknoloojiin yoo guddate
 - C. Barumsaan yoo guddannu
 - D. Hundinuu sirrii dha.

2. Qo'anna ilaalchisee sirrii kan ta'e isa kam?
 - A. Qo'achuun kan danda'amu mana barnootaa keessatti qofa dha.
 - B. Qo'annaan kan namaa galu yeroo sagantaan qormaataa as dhiyaatu dha.
 - C. Bu'aa qabeessa ta'uun kan danda'amu jala jalaa yoo qo'atan dha.
 - D. Hiriyaal waliin qo'achuun yaada namaa jeeqa.

3. Kanneen armaan gadii keessaa ragaa nuu dhiyeessuu kan danda'u isa kam?

A. Televizyiinii	C. gaazeexaa
B. Raadiyoo	D. Hunduu

4. Yeroo qo'annaa yaadannoo qabaachuuun faaydaa maal qaba?
 - A. Yaadota ifa nuuf hin ta'in mariif dhiyeessuuf
 - B. Barreeffama harkaa fooyyessuuf
 - C. Yaadannoo qabachuun hagas mara faaydaa hin qabu.
 - D. Hundinuu deebii dha

5. Kanneen armaan gadii keessaa ilaalcha duubatti hafaa kan ta'e kam?
 - A. Yeroo hunda duubbisuun falaasama hin taane keessa nama galcha
 - B. Dubartoonni dandeettii isaanii kamiinuu dhiiraan walqixa.
 - C. Dubartii barsiisuun hunda fayyada.
 - D. A fi Bn ilaalcha duubatti hafoodha.

V . Gaaffilee armaan gadiif deebii gabaabaa kennaa

1. Beekumsi gabbachaa akka deemu taasisuun faaydaa maal qaba ?
2. Qo'annaa adeemsa dubbisa biroo irraa maaltu adda isa taasisa?
3. Ilaalchi duubatti hafaan akkamiin miidhaaf nama saaxiluu danda'a ?
4. Ilaalcha duubatti hafaan akkamiin dhabamsiisuun danda'ama?

**Alaabaa Mootummaa Naannoolee Miseensota Mootummaa Federaalawaa Dimookiraatawaa
Rippiubilikii Itoophiyaa.**



Alaabaa Mootummaa Naannoo Tigraay



Alaabaa Mootummaa Naannoo Affaar



Alaabaa Mootummaa Naannoo Amaaraa



Alaabaa Mootummaa Naannoo Oromiyaa



Alaabaa Mootummaa Naannoo Sumaalee



Alaabaa Mootummaa Naannoo Beeneshangul-Gumuz



Alaabaa Mootummaa Naannoo Ummatoota Kibbaa



Alaabaa Mootummaa Naannoo Gambeelaa



Alaabaa Mootummaa Naannoo Hararii

Miseensonni mootummaa naannoolee armaan olii kun akkaataa heera Mootummaa Federaalawaa Dimookiraatawaa Rippiubilikii Itoophiyaa (*Keeyyata 47, fuula 102 - 103*) kan kaa'amedha.